

Lucas Jesucristogin-kaka-nuegan Palchogzhad

Lucas

Imi Lucasdin imial Jesús-immal-imajad kwen takchajul. Tenal Lucas tule-imial-immal-takchamaladzhe tegin ual-immal-itomaladzhe nuekwa immal-pal-ekichis Jesús iti-napkin ibi imadi-kus tegin Jesús igi chogzhagusbal. Tegin Lucas Pab-Purpa-Nuedbal kep tule-walgwen-Teófilo-nugadga iti-karta nermaszhun. Tenal Lucas oyosdo Jesús sanal tulega kunoni, tenal Jesús iskued kwen nikchul-kus. Tenal Jesús wilejakwa pel-kwapa tulemal-takcha, tule-wiledimalad-ugakche. Tenal Jesús-nonibal iskued-akar tule-abonagal. Al Jesús nakrusgin purkwis tegin ibapágén kannan tullenonibal.

Imi Lucas Judío-tule-chul. Tenal Lucas ina-cheed-tule tenal Pablo-e-pakadmo. Tenal Lucas Hechos-karta nermasmo. Pitomalgu.

1 Imi teun takalgu, tulemal-ichejul anmal-abalgín immal-kujad nermasmalan. ²Tenal we tulemal peyedzhe alamadi-kusmal, tule-imial-takchamaladzhe tegin tulemal kepegin-Pab-Jesús-kaka-palchogmalad anmalga inniki Jesúsgin chogzhad-yopí nermasmabal. ³Tummad-Teófilo, imi an-chunnad an nuekwa kepe-sagla-akar pél Jesúsgin-immal-kujad pal-amis-choggu, al an takto, antin pul nuekwa inniki-inniki Pab-Jesús-igal-kujadgin pega neremanemo. Tenal an takpaldo wedin pul ib-nued. ⁴Imi an pega nermaeed, pe nuekwa pal wisgugal, pe Jesús-igalgin pel-kwapa turdajad, ib-chunchunnad, ib-kakanzhul.

Angel chogzhagujad Juan Bautista mimmilenoniko

⁵Imi Errey-Herode Judea-napkin neg-takmaigu, teun tule-irwal-

Pabzhe-koled-Abíaszhikid-walgwen maimo. Tenal we tuledin nug Zácarías. Tenal Zácarías-e-ome-Elisabet ampa Aarón-e-wagwamo. ⁶Tenal we abirginmalad napírra nanemal, al Pab Tummad we abirginmaladgin istar-choged kwen nikchul. Tenal we abirgin pane-pane Pab-chogzhad-pallí igal-mezhijadgin nanedimalbal. ⁷Tenal Elisabettin kusgu-wichul-nuchu-amiedbal nuchu-kwen-nikchul. Tenal we abirgineddin pato chelegangus, nuchu-nikued-wilub okpis.

⁸Imi te ibagwengin, Abíaszhikmaladga wilub noni Pabzhe-koled-neggín arpagal. Tenal teun takalgu, Zácarías Pabzhe-koled-neggín ampa tule-irwal-Pabzhe-koledga arpadiamo. ⁹Tegidgin Zácarías tule-irwal-Pabzhe-koled-igal-maidbal chulenoni, Pabzhe-koled-neg-yabal

toggal, tegin Pab Tummadga immal-wawad kuggalbal.¹⁰ Tenal teun takalgu, tule-Pabga-immal-wawad-kuged-wachi omosgu, tulemal-pel-kwapa magadbal aknidamal Pabzhe kolgal.

¹¹ Tegin Zacarías Pabzhe-koled-neg-yabal togzha Pabga immal-wawad kuggal. Tegin Zacarías Pabga-immal-wawad-kuged-kwichid-nuedzhik kwisgunoni. Tegidgin Pab-angel arpak Zacaríasga nononi.¹² Tenal Zacarías Pab-angel-takchagu, weob pakal pes, tegin Zacarías angelgin kwakialbal.¹³ Tegin Pab-angel Zacaríasga chogal:

“Zacarías, melle pe an-tobguma. Imi Pab Tummad pe-eje-koled itos. Imi pe-ome-Elisabet pega machi-nikune. Tenal pe machi-nugzhao, Juan.¹⁴ Tenal we machi pega mimmilenonikil, pemal we machigín welgumalo tegin pemal ulubgin pela-pela weligwal itonimalbalo. Tenal tulemal-ichejul pe-machi-mimmilejadbal peyedzhe welgumalmogo.

¹⁵ “Imi pe-machi Pab Tummadga tule-tummadga kunoniko. Tenal we machi keg vino kobel, tegin keg inna-kabil kobbabil. Tenal we machi e-mimmilejad-akar pela-pela Pab-Purpa-Nued-nika-kudio.¹⁶ Tenal we machi Pab-Tummadzhe-akpirgal íchejul Israel-tulemal-imanoniko.¹⁷ Tenal pe-machi-Juan Pab-akpene-chogzad-palmidagoed-tule-iktual ne, tenal Juandin Pab-kaka-palchoged-Elíasyob kannaled nikunatapmogo. Tenal Juan aga pilalgugal pabgan-istar-ag-a-nuskan-taktimalad-imanoniko. Tenal Juan tule-pirkin-pirkin-tamalad-pinzheed ogwabalo tule-yer-pinchemaladyob. Tegin Juan Pabga kuakuna tule-urpemalabalo Pab-tule-palmidagoed-abingegal.”

¹⁸ Tegin Zacarías angelga chogal: —Nabir pe chogendo. ¿Tenal an igi wisguo pe-anka-chogzad

ib-chunchunnad? Imi antin tegin an-ome animal pato cheredgusmal, animal nuchu-nikuued-wilubzhulmal.

¹⁹ Tegin angel Zacaríasga chogal:
—Imi antin, an angel-Gabriel.

Tenal an Pab-Tummad-waglikra arpagedga kwichi Pab-choged-pallí immal imagal. Tenal Pab Tummad peje an-palmial, pega we kakapurwa-nuegan palchoggal.²⁰ Imi pe ankin-pengujadbal keg-pe-chunma pe peine, an pega immal-chogzhad e-wilubganbal kunonikoedzhe.

²¹ Tenal tule-magadbal-Pabzhe-kolbukmalad Zacarías-abintabukmal. Tenal tulemal Pabzhe-koled-neg-yabal owed-owed Zacarías-takchagu, chogalma: “Igi Zacaríasde yabal kude-wede?”

²² Tegin Zacarías Pabzhe-koled-neg-yabal-akar noalgu, tulemalga pato keg chunma. Tenal Zacarías kobalbi-immal-chogzhadbal tulemal mag takchamal Zacarías Pabzhe-koled-neg-yabal immal-purpaled takcha. Tenal Zacarías keg-chunma-peszhun.

²³ Tegin Zacarías Pabga-immal-uknaid-arpaged pelgusgu, aga negzhe nadzhun.²⁴ Tegin Zacarías angel-takchad-cholbal, e-ome-Elisabettin ponigwal kwisgunonijun. Tenal Elisabet ponigwal-kwisgujad-akar ni-walatal aga e-neg-akar kwen noszhul-kus.²⁵ Tenal Elisabet aga ulubgin chogalzhun: “Imi Pab Tummad imis-ibegin wilejakwa an-taknonikidbal an-pentas nuchu-nikugal, an-nuchu-nikchulidbal tulemal melle istar an-pal-takegal.”

Angel chogzhagujad Jesús mimmilenoniko

²⁶ Tenal Elisabet ni-walanerkwa ponigwal-kwichidgin, Pab Tummad Nazaret-Galileaje e-angel-Gabriel-palminoni puna-yaeje.²⁷ Tenal we puna-yaedin nug María. Tenal María ampa machered-kwen-

omodijulid. Tenal puna-yae-María tule-José-nugadbak aga kaka-ukchamal aga nikumalgal. Tenal José-din Errey-David-e-wagwa.

²⁸Tegin angel puna-chiid-neg-yabal tognonigu, punaje kote chogal:

—iAnná, tegidde! Pab Tummad nugu pegin pinzhas.
Tenal Pab Tummad chogdo,
ede pebak kudii.

²⁹Tegin María angel weob ega kaka-kolnoni itosgu, mag-itojul-pes. Tegin María aga ulubgin pinzheal: “¿Ibi chogle-wede, anka angel weob chognonikiddé?” ³⁰Tegin angel Maríaga chogalzhun:

—María, pe melle an-tobguma, Pab Tummad nugu pegin pinzhas. ³¹Imi pedin ponigwal kwisgunoniko. Tenal pe nuchunikonikil, pe machi-nikunoniko. Tenal pe machi-toto-nugzhao, Jesús. ³²Tenal we machi-toto tule-tummadga kunoniko. Tegin we machi nug-kunoniko Pab-Pul-Tummad-E-Machi. Tenal Pab Tummad akpene-Errey-David-neg-takmaid-kujadyob we machi-odomogo. ³³Tenal we machi-Jesús ilagwen-nadgu Israel-neg takmaio, tenal e-neg-takmaid pal kwen pelguojul-kuo.

³⁴Tegin María angelga chogal:

—An nabir itogendo pe-anka-chognonikid. ¿Tenal pe-anka-chognonikid igi kunoniko-ade? An macherganbak kwen nanedijuli.

³⁵Tegin angel Maríaga chogal:

—Imi Pab Purpa Nued pegin akteloniko, tegin Pab-Pul-Tummad-e-kannaledged pel-kwapa pe-edunoniko. Al pe machi-nikunonikoed machi-chwiliqidgakuo. Tegin machi nugzhalenonibalo Pab-Tummad-Machi. ³⁶Tenal pe-kwenad-Elisabettin pato cherediidgin nuchu-nikunonimogo. Imi tulemal Elisabetkin chogmaldo, Elisabet kusgu keg nuchu-ami. Tenal Elisabet pato ni-walanerkwagus ponigwal-

kwichid-akar. ³⁷Tenal Pab Tummadgadin keg chogel immal keg ku, tenal Pab Tummadga pel-kwapa nabir immal ku. Al an-pega-chogzhadyob pega kunoniko.

³⁸Tegin María angelga chogal:

—Tegil nabirde. Tenal antin Pab-Tummad-mosga yer an itomo-choggü, al Pab Tummad akalzhul pe-chogzhadyob ankin immal imakodo.

Tegidgin angel ilgwen María-akar nadzhun.

María Elisabet-taknaded

³⁹Tegin María nadzhun Judea-yalaganbal neg-kwebur-Elisabet-chiidzhe. ⁴⁰Tegin María Zacarías-neg-maidzhe tognatapku, Elisabetche kolnatap. ⁴¹Tenal Elisabet María-eje-kolnoni itosgu, Elisabet-mimmi sapejul e-nanibus. Tegidgin Elisabet pela-pela Pab-Purpa-Nued-nikunoni. ⁴²Tegin Elisabet sapejul kolmas chogal:

—iImi Pab Tummaddin egmal-omeganga pul nugu pe-takcha, tegin pe-nuchu-nikuod ampmamo!

⁴³¿Tenal ante ibi-tule-ade, an-Tummad-e-nan an-taktagal?

⁴⁴Tenal Elisabet Maríaga pél chogalzhun:

—Imi an kepegin itonigu pe wanagakkin anche kolnai, an-nuchu weligwal-itogedbal sapejul an-ebunoni. ⁴⁵Tenal pe Pab-Tummadgin-penzhul-kunonikidbal, Pabdin pega ib-nued imas, tegin Pab-pega-chogzhadyob, pél pega kunoniko.

⁴⁶Tegin María chogal:

Imi antin ulubgin-akar Pab-otummonai.

⁴⁷Tegin an-purpa Pab-an-abonogedgin weligwal-itomo.

⁴⁸¿Ibiga an weligwal-ito? Nabir.

Imi antin tule-pinchedad tenal Pabdin yabli ankin nugu pinzhas.

Tenal tulemal imis-akar ukin-ukin-e-wagwagan-ampagumaloed

yer an-takti-kumalmogo.
⁴⁹ Tegin Pab-pela-pela-kannaled-nikad peyedzhe anka immal imas, tenal Pabdin, tule-chwilidikid.
⁵⁰ Tenal Pab tule-ukin-ukin-ampagumaloed-ilbal keg-chulgu wilejakwa tule-egin-atamaloed-tako.
⁵¹ Tegin Pab Tummad aga tukin e-kannaledgin peyedzhe immal imas. Tenal Pabdin tule-tummarba-itolmalad-onis.
⁵² Tegin Pab tule-tummagan-neg-takmamimalad-onos, tule-tummaganga. Tenal Pab Tummad tule-tummarba-itojulmalad-odos, tule-tummadga.
⁵³ Tegin Pab Tummad imme tule-ukul-mesdimalad-imas. Tenal Pab Tummad chunkal-kwabi mani-ibgan-palmisbal.
⁵⁴ Tenal Pab Tummad anmal-tadganga-kaka-ukchadyob immal imas. Al Pab Tummad e-mosmal-Israel-tulemal-pentas. Tenal Pab Tummad kwen igeshzbulbal,
⁵⁵ wilejakwa Abraham tegin e-wagwagan-ukin-ukin-ampagusmalad-takegalbal.
⁵⁶ Tegin María e-kwenad-Elisabet-neggan ni-walapá chii-peszhun. Tegin María kep te-cholbal kannan aga e-negzhe albal.

Juan Bautista mimmilejad

⁵⁷ Tegin Elisabet nuchu-nikued-wilubgan nonigu, machi-toto-nikunoni. ⁵⁸ Tegin Elisabet-kwenamalad tegin e-aimal itosmalgu Pab Tummad peyedzhe wilejakwa Elisabet-takcha, Elisabetpak mes welgusmaldo. ⁵⁹ Tegin Elisabet nuchu-nikujad-ibapábakkin, e-kwenamalad tegin e-aimal Elisabetche nonimal, Moisés-igal-mamikidbal machi-

toto-e-abgan-tuku chikegal. Tegin tulemal-Elisabetche-nonimalad e-pabyob machi-toto-nugzhebi-kualin, Zacarías. ⁶⁰ Tenal machi-toto-e-nan-Elisabet chogal, ede aga e-pabyob machi-kwen-nugzhenejul. Tenal Elisabet chogal: "An-machi nug-kuenab Juan."

⁶¹ Tegin tule-pukmalad Elisabetka chogalmal:
—¿Ibiga pe weob machi-toto nugzhebimal-wede? Imi pe-kwenamalad weob kwen nugzhul-ne.

⁶² Tegin tule-pukmalad chunkalbal machi-toto-e-pabzhe ekichialmal, igi machi-toto-nugzhebi.

⁶³ Tegin Zacarías tulemalzhe chunkalbal akwa-matarra ekichis akwagin nermagal. Tegin tulemal akwa-matarra cheinonimalgu, Zacarías akwagin nermas: "Machi-toto nug-kuo Juan." Tegin Zacarías akal-pakal nuchu nugzhajadbal, tulemal-pel-kwapa weob pakal pesmal. ⁶⁴ Tegidgin Zacarías kannan nabir chunmanonibal. Tegin Zacarías Pab-Tummad-otummoalzhun.

⁶⁵ Tegidgin tule-aka-tikalbal-mamimalad peyedzhe Zacaríasga-ib-kujadbal kwakialmal. Tegin tulemal-Judea-yalaganbal-mamimalad-pel-kwapa Zacaríasga ib-kujadginbi chunmananimalbal.

⁶⁶ Tenal tulemal-pel-kwapa-itosmalad aga ulubgin pinzhedii-pesmal chogalmal:
“¿Imi we machide ibi-tule-wede?” Tenal tulemal takchamaldo Pab-kannaled Juanbak kudii.

Zacarías Pab-Tummad-otummojad

⁶⁷ Imi teun Zacarías pela-pela Pab-Purpa-Nued-nikunonikidbal, kujal-ib-kuoedgin chunmakal chogal:

⁶⁸ Imi Israel-tulemal-e-Pab-Tummad otummodi-kuelen, nabirinye.

- Imi Pab Tummad kannan aga
e-tulemal-ololchasmalye.
- ⁶⁹ Tenal Pab Tummad
e-mos-David-e-wagwabal
tule-pela-pela-kannaledged-
nikad-palminoni
animal-abonogalye.
- ⁷⁰ (Imi Pab Tummad akpene
e-kaka-palchogmaladbal
chogzhagusmo, kujal immal
weopí kunonikoye.)
- ⁷¹ Tenal Pab Tummad tule-
animalbak-aichulmalad-akar
animal-abonogo,
tegin tule-istar-animal-
takmalad-akar
animal-abonobalye.
- ⁷² Imi Pab Tummad animal-
tadganga chogzhabal
ede wilejakwa
animal-tadgan-takoye.
Tegin Pab Tummad animal-
tadganbak aga napírra
igal-mezhijad pal kwen
igeojul-kuoye.
- ⁷³ Tenal we igal-megwijad,
Pab Tummad aga e-nuggin tad-
Abrahamga kaka-ukcha,
ede keg-chulgu we igal
imakenabye.
- ⁷⁴ Tegin Pab Tummad
kaka-ukchabalye,
tulemal-animalbak-aichulmalad-
akar animal-abonogo,
tegin Pab Tummad
animal-pentako,
animal tobzhulidgin
Pab Tummadga
immal-imamalgalye,
- ⁷⁵ tenal animal chwilidikidgin
tegin animal inniki-naneedgin
Pab Tummadga tula-tio,
animal purkwedzhey.
- Tegin Zacarías chogalbal:
- ⁷⁶ Tenal pe-an-machi nugshaoye,
Pab-Pul-Tummad-e-kaka-
palchogedye.
Imi pedin, Pab-iktual Pabga
igal-nudane
- ⁷⁷ e-tulemal wisgunonimalgal
Pab-tule-iskued-eliedbal
- Pab-tule-abonoged-igal igi
maiye.
- ⁷⁸ Tenal Pab-anmal-pilaledgin
peyedzhe wilejakwa
anmal-taknonye.
Al Pab-tule-palmied
nikpa-akar noniko,
neg-oipojadgin tad
neg-otalonaidyobye.
- ⁷⁹ Tenal Pab-tule-palmied
nonibalo
tule-Pab-wichulmalad
tegin tule-purkwed-tobmalad
Pab-wisgumalgal,
tagdwa tule-neg-chichidgin-
mamimaladga
neg-otalogedyobye.
Tenal Pab-tule-palmied
nonibalo animal-pentagal
animal ulubgin-akalzhul-
itoged-igal amigalbalye.
Tenal teun Zacarías weob
Pab-otummosdo.
- ⁸⁰ Tegin machi-Juan tunkualgu,
purpal kannaledged nikunoni. Tegin
Juan neg-nikchulidbal megwis,
Pab-igalgin Israel-tulemalga-
chunmaked-wilub-omoedzhe.
- Jesús mimmilejad**
(Mateo 1:18-25)
- 2** Imi teun Jesús ampayo
mimmilegeddu, Romano-e-
sagla-César-Augusto igal-onononi
pel-kwapa Romano-napa-naid-
ugakche tule-pukmalad-nug
weigal. ²(Tenal tule-nug-weileged
naigunonikidgin, Cirenio Siria-
napkin gobernadorga maiun
nug-weileged-keped naigunoni.)
³Tenal teun takalgu, César-Augusto
igal-mezhisdo, tule-pel-kwapa aga
neg-kweburzhe neenabmal aga nug
mesnegal. Al tulemal-pel-kwapa
aga e-neg-kweburzhe nadmalzhuun
nug mesgal.
- ⁴Imi teun José Nazaret-Galileagin
maimo. Tenal José-e-tadgan
Errey-David-choggu, al David-neg-
kweburzhe nadmo, Belén-Judeaje.
⁵Tenal teun José Marábak aga

kaka-ukchamal aga nikumalgal. Al José Maríabak mes Belénzhe nadmalzhun nug mesnegal. Tenal teun María Belénzhe ponigwal-kwichi-nad.

⁶Tenal María Beléngin-chiidgin nuchu-nikued-wilubgan Maríaga noni. ⁷Tenal tulemal-Belénzhe-ichejul-nonimaladbal kabed-neg pel algus, al María moli-neggin nuchu-keped-nikunonijun. Tegin María nuchu-nikunonigu, chamolgin aga machi-toto-ebirmas. Tegin María moli-mas-kunned-e-ulgin machi-toto-mezhiszhun.

Pab-angelmal tule-oveja-takpukmaladga chognonikid Jesús mimmiles

⁸Imi teun takalgu, Belén-tikalbal tule-oveja-takmalad mutik oveja-pukwadgin oveja-takpukmal. ⁹Tegidgin Pab-angel tule-oveja-takpukmaladga arpak nononi. Tegin Pab-yer-takleged tule-oveja-takpukmaladginbi ibegwäl neg otalononi. Tegidgin tule-oveja-takpukmalad peyedzhe kwakialmalzhun. ¹⁰Tegin angel tule-oveja-takpukmaladga chogal:

—Pemal melle tobgumalma. Imi antin pemalga kakapurwa-nued cheidani tulemal-pel-kwapa welgumalgal. ¹¹Imis David-neg-kwebur-Beléngin pemalga tule-abonoged mimmilenoni. Tenal we tuledin Cristo-Pab-apene-chogzhad-palmidagoed, tenal wedin, Pül-Tule-Tummad. ¹²Tenal an wisgal pemalga chogdo: imi pe we machi-toto-mimmilejad pe taknadel, moli-mas-kunned-e-ulgin pe taknatapo chamolgin-ebirmakal-mai.

¹³Tegin angel-kepe-nonikid ampa chunmanaidgin, arpakaal Pab-angelmal-íchejul nikpa-akar nononimalmo tegin Pab-Tummad-otummoalmal, chogalmal:

¹⁴Imi Pab Tummad immal-nued-imajadbal

nikpa-neggin
e-nug-otummoledi-kuo,
tegin iti-napkin Pab-nued-
tulemal-takmalad ulubgin
akalzhul-itonomimalbalo.

¹⁵Tenal angelmal kannan nikpa aknakwidmalgu, tule-oveja-takpukmalad aga emal-emal chogalmal:

—Tegin nemaldo Belénzhe, Pab-angelbal-anmalga-chognonikid taknegal.

¹⁶Tegin tule-oveja-takmalad abarmakal-abarmakal Belén-neg-kweburzhe nadmalzhun. Tegin tule-oveja-takmalad Belén omosmalgu, taknatapmal María Josébak pukwamal, tenal machitodin moli-mas-kunned-ulgin mai.

¹⁷Tegin tule-oveja-takmalad machi-toto-takchamalad-cholbal, tule-pimaladga chogzhamal, Pab-angel machi-totogin emalga chunmajad. ¹⁸Tegin tulemal tule-oveja-takmalad-ega-chogzhaditosmalgu, weob pakal pesmal. ¹⁹Tenal Maríadin aga ulubgin pél immalmal-kujadgin pinzhedii-pes.

²⁰Tegin tule-oveja-takmalad kannan nadmalgu, pél immal takchadbal, pél immal itojadbal, tegin pél emalga immal kujadbal Pab-Tummad-otummoé tegin Pab Tummadga tog-nuedi-choge nadmal.

María tegin José Pab Tummadga Jesús-ukchad

²¹Tegin machi-toto-mimmilejad ibapábakkin machibi abgan-tuku chikchamal tegin nugzhasmal Jesús. Tenal machi-nug-kunonikiddin, María-ampayo-ponigwal-kwisqueedu angel Maríaga chognonigujad.

²²Tegin María nuchu-nikujad-akar aktesgu, Moisés-igal-mamikidyob chwilimakal aga imajogal. Tenal teun takalgu, machi-toto-e-pabgan Jerusalénzhe Moisés-igal-mamikidbal Jesús-chesmal

Pab Tummadga ukegal. ²³Tenal Pab Tummad Moisésbal chogzhado:

Imi tule kepe
machi-nikunonikil,
keg-chulgú Pabga machi-ukenab,
Pabgadgabi kugal.

Ex. 13:2,12,15

²⁴Tenal María aga tukin Pabga-immal-ukegal nadmo, Pab igal-mezhijadyob. Tenal Pab-igal chogdo:

Imi ome nuchu-nikujal,
Pabga keg-chulgú kwabo
nu-chapur-ukenab, o chulil,
kwabo wag-nu-ukenab.

Lv. 12:6-8

Simeón Jesús-takchadbal Pab-Tummad-otummojad

²⁵Imi teun takalgu, tule-walgwen Jerusaléngin mai. Tenal we tuledin nug Simeón. Tenal Simeóndin tule-napírragwad tegin Pab Tummadgín pirkín pinzhebal. Tegin Simeón Israel-neg-kwebur-pentakoed abintadii tenal Pab Purpa Nued Simeónbak pela-pela kudibal. ²⁶Tenal Pab Purpa Nued akpene Simeónga chogzhagusdo: “Imi pedin ampayo purkweddu, pe Pab-akpene-chogzhad-palmidagoed-tule-takenab.”

²⁷Tegin Pab Purpa Nued Simeónches, Pabzhe-koled-negzhe. Tenal teun Jesús-e-pabgan Pabzhe-koled-negzhe Jesús-cheinonimalmo Moisés-igal-mamikidbal immal-imagal. ²⁸Tenal Simeón Jesús-takchagu, chugnukwa Jesús-kas, tegin Pab-Tummad-otummoal-chogal:

²⁹Pab Tummadye,
imi antin pe-mosye.
Tenal pedin akalzhul an-opuruko
pe akpene anka chogzhadyobye.

³⁰Imi antin imial
tule-abonoged-takcha-choggú,
al an weligwal itononiye.
³¹Tenal pedin tule-abonoged-amis,
tulemal-pel-kwapa-akal-akal-pukwad-wagin

³²Judiojulmalad wisgumalgal
pe ibi-tuleye,
kallen neg-chichidgin

neg-otaloedyobye.
Tegin we tule-abonogedbal
Israel-tulemal-nug
otummoledi-kuoye.

³³Tegin Simeón Jesúsgin
chognaigualgu, machi-toto-pabgan
weob pakal pesmal. ³⁴Tegin Simeón
Jesús-pabganga chogal:

—Imi Pab Tummad pemalga
immal-nuegan imakelen, nabirinye.
Tegin Simeón machi-e-nan-Mariaga chogbal:

—Imi we machi chules Israel-napkin ichejul tulemal-tummaganga-mamikid-onogal, tegin tule-tummaganga ichejul tule-pinchemalad-odogbal. Tenal machi-toto wilubgan-oyogal noni Pab Tummad nabir tule-abonogo. Tenal tulemal istar machi-taknonimalo. Tegin tulemal istar machigín chunmanonimalbalo.

³⁵Tenal we machi-totobal mag taklenonimalo tulemal-ichejul igit ulubgin pinzhedimal. María, pedin peyedzhe pukib-itononimogo, tule-es-pilacheedgin-eyurulejadbal nunma-itononikoedyob.

³⁶Imi teun takalgu, ome-walgwen Pab-kaka-palchoged-Ana-nugad chimo. Tenal we Anadin Fanuel-e-chiskwa, Aserzhik-akar tanimal. Tenal Ana yer chelgu. Tenal Ana apka yaegin machered-nikusgu, unnila pirkakugle aga e-macheredbak wis nanas. Tegin Ana-e-machered purkwenoni.

³⁷Tenal Ana e-machered-purkwed-akar walgwen tii-pes, machered-pal-kwen-nikuszul-kus. Tenal imisgwadzhe Ana e-chelgued pirka-tulabake-kakabake nika. Tenal Ana pane-pane Pabzhe-koled-neggin chigu, tegin Pabzhe-koled-neg-akar pal noszul-kus. Tenal Ana ibgin-mutik mas-kunchulidgin tegin Pabzhe-koledgin Pab Tummadga-maidbal pela-pela Pab-otummodi-kusbal.

³⁸Tegin Simeón ampa Maríabak chunmanaídgin, Ana María-chiídze kwisgunonimo. Tegin Ana kep Pab Tummadga tog-nuedi chogalzhun. Tegin Ana pel-kwapa tule-Pab-Jerusalén-abonoged-abintabukmaladga we machi-totogin chunmakalzhun.

³⁹Tegin José tegin María Pab-igal-mezhijadyob pél immal-imasmalgu, kannan nadmalbal Provincia-Galileaje, e-neg-kwebur-Nazaret-nugadzhe. ⁴⁰Tenal machi-Jesús chana nued tunkual, tegin we machi pinzheed-nika, tegin Pab-Tummad-yer-kin-pinzheed machi-Jesúsbak kudigusbal.

Jesús Pabzhe-koled-neggín pejad

⁴¹Tenal Jesús-e-pabgan pirka-ilbal keg-chulgú naddamal, Jerusalénzhe Pab-Najad-Ibe-Itoged itogal. ⁴²Teun Jesús-e-pabgan kusgu Pab-Najad-Itogedgin nane-choggu, al Jesús pirkaambe-kakabog-nikadgin aga e-pabganbak Jerusalénzhe nadmo Pab-Najad-Ibe-Itoged-itogalmo.

⁴³Tegin Pab-Najad-Ibe-Itoged pél nasgu, Jesús-e-pabgan kannan negzhe almalbal. Tenal machi-Jesúsdin Jerusaléngin pes. Tenal Jesús-e-pabgan kwen wichulmal Jesús Jerusaléngin pejad. ⁴⁴Tegin Jesús-e-pabgan ebinzhasmaldo Jesúsde tulemalbak e-iktual nad. Tegin Jesús-e-pabgan ibagwen-nanajadgin kep e-kwenamaladzhe tegin e-aimalzhe aga e-machi-Jesús-ekichial, Jesúsde pia nad. ⁴⁵Tenal Jesús-e-pabgan Jesús-kwen-onoszhul-kus. Al Jesús-e-pabgan kannan Jerusalénzhe nadmalbal Jesús-amigal.

⁴⁶Tegin Jesús-e-pabgan kannan Jerusalénzhe nonimalgu, kep te pangin Pabzhe-koled-neggín tummagan-pukwad-abalgin Jesús-onosmal. Imi teun takalgu, Jesús tummagan-tulemal-oturdananimalad-

itojii tegin tummaganzhe immal ekisaibal. ⁴⁷Tegin tummagan-Jesúszhe-immal-ekisnaidgin Jesús mag-immal-itogedbal, yer tummagan-abinchus. Al tulemal-pel-kwapa-itobukmalad Jesús-yer-immal-chogzhadbal weob pakal pesmal.

⁴⁸Tegin Jesús-e-pabgan takchagu Jesús tummagan-abalgin chii, weob pakal pesmal. Tegin Jesús-e-nan Jesúsga chogal:

—Machi, éibiga pe weob animalima-wede? Imi ani tegin pe-pab pukib-itoged-abalgin pe-aminai, pede igi kus-dewa.

⁴⁹Tegin Jesús aga e-nanga chogal: —¿Ibiga pe an-aminanimal-ade? ¿Pe wichulzhí antin, an-Pab-neggín chiid-wilub?

⁵⁰Tenal Jesús-e-pabgan akutitosmal Jesús ega ibi chogzhad.

⁵¹Tegin Jesús aga e-pabganbak mes Nazaretche nadzhun. Tenal Jesús Nazaretkin-maidgin aga e-pabgan-ulpallí nanedi-kus. Tenal Jesús-e-nan pél immal-kujadgin aga ulubgin pinzhedii-pes.

⁵²Tegin Jesús chana-nued tunkumaigus. Tegin Jesús ibe-ilbal yer pinzheed nikumai-kusbal. Tegin tulemal tegin Pab Tummad pane-pane pul yer Jesús-takti-kusmalbal.

Juan Bautista neg-nikchulidbal chunmadi-kujad

(Mateo 3:1-12; Marcos 1:1-8;
Juan 1:19-28)

3 Imi teun takalgu, César-Tiberio Romano-tummadga-togzhad-akar, pirkaambe-kakaatal kudani. Tenal teun Poncio-Pilato Provincia-Judeagin gobernadorga maimo. Tenal Herode Provincia-Galileagin gobernadorga maimo. Tenal teun Herode-e-urpa-Felipe Provincia-Itureagin tegin Provincia-Traconitegin gobernadorga maimo. Tenal teun Lisanias Provincia-Abiliniagin gobernadorga maimo. ²Tenal teun Anás tegin Caifás

tule-irwal-Pabzhe-kolmalad-pul-tummadga maimo.

Imi teun takalgu, Zacarías-machi-Juan-Bautista neg-nikchulidbal-maidgin, Pab Tummad Juan Bautistaga chunmanoni.³ Tegidgin Juan Bautista nadzhun Jordán-tiwalzhik. Tegin Juan Bautista tulemalga chogalzhun: "Imi pemal aga ulubgin iskuedgin pukib-itogenabmal, tegin pe-taed ogwaenabmal. Tegin pe tigin oglegenabmalbal, Pab Tummad pega iskued-nikad eligal."

⁴Tenal teun Juan Bautistagin weob immal-kunaid akpene Pab-kaka-palchoged-Isaías nermajadyob kunoni. Tenal teun Isaías chogzhero:

Imi neg-nikchulidbal tule-walgwen kolmakal-kolmakal chunmanoniko:

"Imi pemal Tule-Tummadga neg nudakenabmal, tegin pe Tummadga inniki-inniki igal imakenabmalbal.

⁵Tegin pe neg-kullu-kullu-takleged enzheenabmal, tegin pe yal-murre-murre-taklemalad omataroenabmal, Tegin pe igal-ebiral-mamimalad inniki-inniki onoenabmal, tegin pe igal-mullu-mullu-taklemalad chwili imakenabmalbal.

⁶Tegin kep tulemal-pel-kwapa Pab-tule-abonoged-mag-taknonimalo."

Is. 40:3-5

⁷Tegin Juan Bautista pél chunmasgu, tulemal Juanzhe nonimal, Juande tigin e-ogmalgal. Tegin Juan tulemalga chogal: "Pemal nia-wagwagan, itoa pemalga chogzha-ade tigin-oboedbal Pab-peyedzhe-tule-oturdakoed-akar abonolego? We tigin oboedbal tule-kwen-abonogojul-kuo.⁸ Tenal pemal nued-naneebal tulemalga aga oyogenabgwel,

pemal chunchunnad aga ulubgin iskuedgin pukib-itononimal.

"Tenal pemal melle chogdamalo: 'Abraham an-tad-sagla-choggú, al an akalzhul yozhagu nanao.' Tenal an chunchunnad pemalga chogdo: imi Pab Tummad chunna nabir we akwamal opinno Abraham-e-wagwanga kugal. Al Pab Tummad pemal-kwen-napijul Abraham-wagwanga kugal.

⁹"Imi Pab Tummad kuakwa mai sapejul tule-nuekwá-nanejulmalad-oturdagal, tule chapi-keg-chanmaked-chalgin akan-kani-kwichidyob, kuakwa chapi olegal. Tenal Pab peyedzhe pel-kwapa tule-iskana-oturdako, chapi-keg-chanmaked keg-chulgu olaodetyob tegin chogin chapi-okummakoeddyobbal."

¹⁰Tegin tule-itobukmalad Juanzhe ekichialmal:

—¿Tegil animal ibi imakenabzhun?

¹¹Tegin Juan tulemalga chogal: —Imi pe yogal-koabo nikamalal, tule-yogal-nikchulmaladga pe kogwen ukenab. Tegin pe mas-kunned nikamalal, tule-mas-kunned-nikchulmaladga pe mas-kunned ukmalbalo.

¹²Tegin tule-Romano-tummadga-tulemalgin-mani-egwanmalad Juanzhe nonimalmo. Tenal we tulemal Juanzhe ekichialmalmo:

—¿Tule-oturdaked, animal ibi imakenabmalmo?

¹³Tegin Juan we tulemalga chogalmo:

—Pemal melle tulemalgin wilub-okpis mani pal egwanmallo, unnila igal-mamikidyob pe tulegin mani egwanmallo.

¹⁴Tegin chulubmal Juanzhe nonimalmo, Juanzhe ekichialmalmo:

—¿Anmal, ibi imakenabmalmo?

Tegin Juan chulubmalga chogalmo:

—Imi pedin melle kantikidgin tulemalgin pal immal idiro. Tegin pe melle tulemalgin kakanzheedgin

tule-tummaganga immal-chogo. Tegin pe mani-kanaidgin pe yer itogenabmalbal.

¹⁵Tegin tulemal-pukmalad kuakwa abintabukmal, Juande ega chogdago-dewa, ede Pab-akpene-chogzhad-palmidagoed-tule.
¹⁶Tenal Juan tulemalga chogalzhun:

“Tenal antin tiginbi unnila tule-og, oyagal pemal ulubgin chunchunnad iskuedgin pukib-itonanimal. Tenal tule-an-cholbal-tanikoed anka pul kannaled nika. Tenal we tule anka pul tule-tummadiibal, an kwen unnijul targa kutar-tub echikkal. Tenal tule-an-cholbal-tanikoed Pab Purpa Nuedgin tegin chogin pe-ognonimalo.

¹⁷“Tenal tule-an-cholbal-tanikoed kuakwa kwichi pis-pis tulemal-upregal, tule pala-azhaled-kanikidgin trigo-omigal kuakwa kwichidyob. Tegin tule-an-cholbal-tanikoed Pab-neggan tule-nuegan-odogo, tule kwapí aga trigo-kwa chaboedyob. Tegin tule-an-cholbal-tanikoed cho-keg-akinnedgin tule-iskana-upro, tule chogin kummagal trigo-e-uka urpoedyob.”

¹⁸Tegin Juan pél chunmasgu, ichejul akal-akal tulemal-uanaisbal tegin Juan tulemalga Pab-kaka-nuegangin chunmadi-kusbal.

¹⁹Imi teun takalgu, Herode e-upra-Felipegin ome-Herodías-egwas. Al Juan Herodega pakal-pud chogzhagusdo: “Imi pedin noal kudii. ¿Ibiga pe aga urpa-Felipegin ome-Herodías-egwas-wede? Imi animalga igal weob kwen maichul.” Tegin Juan Herodega Herode-immal-akalodiid pél chogzhabal.
²⁰Tenal Herode ukin immal akalodiidal, oturdaleged-neggan Juan-odos.

Juan tigin Jesús-okchad (Mateo 3:13-17; Marcos 1:9-11)

²¹Tenal Juan Bautista ampa tigin tulemal-ognaidgin, Juan

tigin Jesús-okchamo. Tegin Jesús-Pabzhe-kolnaidgin arpak nikpa-neg arkat-nad.²²Tegidgin Pab Purpa Nued Jesúsgin nuyob aktenoni. Tegin Pab Tummad nikpa-neg-akar kolnoni, Jesúsga chogal:

—Imi pedin an-Machi-Pilaled, tegin an pegin weligwal-ito.

Jesús-tadgan ampagusmalad (Mateo 1:1-17)

²³Tenal teun Jesús pirkatulagwen-kakaambe-nikadgin kep Pab-igalbal tulemal-oturdakalzhun. Tenal tulemal ebinzhasmal Jesúsdse José-e-machi.

Tenal Josédin Elí-e-machi.

²⁴Tegin Elídin Matat-e-machi.

Tegin Matattin Leví-e-machi.

Tegin Levídin Melqui-e-machi.

Tegin Melquidin Jana-e-machi.

Tegin Janadin José-e-machi.

²⁵Tegin Josédin Matatías-e-machi.

Tegin Matatíasdin

Amós-e-machi.

Tegin Amósdin Nahúm-e-machi.

Tegin Nahúmdin Eslí-e-machi.

Tegin Eslidin Nagai-e-machi.

²⁶Tegin Nagaidin Maat-e-machi.

Tegin Maatdin,

Matatías-e-machi.

Tegin Matatíasdin

Semei-e-machi.

Tegin Semeidin Josec-e-machi.

Tegin Josecdin Judá-e-machi.

²⁷Tegin Judádin Joanán-e-machi.

Tegin Joanándin Resa-e-machi.

Tegin Resadin

Zorobabel-e-machi.

Tegin Zorobabeldin

Salatiel-e-machi.

Tegin Salatiel�in Neri-e-machi.

²⁸Tegin Neridin Melqui-e-machi.

Tegin Melquidin Adi-e-machi.

Tegin Adidin Cosam-e-machi.

Tegin Cosamdin

Elmadam-e-machi.

Tegin Elmadamdin Er-e-machi.

²⁹Tegin Erdin Josué-e-machi.

Tegin Josuédin Eliezer-e-machi.

Tegin Eliezerdin Jorim-e-machi.

Tegin Jorimdin Matat-e-machi.
 Tegin Matattin Leví-e-machi.
³⁰ Tegin Levídin Simeón-e-machi.
 Tegin Simeóndin Judá-e-machi.
 Tegin Judádin José-e-machi.
 Tegin Joséédin Jonam-e-machi.
 Tegin Jonamdin
 Eliaquim-e-machi.
³¹ Tegin Eliaquimdin
 Melea-e-machi.
 Tegin Meleadin Mena-e-machi.
 Tegin Menadin Matata-e-machi.
 Tegin Matatadin
 Natán-e-machi.
 Tegin Natándin David-e-machi.
³² Tegin Daviddin Isaí-e-machi.
 Tegin Isaídin Obed-e-machi.
 Tegin Obeddin Booz-e-machi.
 Tegin Boozdin Sala-e-machi.
 Tegin Saladin Naásón-e-machi.
³³ Tegin Naásondin
 Aminadab-e-machi.
 Tegin Aminadabdin
 Admin-e-machi.
 Tegin Admindin, Arni-e-machi.
 Tegin Arnidin Esrom-e-machi.
 Tegin Esromdin Fares-e-machi.
 Tegin Faresdin Judá-e-machi.
³⁴ Tegin Judádin Jacob-e-machi.
 Tegin Jacobdin Isaac-e-machi.
 Tegin Isaacdin
 Abraham-e-machi.
 Tegin Abrahamdin
 Taré-e-machi.
 Tegin Tarédin Nacor-e-machi.
³⁵ Tegin Nacordin Serug-e-machi.
 Tegin Serugdin Ragau-e-machi.
 Tegin Ragaudin Peleg-e-machi.
 Tegin Pelegdin Heber-e-machi.
 Tegin Heberdin Sala-e-machi.
³⁶ Tegin Saladin Cainán-e-machi.
 Tegin Cainándin
 Arfaxad-e-machi.
 Tegin Arfaxaddin Sem-e-machi.
 Tegin Semdin Noé-e-machi.
 Tegin Noédin Lamec-e-machi.
³⁷ Tegin Lamecdin
 Matusalén-e-machi.
 Tegin Matusaléndin
 Enoc-e-machi.
 Tegin Enocdin Jared-e-machi.

Tegin Jareddin
 Mahalaleel-e-machi.
 Tegin Mahalaleeldin
 Cainán-e-machi.
³⁸ Tegin Cainándin Enós-e-machi.
 Tegin Enósдин Set-e-machi.
 Tegin Settin Adán-e-machi.
 Tegin Adándin
 Pab-Tummad-tar-opinnijad.
 Tenal Jesúsdin weob
 tadgan-nikusdo.

**Neg-nikchulidbal nia-sagla
 Jesús-wilub-takchad**

(Mateo 4:1-11; Marcos 1:12-13)

4 Tegin Jesús Jordán-ti-akar
 nakwisgu, pela-pela Pab-
 Purpa-Nued-nika-nad. Tegin
 Pab Purpa Nued Jesús-cheszhun
 neg-nikchulidbal.² Tenal neg-
 nikchulidbal nia-sagla iba-tulabo
 Jesús-wilub-takti-kus. Tenal teun
 Jesús mas kwen kunchul-kudigus.
³ Al Jesús ukul-chaalgu, nia-sagla
 Jesúsga chogal:

—Imi Pe-Pab-Machile, pe we
 akwamalga chogo: ‘Maduga pinno.’

⁴ Tegin Jesús niaga chogal:

—iChulá! Imi Pab-kartagin
 nermakal maido:

 Imi tule mas-kunnedginbi
 kwen tuladijul,
 ((tenal tule Pab-kaka-itogedbal
 tula-kudimal)).

Dt. 8:3

⁵ Tegin nia-sagla yala-tummad-
 pirzhe Jesús-chesbal. Tegin
 nia-sagla Jesúsbak yal-pir omosgu,
 nia-sagla ilgwén-oyoal pel-kwapa
 napa-naid-ugakche Jesúsga neg
 oyos. ⁶ Tegin nia-sagla Jesúsga
 chogbal:

—Imi we neg-kweburgan-an-
 pega-oyojad, pel-kwapa anka
 ukles-choggú, al an akalzhul pega
 ukmogo, tegin neg-kweburgan-
 immalmal-nuegan-nikad an
 akalzhul pega pél ukmogo. ⁷ Tenal
 pe Pab Tummadyob pe an-
 otummoel, an kep pega pél uko.

⁸ Tegin Jesús nia-saglaga chogal:

—Pinche pe koltima. Tenal Pab-Tummad-kartagin nermakal madio:
Pab Tummadbi pe Pab

Tummadyob otummogenab,
tegin pe Pab Tummadgabi pe
immal imakenabmalbal.

Dt. 6:13

⁹Tegin nia-sagla Jerusalénzhe Jesús-chesbal. Tegin Jerusalén-omosgu, nia-sagla Pabzhe-koled-neg-uwas-pirzhe Jesús-onakwis. Tegin nia-sagla Jesúsga chogbal:

—Imi pe Pab-Machile, pe we-akar napche ichomado. Tenal pedin kwen akalguojul. ¹⁰Imi Pab-kartagin nermakal madio:

Pab Tummad aga
e-angelmalga chogo
pe-takegal.

¹¹Tenal pe arkwatel, angelmal chugnukwa pe-kanonimalo, pe melle akwagin nag-kolgal.

Sal. 91:11-12

¹²Tegin Jesús nia-saglagá chogbal:

—Nabir pe chogendo, tenal Pab-kartagin chogbaldo:

Pe melle Pab-Tummad-wilub-tako.

Dt. 6:16

¹³Tegin nia-sagla takchagu ede iskuedgin keg Jesús-egwangus, Jesús-akar ilgwen nadzhun. Tegin nia-sagla untar Jesúsgin wis owelenonijun.

Tulemal Nazaretkin

Jesús-kwen-abingashzhulmalad

(Mateo 13:53-58; Marcos 6:1-6)

¹⁴Tegin Jesús pela-pela Pab-Purpa-Nued-kannaled-nikadgin Galileaje nonigu, tulemal pel-kwapa neg-kweburgan-ilbal Jesúsgin chunmaked-kibi-kualmal. ¹⁵Tegin Jesús Judio-ormaked-negmal-ilbal Pab-igalgan tulemal-oturdadi-kual. Tenal tulemal-pel-kwapa Jesús-nug-otummoalmal.

¹⁶Tegin Jesús aga e-tunkujad-neg-kwebur-Nazaretche nonibal. Tenal Jesús kusgu Judio-

ormaked-negzhe nane-choggú, al ulukued-ibe-naigunigu, Jesús Judio-ormaked-negzhe tognoni Pabzhe kolgal. Tegin Jesús kwisgu Pab-karta apchogal. ¹⁷Tegin tulemal Jesúsga Pab-kaka-palchoged-Isaías-e-karta cheinonimal. Tegin Jesús karta egasgu, epad-epad imas, nermakal-naidzhe, chogal:

¹⁸Pab Purpa Nued ankin mai.

Al Pab an-nugzhas
tule-wiledimaladga
e-kaka-nuegangin
chunmagal.

Tegin Pab an-palmialbal tule-kalesbukmaladga choggal:
“Pedin akalzhul noo.”

Tegin an nonibal tule-aku-atamalad mag atamalgal. Tegin Pab an-palmialbal tulemal-chabzhul-kunanimalad-onogal.

¹⁹Tegin Pab an-palmialbal tulemalga choggal:
“Imi pirká naigunoni, Pab wilejakwa tule-takegal.”

Is. 61:1-2

²⁰Tegin Jesús Pab-karta apchosgu, ebirmasbal. Tenal Jesús chowal-ibed-tummadga kannan Pab-karta ukchabal. Tegin Jesús kep chigwizhun tulemal-oturdagal. Tegin tulemal-pel-kwapa-pukmalad nue Jesús-takpuk-pesmal Jesúsde igi chunmadago-dewa. ²¹Tegin Jesús chunmakalgu, chogal:

—Imi akpene Isaías Pab-kartagin chogzhad, imis pemal-abalgin sanal kunoni. Imi antin, an Isaías-an-kin-chogzhad-tule.

²²Tegin tulemal-pel-kwapa Jesúsgin chogalmal: “Imi we Jesús tule-nued.” Tenal Jesús-yer-chunmajadgin tulemal weob pakal pesmalbal. Tegin tulemal aga emal-emal ekichialmal:

—¿Imi we tulede

José-machijulzhí?

²³Tegin Jesús tulemalga chogal:

—Imi antin, an wisdo, pemal purpal anka chogdamalo: ‘Ina-

tuled, pedin aga tukin poni-nikad nudakenab oyagal, pe tule-immal-wijid.' Tenal an wisbaldo, pemal anka chogdamalbalo: 'Imi pe Capernaum-neg-kweburgin immal-taktijulid imadi-kujadyob pe aga neg-kweburgin keg-chulgu immal-taktijulid imakenabmo.'

²⁴Tegin Jesús chogbal:

"Tenal an chunchunnad pemalga chogdo: imi meke-ibi-Pab-kaka-palchoged aga neg-kweburgin kwen abingelegojul-kuo. Tenal akpene Pab-kaka-palchogmalad kwen abingaleszhul." ²⁵Tenal an chunchunnad pemalga chogdo: imi Elías maigusgu, pirkapá-abal ti kwen wiszhul-kus, tegin maskunned kwen nikchul-kunonibal.

"Tenal teun Israel-napkin omegan-machered-tarbi-purkwismalad ichejul nika.

²⁶Tenal Elías yabli we omegan-machered-tarbi-purkwismaladzhe kwen palmileszhul. Tenal Pabdín wiis ede we omeganzhe Elías-palmijalen, we omegandin Elías-kwen-akojulmalan. Al Pab Sidón-napche neg-kwebur-Sareptaje Elías-palmis, we neg-kweburgin ome-machered-tarbi-purkwijad Elías-akwegal.

²⁷"Teginbal, Israel-napkin Eliseo maigusgu, teun tule-lepra-poni-nikmalad ichejul nika, tenal tule-lepra-poni-nikmalad Eliseogin-kwen-ibzhejulidbal, kwen nuguszhulmal. Tenal Naaman-Siria-napkinedbi Eliseogin-ibzhejadbal lepra-ponigin wis nugus."

²⁸Tegin tulemal-pel-kwapa-Judio-ormaked-negggin-pukmalad Jesús-chogzhad itosmalgu, pela-pela Jesúsgin ulualmal. ²⁹Tegin tulemal kwisgudmalgu, neg-kwebur-akar kantikidgin Jesús-onodmal. Tegin tulemal yal-urchikal-kwichidzhe Jesús-chesmal, kullubal Jesús-egwangal. ³⁰Tenal tulemal yal-urchikal-kwichidzhe nonimalgu, Jesúsgin-kwakijadbal

kullubal Jesús-kwen-egwaszhulmal. Tenal Jesús yabli tulemal-abalgin kannama-nas. Tegin Jesús ilgwen ukin nadzhun.

Jesús tule-nia-nikad-nudajad

(Marcos 1:21-28)

³¹Tegin Jesús Capernaumzhe nad. Tenal Capernaum-neg-kweburdin Provincia-Galileagin chimo. Tegin ulukued-ibe omosgu, Jesús Pab-igalgın tulemal-oturdakalzhun. ³²Tenal Jesús chunchunnad igal-nikadgin tulemal-oturdanaidbal, tulemal weob pakal pesmal.

³³Imi teun takalgu, Judio-ormaked-negggin tule-walgwen-nia-iskana-nikad chimo. ³⁴Tegin nia sapejul tule-okormasgu, chogal:

—Jesús-Nazaretkinedye, čibiga pe animalgin yoledanimo-wede? Pe melle ankin yolema. ¿Pe animal-opelodaniyé? Imi antin pe-wisdo, pedin toatule: pedin tule-chwilidkid, pe Pab-Tummad-nuggin-tanikid-tuleye.

³⁵Tegin Jesús nia-tulegin-maidga chogal:

—Pe yakir kuma. Pe ilgwen we tule-akar noo.

Tegidgin tulemal-pel-kwapa-pukwad-wagin, nia napche tule-olasgu, tule-kwen-nakposzhulidgin tule-akar ilgwen noszhun.

³⁶Tenal tule-takpukmalad-pel-kwapa weob pakal pesmal. Tegin tulemal aga emal-emal chogmal:

—¿Ibi-tule-wede igal-nikadgin-chunmakeddé? We tule igal-nikadgin tegin kannalegedgin nia-iskanaga chogalda: 'Pedin noo! Tegin niamal yabli ilgwen we tule-akar nomal.

³⁷Tegin tulemal-pel-kwapa akne-akne neg-kwebur-ilbal wisgunonimal, Jesús-tulegin-nia-onojad.

Jesús Simón-Pedro-chak-e-ome-nudajad
(Mateo 8:14-15; Marcos 1:29-31)

³⁸Tegin Jesús Judío-ormaked-neg-akar nodgu, Simón-negzhe nad. Tegin Jesús Simón-negzhe tognonigu, taknoni Simón-e-chak-ome pela-pela uged tarmamai. Tegin tulemal-aka-pukmalad Jesúszhe wilenonimal emalga Simón-chak-ome-nudagal.

³⁹Tegin Jesús Simón-chak-abir kwisgunonigu, tullu imas. Tegin Jesús ugedga chogal: “Pe akino.” Tegin uged ilgwen Simón-chak-omega akiszshun. Tegidgin Simón-chak-ome ilgwen kwisgudgu, Jesúsmalga immal chaalzhun.

⁴⁰Tegin neg-chedoalgu, tulemal Jesúszhe pel-kwapa tule akal-akalyemalad-nikmalad-cheinonimal. Tegin Jesús chunkalgin tulemal-ebuged-ilbal pel-kwapa tulemal-nudas. ⁴¹Teginbal, niamax-ichejul tulemalgin-nomamimaladgin kolmakal-kolmakal Jesúsga chogaldamal: “iPedin Pab-Machiye!” Tenal Jesús niagin igal-kas melle e-nug pigal. Tenal niamax nued wismaldo, Jesús Cristo-Pab-akpene-chogzad-palmidagoed-tule.

⁴²Tegin te pangin, Jesús wakur-neg-tale-tale nad, neg-tulenikchulidbal Pab Tummadzhe kolgal. Tegin neg-oiposgu, tulemal takalmal, Jesús taklejul. Tegin tulemal Jesús-aminadmalzhun. Tegin tulemal Jesús-onosmalgu, Jesúsgin igal-kabi-kualmal melle akne negal, e-neg-kweburgin peigal.

⁴³Tenal Jesús tulemalga chogal:
 —Tenal antin neg-kweburgan-pimaladzhe neenabbal
 Pab-neg-takmaidgin-kaka-nuegangin tule-pukmaladga chunmagal. Imi an palmilenoni pel-kwapa tulemalga Pab-kaka-nuegangin chunmagal. Al an pemalbak keg peiel.

⁴⁴Tegin Jesús Provincia-Judeagin Judío-ormaked-negmalgin Pab-igalgin tulemalga chunmadi-kualzhun.

Jesús Simón-Pedrobak chakigin ichejul ua-kajad
(Mateo 4:18-22; Marcos 1:16-20)

5 Tegin te ibagwengin, Jesús Genesaret-mata-kakpal Pab-igalgin chunma-kwichidgin, tulemal-ichejul tunnugwal Jesús-wagliku kubi-kualmal nuekwa Jesús-itogal.

²Tegidgin Jesús walabo ul takcha, ukubgin mamimal. Tenal tule-ul-ibgan ul-yagin kwen pukchulmal, tenal tigin chaki enuknanimal.

³Tegin Jesús ulgin nakwiszhun. Tenal we uldin Simóngad. Tegin Jesús Simóniga chogzha ega tije ul egwano. Tegin Jesús ulgin chigwisgu, ul-akar Pab-igalgin tulemal-oturdakalzhun.

⁴Tegin Jesús tulemalga pél chunmasgu, Simóniga chogal:
 —Nemalma ti-magadbal, wilaje chakigin ua-wis-kanegal.

⁵Tegin Simón Jesúsga chogal:
 —Tummad, animal óipos wegin ua-kananimal, tenal animal yabli ua-kwen-kaszhlul-kusmal. Tenal pe-anka-chogzadbal an kannan chaki opatnebal.

⁶Tegin Simónmal nadmalzhun mata-magadbal. Tegin Simónmal chaki opatismalgu, ichejul ua-kasmalzhun. Tenal Simón ichejul ua-kajadbal, e-chaki pel idirbi-kual. ⁷Al Simón chunkalbal e-pakamaladzhe kocha emal-pentadagal. Tegin Simón-e-pakamalad nonimalgu, ul-walbo-pel ua-engus-ne. Al ulmal toged-naga pes.

⁸Tegin Simón-Pedro takchagu emalde ichejul ua-kas, Jesús-abir chimtinoni. Tegin Simón-Pedro Jesúsga chogal:

—iTummad, pe an-akar nema. Pedin tule-chwlidikid. Tenal antin tule-iskued-nikad!

⁹Tenal Simón ichejul-ua-kajadbal weob pakal pes, tegin e-pakamalad-Simónbak-irmamalad ampa

weob pakal pesmalmo.¹⁰Tenal Simón-e-pakamala ul-pidgin kudimalmogad, Zebedeo-machimal-Jacobo-tegin-Juan. Tenal we tulemal ichejul-ua-kajadbal ampa weob pakal pesmalmo.

Tegin Jesús Simónga chogal:
—Pe anpak-kudiidbal pe melle akal-itoma. Tenal pedin imis-akar ua-kajadyob, pe anka tule-aminemo ankin turdagal.

¹¹Tegin Simónmal kannan ukubzhe ul nazhinonimalgu, ilgwén pél immalmal ebésmal, tegin Jesúsbak nadmalzhun, Jesúsgin turdagal.

Jesús tule-lepra-poni-nikad-nudajad

(Mateo 8:1-4; Marcos 1:40-45)

¹²Imi te ibagwengin Jesús neg-kweburgin kudiidgin, tule-walgwen-noní. Tenal we tule lepra-poni niká. Tegin tule-lepra-poni-nikad Jesústakchagu, askun Jesúabin akmukutap. Tegin tule-lepra-poni-nikad Jesúszhe wilenaigual chogal:

—Tummad, imi antin kwen penzhuldo pedin unni an-nudagal. Tenal pe an-nudabiel, akalzhul pe an-nudakoye.

¹³Tegin Jesús tule-lepra-poni-nikadgin chunkal-mezhisgu, tule-yeedga chogal:

—Imi antin yer itomodo pe-nudagal. Imisgin pe nugudo.

Tegidgin tule-lepra-poni-nikad ilgwén nuguszhun.

¹⁴Tegin Jesús tule-lepra-poni-nika-nadga chogal:

—Imi pedin akalzhul nao, tenal pe melle tule-pimaladga pe palchogo, antin pe-nudas. Tenal pe ilgwén tule-irwal-Pabzhe-kolmaladzhe aga pe-chan oyonao. Tegin pe tule-irwal-Pabzhe-koledaga chogo: ‘Antin nugus.’ Tegin pe chwilidik peigal, Moisés-igal-mamikidbal pe immal chedbaló, Pab Tummadaga ukegal, tulemal wisgumalgal pedin nugus.

¹⁵Tenal Jesús-e-nug pul-ichejul mimilemai-choggu, al tulemal-ichejul Jesúszhe ampagunonidamal Jesú-itogal, tegin Jesús e-poni-nikmalad-nudagalbal.¹⁶Tenal Jesús tulemal-akar naddabal pidzhi Pabzhe kolgal.

Jesús igal-nika tule-iskued eligal

(Mateo 9:1-8; Marcos 2:1-12)

¹⁷Imi te ibagwengin Jesús neg-yabal Pab-igalgin tulemal-oturdanaidgin, Pariseomal tegin Moisés-igalgin-tulemal-oturdamalad-akne-akne-tanimalad Jesú-itobukmalmo. Tenal we tummagán Provincia-Galilea-neg-kweburgan-ilbal nonimal, kwen Provincia-Judea-akar nonimal, kwen Jerusalén-neg-kwebur-akar nonimalmo. Tenal teun Pab-Tummad-kannaled pela-pela Jesúsbak kudimo tule-yemalad-nudagal.

¹⁸Tenal teun takalgu, tulemal kachigin Jesúszhe tule-abgan-purkwaled-nikad-cheinonimalmogan Jesús ega nudagal. Tegin tulemal-e-ai-yeed-cheinonimalad alamasmalan Jesúszhe tule-yeed-odogal.¹⁹Tenal tulemal-íchejul-pukwadbal kwen unniguszhulmal Jesúz-chidzhe tule-yeed-odogal. Al tulemal-e-ai-yeed-cheinonimalad nikpa neg-uwás-mataragwadzhe tule-yeed-onakwismalzhun. Tegin tulemal-yee-e-ai-cheinonimalad neg-uwásgin neg utusmalzhun, tegin Jesúz-chiid-inniki kachigin tule-yeed-odesmalzhun.

²⁰Tegin Jesús takchagu tule-yee-e-ai-cheinonimalad egin kwen penzhulmal, Jesús tule-abgan-purkwaledga chogal:

—An-ai, pe-iskueddin pato pelgus.

²¹Tenal Pariseomal tegin Moisés-igalgin-tulemal-oturdamalad aga ulubgin pinzhealmal: “Ibi-tule-wede, Pab Tummadgin kwen

atajulidgin chunmakeddé? We tule Pab Tummadgin walmas. ¿Toa-tule-adé igal-nika tulega choggal: ‘Pe-iskueddin pato pelgus?’ Pab Tummadbi unnila igal-nikado, tule-iskued eligal.”

²²Tenal Jesús ulubzhe mag tulemal-tak-choggu, al Jesús wiis tule-tummagan aga ulubgin igi pinzhebukmal. Tegin Jesús tule-tummaganga chogal:

—¿Ibiga pemal aga ulubgin an-pengusmal-wede? ²³¿Pemal ebinzhemal antin keg tule-iskued eli? Tenal an we tulega choghal: ‘Pe-iskued pelgus,’ we tulega yabli iskued pelguenab. ²⁴¿Tule-yeed-nudaked o tule-iskued-elied? Pog-pel ibi-puled. Al an unnigujal tule-yeed nudagal, an unnigumogo tule-iskued eligal.

²⁴Al pemal wisgal an-Te-Tule-Chunna iti-napkinga igal-nika tule-iskued eligal, an imisgin we tule-yeed-nudanejun.

Tegin Jesús tule-yeedga chogalzhun:

—Imisgin an pega chog: pe kwisgu, aga pe kachi olma. Imisgin pe negzhe naddo.

²⁵Tegidgin tule-yee-nad tulemal-pukwad-wagin ilgwen nugsu kwisgus, tegin aga kachi cheszhan. Tegin tule-yee-nad Pab-Tummad-otummoe aga negzhe nadzhun. ²⁶Tenal tulemal-pel-kwapa-takpukmalad weob pakal pesmal, tegin Pab-Tummad-otummoalmalmo. Tegin tulemal-takpukmalad keger-takedbal chogalmal:

—Anmal imis immal-taktijulid-keger-takleged takchamal.

Jesús noni tule-iskanaje kolgal Pabbal naigugal

(Mateo 9:9-13; Marcos 2:13-17)

²⁷Tegin Jesús tule-nudajad-cholbal, kep we neg-akar nadzhun. Tegin Jesús natapidgin tule-walgwen-Leví-nugad-

taknoni, Romano-tummadga mani-egwaned-neggin chii tulemalgin-mani-egwanchii. Tegin Jesús Levíga chogal: —Anpak nemalma, ankin turdagal.

Tegin Leví Jesúsga chogal: —Tegil nabirde.

²⁸Tegin Leví kwisgudgu, ilgwen pél immalmal ebés, tegin Jesúsbak nadzhun Jesúsgin turdagal.

²⁹Tegin Leví aga e-neggin ichejul mas-kunned onos, Jesús-otummogal. Imi teun, tule-Romano-tummadga-mani-egwanmalad-ichejul tegin tule-iskana-pimalad-ichejul Leví-neggin Jesúsbak mes mas kunnonimalmo. ³⁰Tenal Pariseomal tegin Moisés-igalgin-tulemal-oturdamalad-Pariseomalzhik-naigusmalad Jesús-e-chapinganzhe ulualmal chogalmal:

—¿Ibiga pemal tule-Romano-tummadga-mani-egwanmaladbak tegin tule-iskued-nikmalad-pimaladbak mes mas kunpukmal-wede? Wedin ib-nuedzhul.

³¹Tegin Jesús Pariseomalga chogalzhun:

—Imi tule-yemaladdin, ina-tuled-napimal. Tenal tule-poni-nikchulmalad ina-tuled-kwen-napijulmal. ³²Tenal antin ina-tuledyob noni, tule-iskued-nikmalad-amigal aga e-taed ogwagal. Tenal an nonijul tule-nuegan amigal.

Igal-pin igal-cheredbak keg kued

(Mateo 9:14-17; Marcos 2:18-22)

³³Tegin tule-wal-walgwen Jesúszhe ekisnonimal chogalmal:

—Imi Juan-chapingan tegin Pariseo-chapingan peyedzhe mas-kunchulidgin tegin Pabzhe-koledgin nanemal, tenal pe-chapingandin mas kunmal tegin kobed kobmalbal.

¿Ibiga pe-chapingan mas-kunchulidgin keg nanemalmo?
³⁴Tegin Jesús tulemalga chogalzhun:

—Nabir. Tenal an pemalga purpal chogdo: ¿imi tule ome-nikunail, machi-ome-nikuneed ampa chiidbal, tule-irmanonimalad mas-kunchulkuo pe ebinzhe? Chulá.³⁵Tenal machi-ome-nikuneed tulemal tarbi chesmalal, we tulemal mas-kunchulidgin kep nanadamalo. Imi tulemal an-chesmalal, kep an-chapingan mas-kunchulidgin nanadamalmogo.

³⁶Tegin Jesús tulemalga purpal chogalbal:

—Imi tule mol-mukwagin mol-koä-pin kwen matamajulmal. Tenal tule mol-mukwagin mol-koä-pin-matamakelen, mol kaledel, pinche mol-pin izhooen, tegin mol-koä-pin mol-mukwagin-naigujadistar-taklebaloen.

³⁷Tegin Jesús purpal immal-pid chogalbal:

—Imi pemal wismal puglu-moli-ukagad ilkwénnna wis ebule inna chigal. Al tule keg ku puglu-ebugaledgin inna-kabil-pin chigal. Tenal tule an-chogzhadyob imakelen, inna-pin kakpi-kudel, puglu-ebugaledgin arpídel, ilgwen marroen. Tegin inna-kabil pél perienguoen tegin puglu-moli-ukagad iskubaloen.³⁸Al tulemal puglu-moli-ukagad-pingin inna-kabil-pin chimal. Al tule-igal-pin igal-cheredbak keg kumo.

³⁹Tegin Jesús purpal immal-pid chogalbal:

—Imi tulemal kakpi-pakal-inna-kobzhadbal, inna-ochigwad pal kwen kobbijul-kudago, pul-yer inna-kakpid itojadbal. Al tulemal pul-yer igal-chered takmaladbal yapa igal-chered ebebi-kudamalo.

Teun Jesús weob chogzhagusdo.

Jesús chogzhagujad ede ulukued-ibe-e-ibedga-maid

(Mateo 12:1-8; Marcos 2:23-28)

6 Tegin te ibagwengin ulukued-ibegin, Jesús aga e-chapinganbak trigo-naidbal natapidgin, Jesús-e-chapingan trigo-kwane-natapmal. Tegin Jesús-e-chapingan chunkalgin wig-i-wigi trigo-kwa imasmal e-kwa magal. Tenal teun Pariseomal-wal-walgwen Jesúsbak natapmalmo.²Tegin Pariseomal-kwénnna-kwénnna Jesús-e-chapinganga chogalmal:
 —¿Ibiga pe ulukued-ibegin trigo-kwa kwananimal tegin pe ibiga wig-i-wigi trigo-kwa-imanimalbal-wede? Wedin arpaged. Al ulukued-ibegin weob immal-imakeddin izhe.

³Tegin Jesús Pariseomalga chogal:

“An-chapingan noal immal kwen imanajulmal. ¿Pe Pab-kartagin apchodijulzhí akpene Errey-David aga e-chapinganbak ukul-mesdanikidgin, igi kus?

⁴“Imi teun David aga e-chapinganbak Pabzhe-koled-negggin togzhagu, madu-Pabga-uklejad kuchamal. Tenal we madu-Pabga-uklejad unnila tule-irwal-Pabzhe-kolmaladbi igal-nika kunkal. Tenal David-madu-kuchad izheendo, tenal David yabli e-chapinganbak kwen iskuszhulmal. Tenal Pab Tummad pul yer tule-tak, pul igal-mamikidga. Al an-chapingan kwen iskuszhulmalmo.⁵Tenal an-Te-Tule-Chunna ulukued-ibe-e-ibedga mai.”

Teob Jesús chogzagus.

Jesús tule-chakwa-tinkuaed-nudajad

(Mateo 12:9-14; Marcos 3:1-6)

⁶Tegin ulukued-ibe-pidgin Jesús Judio-ormaked-negzhe tognoni, tegin Pab-igalgin tulemal-oturdakalzhun. Tenal teun

takalgu, Judio-ormaked-neggin tule-walgwen-chakwa-nuedzhikid-tinkualed chimo.⁷ Imi Pariseomal tegin Moisés-igalgin-tulemal-oturdamalad igal-aminanimal Jesúsgin istar chunmagal Jesús noal-kudii. Al we Judio-tummagan nue Jesús-algebukmal takegal Jesúsde pule ulukued-ibegin tule-nudako-dewa.⁸ Tenal Jesús nued wisdo Judio-tummagan igi egin pinzhebukmal. Tegin Jesús tule-chakwa-tinkualedga chogal:

—Kwisygu. Tage neg-abaladzhe.

Tegin tule-chakwa-tinkualed kwisgudgu, neg-abaladzhe kwisgunonijun.

⁹Tegin Jesús Pariseomalga chogal:

—Imi antin, an peido, pemal anka chog. ¿Imi ulukued-ibegin ib-nued immal-nued imagal, o immal-iskana imagal? ¿Tule-nudakoed o meke tule-purkoed? Anka chogdo.

¹⁰Tegin Jesús tule-amigwisugal toa ega chogo. Tenal tulemal Jesús-kwen-abinchuszhulmal, ilgwen yakir pesmal. Tegin Jesús tule-chakwa-tinkualedga chogal:

—iChakwa akt!

Tegin tule-chakwa-tinkualed chakwa aktosgu, e-chakwa ilgwen nugus.¹¹ Tenal Pariseomal sae-itos-pesmal. Al Pariseomal aga emal-emal igal-aminaigualmal, emalde igi Jesús-imakel nabir.

Jesús walambe-kakabog e-nuggin-palmilegal malad-chujad

(Mateo 10:1-4; Marcos 3:13-19)

¹²Tegin Jesúsdin tule-chakwanudajad-cholbal untaradgin, yal-pirzhe nad Pabzhe kolgal. Tegin Jesús óipos Pabzhe kolzhii.

¹³Tegin neg-oiposgu Jesús aga e-chapinganzhe kocha e-waglik amapagunonimalgal. Tegin Jesús walambe-kakabog aga e-chapingan-chus. Tenal Jesús tulemal-walambe-kakabog-

chulenonimaladga nug uknoni e-nuggin-palmilegal malad.¹⁴ Tenal Jesús-nuggin-palmilegal malad nug-nemal: Simón, (tegin Jesús tar-nugzhasbal Pedro,) tegín Pedro-e-upa-Andrés, tegin Jacobo, Juan, Felipe tegin Bartolomé,¹⁵ Mateo, Tomás, tegin Alfeo-machi-Jacobo, tegin Romano-tule-onobied-Simón,¹⁶ tegin Jacobo-machi-Judas, tegin Judas-Iscariote. Tenal we Judas-Iscariotedin manibal-Jesús-gin-akpinnoed.

¹⁷Tegin Jesús aga e-chapinganbak yal-pir-akar aktenonimalgu, nébaje ampagunonimal. Tenal teun takalgu, tulemal-Jesús-bal-naigusmalad íchejul ampagunonimal, tegin tulemal-aknedanimalad íchejul ampagunonimalmo.

Tenal tulemal-ampagunonimalad pel-kwapa-Provincia-Judea-akar nonimal, kwén Jerusalén-neg-kwebur-akar nonimal, kwén Tiro-tegin-Sidón-neg-kwebur-terminal-kakpal-akar nominalbal.¹⁸ Tenal tulemal nonimal

Jesús-itogal, tegin Jesús e-ponnikmalad-nudagalbal. Tegin tulemal-nia-iskanaje-wiledimalad nugunonimal.¹⁹ Tegin Jesús-e-kannaledged-nikad-akar pela-pela tulemal-nuda, al tulemal-pel-kwapa chunkalgin Jesús-ebubi-kualdamal nugugal.

Jesús weligwal-tule-imakedgin chunmajad, tegin pukib-tule-imakedgin chunmasbalid

(Mateo 5:1-12)

²⁰Tegin Jesús nue aga e-chapingan-taktegu, chogal: Imi pe immal-nikchulidbal wiledil,

ib-nued pemalga kus, Pab-neg-takmaid pemalga kus, kunoniko.

²¹Tenal pe imis ukul-mesdimalal, ib-nued pemalga kus, Pab kujal imme pemal-imamalo.

- Tenal pe imis pukib-itogedbal
podimalal,
ib-nued pemalga kus,
pemal kujal weligwal-
itogedgin allenonimalo.
- ²² Tenal pe an-Te-Tule-
Chunnabal-nanimaladbal
tulemal istar pe-taknonikil,
tegin kantikidgin ormakedgin
pe-onodmalal,
ib-nued pemalga kus.
Tenal tulemal istar pegin
chunmakalmal,
tegin immal-iskanayob
pe-nug izhoel,
ib-nued pemalga kusbal.
- ²³ Tenal tule chabzhul pe-imajal,
ampa te ibegin pe ichomakal-
ichomakal welguo,
tegin Pab-neggan pemalga
íchejul immal-nuegan
uklenoniko.
Tenal tulemal
pemal-imajad-yopí,
akpene we tulemal-e-tadgan
chabzhul
Pab-kaka-palchogmalad-
imasmalmo.
- Tegin Jesús chogalbal:
²⁴ Tenal pemal-mani-ibgan
ampi pe wilesmalma,
pe-immalmal-nikadgin
pe yer itodimal,
tenal Pab-neggan pemalga
immalmal-nuegan
pal kwen uklegojul-kuo.
- ²⁵ Tenal pemal-imme-itodimalad
ampi pe wilesmalma,
pemal kujal peyedzhe
ukul-mesnonimalo.
Tenal pemal-imis-alledimalad
ampi pe wilesmalma,
pemal kujal pukib-itononikidbal
peyedzhe pononimalo.
- ²⁶ Tenal tulemal-pel-kwapa-
pe-nug-otummodimalad,
ampi pe wilesmalma,
akpene tadgan ampa
Pab-kaka-palchoged-
chunchunnadzhulmalad-nug
otummodi-kusmalmo.

Al wegin choglejundo:
pedin nuekwá kwen
kudijulmalmo.

Jesús chogzhagujad: “Tule-pebak-aichulmalad pe pilalguenab.”
(Mateo 5:38-48)

²⁷ Tegin Jesús chogalbal: “Imi
pemal-an-itobukmaladga an
chogo: imi tule-pebak-aichulmalad
pe pilalguenabmal. Tegin tule-
istar-pe-taktimaladga pe ib-nued
imakenabmalbal. ²⁸ Tegin tulemal-
pe-ukapchemaladga pe chogo:
‘Pab pega immal-nuegan imakelen,
nabirin.’ Tegin tulemal-istar-pegin-
immal-imamaladga pe Pabzhe
kolmalbalo.

²⁹ “Tegin tule pebi-wagal ebiojal,
pe we tulega wagal-konali pe
oyobalo pe-ebiogalbal. Tegin tule-
walgwen kantikidgin pegin chuba
chujal, pe akalzhul we tulega yogal
ukpaló. ³⁰ Imi meke-ibi-tule peje
immal ekisdanikil, pe we tulega
immal uko. Tenal tule-walgwen
pegin kantikidgin immal chujal, pe
melle kannan pal ekisnao. ³¹ Imi pe
igi peiguídin tule pega immal ima,
pemal ampa teopí tule-pimaladga
pel-kwapa immal imamogo.

³² “Imi pemal aga aimalbi-
pilalmalal, ɿibi-nued pega
kunoniko? Keg kue. Imi tule-iskana
ampa aga e-aimal-pilalmalmo.

³³ Tegin tule-pega-immal-nuegan-
imadimaladgabi pe immal-nuegan
imadiil, ɿibi-nued pega kunoniko?
Keg kue. Imi tule-iskana ampa tule-
ega-immal-nuegan-imadimaladga
immal-nuegan imamalmo.

³⁴ “Imi pe tulega immalmal-
ololchajad pega kannan uko pe
takedbal, pe tulega immalmal
ololchasmogal, ɿibi-nued pega
kunoniko? Keg kue. Imi tule-iskana
ampa tule-ega-kannan-immal-uko-
takedbal tule-iskana-pimaladga
immalmal ololchenanimalmo.

³⁵ “Tenal pemal keg-chulgú tule-
pebak-aichulmalad-pilalgumalo,

tegin pe tule-pebak-aichulmaladga immal-nuegan imamalo. Tegin pe tulemalga immalmal ololchao, tenal pe melle pal pinzhao: ‘We tulemal anka kannañ immalmal uknebal.’

“Imi an-chogzhadyob pemal immal imasmalal, Pab-neggan immalmal-ichejul pega uklenoniko. Tegin Pab-Pul-Tummad-naneedyob, pe kunonimogo. Imi Pab Tummad tule-keg-ega-nuedi-chogmaladbak pinnallé nane, tegin tule-iskanabak pinnallé nanebal.”³⁶ Tenal pe-Pab-Tummad wilejakwa tule-takedyob, pedin wilejakwa tule-taked-wilubmaldo.”

**Jesús chogzhagujad:
“Pe melle yogasar chogo wedin
tule-nued o tule-iskana”**

(Mateo 7:1-5)

³⁷ Tegin Jesús choghalbal: “Imi pemal melle yogasar tule-pidgin chogdago: ‘We tuledin immal akalos,’ Pab pegin melle chognonigalmo: ‘Pedin iskusmo.’ Tegin pe melle tule-pidgin chogdamalbalo: ‘We tule sapejul oturdaledeg-wilub,’ Pab pegin melle chognonigalmo: ‘Pedin sapejul oturdaledeg-wilubmo.’ Tenal pe tulega choghal: ‘Pe-iskued pelgus,’ Pab pega chognonimogo: ‘Pe-iskued pelgusmo.’

³⁸ “Tegin pemal tule-pimaladga immalmal ukenabmal. Imi pe tule-pidga immal ukchhal, Pabdin izhe-kwamakal okpinalebaa pega immalmal ukmogo. Tenal pe ibi-wilub pe ebúdin, Pab pe-wilub-ebuged-unni pega immalmal ukmogo.”

³⁹ Tegin Jesús tulemalga purpal choghalbal: “¿Imi tule-aku-ataged nabir tule-aku-ataged-pid-iktuo pe ebinzhe? Chulá. ¿Tenal tule-aku-atamalad-walbo-pel aga ya-yabal arkwatmalojulzhí? Teobdo.

⁴⁰ “Imi tule-oturdakedbal-turdananimalad kwen unniyal tule-oturdakedga pul immal

wisgugal. Tenal tule-oturdakedbal pél turdasmalal, kep unnigumogo tule-oturdakedyob immalmal wisgumalgal.”

⁴¹ Tegin Jesús tulemalga purpal choghalbal:

“¿Imi pe takchal, pe-kwenad aku-atagedbal iche immal wis akalos, tule imiagin turwa-totó megwijadyob nuekwa immal takchul, ibiga pe we tuleginistar chunmanonidadé? Tenal pedin aga tukin aku-itomo pe peyedzhe immal akalodimogad, tule imiagin chowalkia-maidyob aku aga pe takmo.”

⁴² “Tenal tule imiagin chowalkia-maidaku takel, ctede we tule igi kwenadga chogo: ‘Kwenan, an pe-wis-pentagwelo pe-imiaginturwa-maid chugal?’ Keg kue. Imi pemal peyedzhe immal-akalojadbal keg aga pe kwenad-penta e-immal-akalojad wis nudagal.

“iPemal pinche-askinbi-nued-nanemalad! Imi pemal-inzhel aga pe-taed nudakenabmal, kep pe unnigu aga pe-kwenad-pentagal e-taed nudagal, tule aga e-imiagin chowalkia-maid chujadyob kep unnigu aga e-kwenad-imiagin turwa-maid chugal.”

**Tule e-taedbal mag
taklenoniko ibi-tule**

(Mateo 7:17-20, 12:34-35)

⁴³ Tegin Jesús choghalbal: “Imi chapi-chan-nuegan kwen nikchul istar kulle. Tegin chapi-chan-iskana kwen nikchul yer kulle.”⁴⁴ Tenal chapimal-ilbal e-chanmakedbal mag taklenoniko ibi-chapimal. Imi wag-islub-chan, chapi-iko-nikadgin pe kwen onogojul-kuo chan-nani. Tenal uva-chan, tub-iko-nikadgin pe kwen onogojulbal chan-nanimo.

⁴⁵ “Imi animal-tule ampa chapimalyobmo. Tenal tule-nuedil, aga ulubgin nugu-pinzheedbal immal-nuegan imanoniko. Tenal tule-iskanagwal, aga ulubgin istar-pinzheedbal immal-iskana

imanoniko. Tenal tule aga ulubgin pinzheedbal nued chunmanoniko o istar chunmanoniko.”

Jesús chogzhagujad tulemal e-choged-pallí immal imakenabmal
(Mateo 7:24-27)

⁴⁶ Tegin Jesús chogbal: “¿Ibiga pemal anche kolmalde: ‘Tummad,’ tede pesimalde an-choged-pallí immal kwen imajulmal? Imi pemal an-choged-pallí immal imaked-wilubmalan.

⁴⁷ “Tenal an pemalga oyone tule anche tanikil tegin an-itosbalil, tegin an-chogzhad-pallí-tael, we tule igi nane. ⁴⁸ Nabir. Imi tule an-chogzhad-yopí naneel, tule nuekwa akwa-neg chobzhadyob. Tenal we tule akwa-neg chobzhogalgu, nap-ulak akwapirgin neg-kaed mezhis. Tenal ti peyedzhe no algu, neg-odononi, tenal akwa-neg-nuekwa-choblejadbal, kwen aglaszhul-kus.

⁴⁹ “Tenal tule an-nued-itojal, tenal an-chogzhad-pallí kwen nanejulil, we tule pollé akwa-neg chobzhadyob. Tenal we tule pinche ukubgin akwa-neg chobzhadyob. Tenal ti peyedzhe no algu, neg-odononi, tegin akwa-neg-pollé-choblejadbal ilgwen aglad, tegin we akwa-neg ilgwen pelgunonijun. Al pemal an-kaka-itosmalal, ampa an-chogzhad-pallí pe pél immal imakenabmal. Pitogua.”

Jesús panna-akar Romano-chulub-tummadga e-mos-nudajad
(Mateo 8:5-13)

7 Tegin Jesús tule-pukmaladga pél chunmasgu, neg-kwebur-Capernaumzhe nad. ² Imi teun takalgu, Capernaumgin Romano-chulub-tummad-e-mos-pilaled yee-pakal mai, iche-napi purkwedani. ³ Tegin Romano-chulub-tummad Jesús-wisgusgu, Judio-chelegan-palmis Jesúszhe

wilegal e-negzhe taggal tegin e-mos-yee-maid-nudagalbal.

⁴ Tegin Judio-chelegan Jesúszhe nonimalgu, Jesúszhe peyedzhe wilenaigualmal Romano-chulub-tummadga e-mos-nudagal. Tegin Judio-chelegan Jesúsga chogmal:

⁵ —Imi chulub-tummad animal-tule-pilaledbal animalga Judio-ormaked-neg chobzha. Al pe keg-chulgu chulub-tummad-pentaked-wilubmo.

Tegin Jesús Judio-cheleganga chogal:

—Tegin nabirde.

⁶ Tegin Jesús Judio-tummagankak mes alzhun Romano-chulub-tummad-negzhe. Tegin Jesús chulub-tummad-neg omodanikidgin, chulub-tummad Jesús-abin aga e-aimal-palmial. Tenal chulub-tummad-e-aimal Jesús-abingusgu, Jesúsga chogmal:

“Imi Romano-chulub-tummad chogdo, pede melle e-negzhe tago. Imi ede kwen unniwil e-neggin pe-odogal. ⁷ Al chulub-tummad kwen alzhul-kusbal pebak assapin chunmagal. Tenal chulub-tummad chogbaldo, pede unnila kakagin chogzhal, e-mos nuguo, e-mos ilgwen nuginoniko.

⁸ “Tenal chulub-tummad chogbal, ede tummad-nikamo tummad-ulpallí nanegal. Tenal ede aga e-chapingan-nikamo. Tenal ede e-chapingan-walgwenga chogzhal: ‘Pe nao,’ we chapin keg-chulgu neenab. Tegin ede e-chapin-pidga chogzhabalil: ‘Pede tago,’ we chapin keg-chulgu tagenab. Tegin ede e-mosga chogzhabalil: ‘Weob pe imako,’ we mos keg-chulgu immal imakenab.”

⁹ Tegin Jesús tule-chulub-tummad-kaka-chognonikid-pal-itosgu, weob pakal pes. Tegin Jesús tulemalzhik akpiridgu, tule-ebal-irmadimaladga chogalzhun:

—Imi an chunchunnad pemalga chogdo: imi meke-pia, we tule-anakin-penzhulidyb an tule-kwen-taktijul, Israel-napche-pakal pel chul.

¹⁰Tegin chulub-tummad-tule-palmismalad kannan chulub-tummadzhe nonimalgu, pato taknonimal, chulub-tummad-e-mos pato nugus. Tenal Jesúsdin panna-akar chulub-tummad-e-mos-nudas.

Jesús Naín-neg-kweburgin machi-purkwijad-otulojad

¹¹Tegin Jesús chulub-tummad-mos-nudajad-cholbal, Naín-neg-kweburzhe nad. Tenal Jesús-e-chapingan tegin tulemal-ichejul Jesúsbak mes natapmaldo. ¹²Tegin Jesús Naín-neg-kwebur-e-wanagak-omodanikidgin, tulemal Jesús-abin tule-mui-cheidanimal.

Tenal machi-purkwijad-e-nan tanimo. Tegin tulemal-ichejul e-nanbak mes irmadanimalmo. Tenal machi-purkwijad-e-nan e-machered pato tarbi purkwis. Tenal we ome nuskan-pid-pal-nikchul-choggú, al machi-purkwijadbi aga nan-akwediin. ¹³Tegin Tummad-Jesús ome-takchagu, tule-pid-pal-nikchul ome-akwegal, wilejakwa ome-taknoni. Tegin Jesús omega chogal:

—Melle pe poma.

¹⁴Tegin Jesús kachigin tule-purkwijad-cheidanimalad-abir kwisgunonigu, kachibal tule-purkwaled-kas. Tegin tule-cheinatapmalad kwisgusalzhun. Tegin Jesús tule-purkwis-maidga chogal:

—iMachi, an pega chog pe kwisgu!

¹⁵Tegin Jesús tule-purkwijad kachigin chigwis tegin chunmakalzhun. Tegin Jesús machi-e-nanga chogal:

—Itigin pe-machi, an pega kannan tar-utulos.

¹⁶Tegin tulemal-Jesús-machi-otulojad-takchamalad-pel-kwapa Jesús-tobgualmal, tegin Pab-Tummad-otummoalmalmo, chogalmal:

—Imi Pab-kaka-palchoged-pultummad animal-abalgin nononi.

Tegin tulemal chogalmalbal:

—Imi Pab Tummad aga e-tulemal-pentanoni.

¹⁷Tegin Jesús-tule-otulojad-kaka mimmilemai-kuszhun pel-kwapa Provincia-Judeagin tegin tulemal-pel-kwapa aka-mamimaladzhe-pakal.

Juan Bautista walbo Jesúszhe aga e-chapingan-palmijad (Mateo 11:1-19)

¹⁸Imi teun takalgu, Juan-e-chapingan Juanga chognonimal, Jesús pél immal imajad. Tegin Juan Jesús-immal-imajad itosgu, walbo aga e-chapingan-amis Jesúszhe palmigal. ¹⁹Tegin Juan aga e-chapinganga chogal:

—Imi pemal Jesúszhe nadmalal, ka pe chogo: ‘Pede chunchunnad Pab-akpene-chogzhad-palmidagoed-tule-dewa o animal tule-pid-abintakenab-dewa? Anka nuekwa kaka palmidabalo.’

²⁰Tegin Juan-e-chapingan nadmalzhun Jesúszhe. Tegin Juan-e-chapingan Jesúszhe nonimalgu, Jesúsga chogalmal:

—Imi Juan Bautista animal-palmial peje ekisgal: ‘Pede chunchunnad Pab-akpene-chogzhad-palmidagoed-tule-dewa o animal tule-pid-abintakenabmal-dewa.’ Pede ega nuekwa kaka palmidago.

Tegin Jesús Juan-e-chapinganga chogal:

—Tegin nabirde. Tenal pemal an-wis-abintamalgwelo pe an-takegal.

²¹Tegin apka-tegidgin Jesús Juan-e-chapingan-wagin ichejul tulemal-nudas: poni-nikmalad, tule-yemalad, tule-nianikmalad, tegin tule-aku-atamalad pel-kwapa nudas. ²²Tegin kep Jesús Juan-e-chapinganga chogal:

—Imisgin pe nemalzhunno Juanzhe. Tenal pe Juan-omojal, pe Juanga chogo, pél pe imial takchad, pél ual pe itojad. Tegin pe Juanga chogbalo, tule-aku-atamalad nabir

atanonimal, tegin tule-mego-mego-nanemalad nabir-nane-pesmal, tegin tule-lepra-poni-nikmalad ilgwén nugusmal, tegin tule-chuchu-yallilmalad mag-itos-pesmal, tegin tule-purkwismalad kannan tullesmal, tegin tule-wiledimaladga Pab-kaka-nuegan choglenaibal.

²³Tegin pe Juanga chogbalo: ‘Imi meke-ibi-tule an-immal-imanaidbal Pab-Tummad-kwen-ebeszhlul, we tulega ib-nuedga kunoniko.’

²⁴Tegin Juan-e-chapingan naded-cholbal, Jesús tule-pukmaladga Juan Bautistagin chunmakal choghal:

—Imi pe neg-nikchulidbal arpiguusu, ¿ibi pe takti-kusmal? ¿Tule-keg-ilgwen-chunmaked kaiki-purwabal-akpanedyobid? Chulá.²⁵ ¿Tegil ibi pe takapchun? ¿Tule-mol-nuegan yowed? Chulá. Tenal tule-mol-nuegan-yomalad erreymal-ampagumalad-negmalgin, immal-nuegan-wilub-okpis-nikadgin mammal, neg-nikchulidbal chul.²⁶ ¿Tegil ibi pe takapchun? ¿Tule-Pab-kaka-palchoged? Teobdo. Tenal an chunchunnad pemałga chogdo: Juan Bautista Pab-kaka-palchogmaladga pul-pule tule-tummad.²⁷ Tenal Pab-karta Juan Bautistagin chogzhado:
Imi antin pe-iktual tule-igal-nudaked-palmine, pega igal nudagal.

Mal. 3:1

²⁸“Tenal an chunchunnad pemałga chogdo: imi tulemal-iti-napkin-mimmilesmalad-abalgin, Juan Bautistaga pul tule-tummad kwen nikchul. Tenal Pab-neg-takmaidgin meke-ibi-tule-pul-totogwadzhe-pakal Juan Bautistaga pul tule-tummad.”²⁹(Tenal tulemal-pel-kwapa tegin tule-Romano-tummadga-tulemalgin-mani-egwanmaladzhe-pakal, Juan Bautistabal-tigin-oglesmal. Al we tulemal Jesús-chunmajad-itosmalgu, chognonimal Pab Tummad yer igal mezhis.)³⁰Tenal Pariseomal

tegin Pab-igal-wismalad Juanbal-tigin-obzhajulmal. Al we tulemal Pab-ega-immal-imabied kwen abingaszhulmal.)

³¹Tegin Jesús chogbal: ‘¿Imi an ibimalayob an pemalga tule-imis-pukmalad-oyogo nabirwichul? ¿We tulemal ibiyob-takle pe ebinzhe? Nabir.³² Imi tule-imis-pukmalad nuskan-purwigana tule-ampagumaladgin aga emal-emal kolbuktamaladyob. Tenal we purwigana chogdamalo:

Imi animal pemalga
kammu-okochamal,
tenal pemal kwen
kwichajulmal.
Tegin animal pemalga pukib-
itoged-namaked namasmal,
Tenal pemal kwen
poszhulmalbal.

³³Imi Juan Bautista mas-kunchulidgin tegin vino-kobzhulidgin pemalzhe noni. Tenal pemal chogmal: ‘Juan Bautistade nia-nika.’³⁴Tegin an-Te-Tule-Chunna nonigu, mas-kunnedgin tegin kobedgin noni. Tenal pemal ankin chogmal: ‘We tule aku-aku-mas-kunned tegin mumurgued-tule, tegin tule-Romano-tummadga-mani-egwanmaladbak ai-nued, tegin tule-iskued-nikmalad-e-aibal.’

³⁵Imi tule-imis-pukmalad Juan-tegin-an-kwen-abingaszhulmal. Tegil ¿igi pe wisgunoniko an-igal ib-chunchunnad o chul? Nabir. Imi tule-an-abingasmalad-e-taedbal kep kujal mag taklenoniko an-igal ib-chunchunnaddo.”

Jesús Pariseo-negzhe mas kunnapid

³⁶Tegin te ibagwengin Pariseowalgwjen Jesúszhe kocha e-negzhe mas wis kuntagal. Tegin Jesús Pariseo-negzhe nadzhun mas kunkal. Tegin Jesús Pariseo-negzhe omosgu, mas kunnalzhun.

³⁷Imi teun we neg-kweburgin ome-macherganbi-wijiid kudimo.

Tenal we ome wisgusgu Jesús Pariseo-neggin mas kunchii, ome alabastro-pudegin ti-wawad-annik-nonii.³⁸ Tegin ome Jesús-nag-tukubal poe-pakal kwisgunoni. Tegin ome Jesús-naggin imialis-tedemajad, e-chagla-kiagin Jesús-nag elisbal. Tegin ome Jesús-nag usgu, Jesús-naggin ti-wawad imas.

³⁹ Tegin Pariseo-Jesúszhe-kochad takchagu ome Jesús-naggin ti-wawad-imas, aga ulubgin pinzheji-kual: "Imi Jesús Pab-kaka-palchogedilen, pato wisgujan ibi-ome-wede, tegin Jesús wisgusbalin we ome macherganbi-wijiid."

⁴⁰ Tenal Jesús wisdo Pariseo igi aga ulubgin pinzheji. Al Jesús Pariseoga chogal:

—Simón, an kakabo pega immal wis chogbido.

Tegin Pariseo-Simón Jesúsga chogal:

—Tule-oturdaked, pe chogden an pe-itogo.

⁴¹ Tegin Jesús purpal Simóniga chogalzhun:

—Imi tule-walbo tule-mani-ibedgin mani kalenai; walgwen ol-mani-tulaataaled-ilatal kalenai, kwéntin ol-mani-tulabo-kakaambe kalenaimo.⁴² Tenal tule-mani-ibed takchagu we tule-walbogwad keg ega mani-kalenaid penukkus, mani-ibed we tule-walbogidga chogal: 'Pemal melle anka mani-kalenaid pal penukmalo.'

Tegin Jesús chogalbal:

—Simón, imisgin anka pe chogdo čpiti tule-mani-kalenai-nad-walbogid pul mani-ibed-pilalguo?

⁴³ Tegin Pariseo-Simón Jesúsga chogal:

—Antin, an chog, tule-pul-ichejul-mani-kalenai-nad pul tule-mani-ibed-pilalguo.

Tegin Jesús Pariseo-Simóniga chogal:

—Pe nued chogzhado.

⁴⁴ Tegin Jesús omezhik akpiridgu, Pariseo-Simóniga chogal:

—Simón, pe tak we ome. Imi an pe-negzhe tognonigu, pe anka ti kwen ukchajul nag enukkal. Tenal we ome e-imialisgin an-nag wartichas, tegin e-chagla-kiagin an-nag elisbal.⁴⁵ Tenal pe igal-mamikidbal pe an-wagal-kwen-uszhul-kus. Tenal we ome an-pe-negzhe-tognonikid-akar annag unai.⁴⁶ Tenal pedin an-nonogin kwallu-wawad kwen imaszhulbal. Tenal we ome an-naggin ti-wawad imasbal.⁴⁷ Al an pega chogdo, we ome peyedzhe an-pilaledbal, we omega ichejul iskued pelgunonijun. Tenal an tulega iche-iskued pelgus chogzhal, we tule iche an-pilalgunoniko.

⁴⁸ Tegin Jesús omega chogal:

—Pe-iskueddin pato pelgus.

⁴⁹ Tegin tulemal-pimalad-pukmalmogad aga emal-emal ekichialmal:

—¿We Jesúsdé, ibi-tule-wede, tulega iskued eliedde? ¿Pab Tummadbí nabir tule-iskued elijulzhi? Teobdo.

⁵⁰ Tenal Jesús omega chogalbal:

—Pe-ankin-penzhulidbal pe abonolenoni. Imisgin pe akalzhul pe nejunno.

Omegan ichejul Jesús-pentadi-kujad

8 Tegin Jesús Pariseo-neggins mas-kuchad-cholbal, neg-kweburgangin tegin neg-kwebur-purwiganagin pipirmadi-kualzhun. Tegin Jesús we neg-kweburgangin Pab-neg-takmaid-kaka-nuegangin chunmadi-kus. Tenal teun takalgu, e-chapingan-walambe-kakabogwad Jesúsbak kudigusmalmo.

² Tenal teun omegan-wal-walgwen akpene nia-nikujad tegin ponnikujad-Jesús-tar-nudajad Jesúsbak tigusmalmo. Tenal we omegan: María-pimalbalid-Magdalena. Tenal

Jesús we María-akar walakugle nia-onijad. ³Tegin Juana tigusmo. Tenal Juanadin Chuza-ome. Tenal Chuzadin Errey-Herode-e-neg-taked-pul-tummad. Tegin Susanna tegin omegan-pimalad-ichejul Jesúsbak pipirmadi-kusmalmo. Tenal we omegan e-immal-nikadbal Jesús-pentadi-kusmal.

Jesús purpal mial immal-kwa-tigedgin chunmajad

(Mateo 13:1-9; Marcos 4:1-9)

⁴Tegin tulemal-ichejul neg-kwebur-pid-pid-akar irmanonimal Jesús-itogal. Tegin Jesústulemalga purpal chunmakalzhun: ⁵“Imi te ibagwengin tule-walgwen nad mie-mie immal-kwa imagal. Tegin tule immal-kwa minaidgin, immal-kwa kwen igalanemaladgin apatis. Tenal we immal-kwa, tulemal kin anas-ne, tegin chikwimal we immal-kwa masmalbal.

⁶“Tegin immal-kwa kwen akwapir-ulak-naidgin apatis. Tenal we immal-kwa nisgu, neg-walajulidbal pulzhul tinkus.

⁷“Tegin immal-kwa kwen iko-kwa-naidgin apatis. Tegin we immal-kwa nisgu, iko-kwabak mes nismo. Tegin immal-kwa tunkusgu, ikodin immal-kwa-nued-nijad izhos, al keg chanmagus.

⁸“Tegin immal-kwa kwen nap-nuedgin apatis. Tegin we immal-kwa tunkusgu, yer chanmanoni, kal-kwengin tulaataled-ilgwen chanmas.”

Tegin Jesús weob chunmasgu, sapejul kote, chogal:

—Imi an-pega-chogzhad pe nuekwa itomalo.

⁹Tegin e-chapingan Jesúszhe ekichial:

—iTegil we igalde igi choglejun pe immal-kwa-tiglejadgin chunmajaddé?

¹⁰Tegin Jesús aga e-chapinganga chogal:

—Imi Pab-neg-takmaid-igal otukal mai. Tenal Pab pemalga igal-ukcha mag we igal itogal, tenal Pab tule-pimaladgadin igal-kwen-ukchajul. Tenal an we tulemalga purpal Pab-neg-takmaid-igalgin chunma. Imi Pab-kartagin chogdo:

Tule-takpukmalad aku taknonimalo,
tegin tule-itobukmalad
aku itononimalbalo.

Is. 6:9

¹¹“Al an pemalga mial immal-kwa-tiged-igal chognejun, ibi-chogle-wede. Imi immal-kwa chogle, Pab-kakapurwa-nued.

¹²“Tegin immal-kwa-igalbal-apatismalad chogle: tule-wal-walgwen Pab-kakapurwa itojal, nia-sagla ulubgin kin chunmanoniko Pab-kakapurwa igegal, melle Pabgin ibzhegal, tegin we tule melle Pabgin abonolegalbal.

¹³“Tegin immal-kwa-akwapir-ulak-naidgin-apatismalad chogle: tule Pab-kakapurwa itojal, weligwaledgin Pab-kakapurwa abingao, tenal we tule nuekwa Pab-abingejulmal. Al we tulemal ichejal Pabbak wis kudiguo. Tenal apka te-cholbal wilub-taklenonikoedgin, ilgwen Pab-igedo.

¹⁴“Tegin immal-kwa-iko-naidzhik-apatismalad chogle: tule Pab-kakapurwa itojal, Pab-kakapurwa abingenoniko. Tenal we tulemal Pabbak-kudiidgin iti-napkin-pinzheedbal pukib-itoged kin nakwidago. Tegin we tule immalmal-ichejul-nikuedbal tegin weligwal aga chan-imakedbal, e-pinzheed kalenoniko. Tegin we tule Pab-igenonibalo.

¹⁵“Tegin immal-kwa nap-nuedgin apatismalad chogle: tule-nuegan tegin tule-nued-pinzhemalad. Tenal we tule Pab-kakapurwa itojal, Pab-kakapurwa-abingenoniko, tegin Pab-kwen-igeojul-kuo. Tenal we tulemal Pab-chogzhadyob pane-pane alamakedbal nued

nanadamalo. Imi immal-kwa-tiged-igaldin weob chogledo."

Jesús kallen-neg-otalogedgin chunmajad
(Marcos 4:21-25)

¹⁶Tegin Jesús chogbal: "Imi tule-kwen-nikchul kallen ogajal mete-yabal chigal, o chulil, ulu-ulpal chigal. Tenal tule kallen ogajal, keg-chulgu kallen-kalugin chienabmal, tule-ukpomamimalad mag takegal kallen-neg-otaloiji.
¹⁷Al immal-otukal-maid keg-chulgu wisgulenoniko, tegin immal-otukal-kujad keg-chulgu mag taklenoniko, tegin immal otukal-kujad tulemal pél wisgunonimalbalo.

¹⁸"Al pe nuekwa pinzheenab pe igi Pab-ito-dewa. Tenal pe nuekwa Pab-itojal, Pab ukin pega e-pinzheed-pid uknonibalo. Tenal pe nuekwa Pab-itojulil, Pab pegin e-pinzheed egwannoniko."

Jesús e-kwenamalad-chunchunnadgin chunmajad
(Mateo 12:46-50; Marcos 3:31-35)

¹⁹Imi teun takalgu, Jesús tulemal-oturdanaidgin, Jesús-e-nan Jesús-e-urpamalbak Jesús-taknonimal. Tenal tulemal-ichejul-wanagakkinpukwadbal Jesús-e-kwenamalad keg Jesús-chiidzhe toggusmal.
²⁰Tegin tule-takchamalad Jesúsga chognonimal:

—Pe-nan pe-urpamalbak magarbal pukwamal. Emalde pebak chunmabimal.

²¹Tegin Jesús tulemalga chogal:

—Imi tule Pab-kakapurwa itojal tenal keg-chulgu Pab-chogzhadyob nanemalal, wedin purpal an-nan tegin an-kwenamalad-chunchunnad.

Jesús purwa tegin mata-arwed opogi-chajad
(Mateo 8:23-27; Marcos 4:35-41)

²²Tegin te ibagwengin Jesús aga e-chapinganga chogal:

—Nemal mata-opakal.

Tegin Jesús aga e-chapinganbak ulgin nakwismalgu, nadmalzhun.
²³Tegin Jesús ulgin-natapmaladgin ul-yagin kabid. Tegidgin purwa pela-pela kolnonigu, mata peyedzhe tunkualmo. Tegin mata arwialgu ul-azhubal ti-milegalidbal ti ulgin engual. Al ul togdani-pes. Tenal Jesús-e-chapingan wichulmal emalde igi kunemal-dewa purkwenemal o tullenemal.

²⁴Tegin e-chapingan kueye-kueye Jesúshe nonimal Jesús-otagal. Tegin e-chapingan Jesús-otasgu, Jesúsga chogalmal:

—Tummad, pe tak anmalbi-ul-togdani. Anmal ogangudanimalbal.

Tegin Jesús atasgu, kep purwaga tegin mata-arwedga chogal:

—iPe wis pogigma!

Tegin purwa ilgwen poki nad, tegin mata ilgwen chiale-pesmo.

²⁵Tegin Jesús aga e-chapinganga chogal:

—¿Pe-ankin-penzhulidde igi pe kuddé?

Tegin Jesús-e-chapingan Jesús-kwen-abinchaszhul-kus. Tenal Jesúsgin-kwakijadbal weob pakal pesmal. Tegin Jesús-e-chapingan aga emal-emal chogalmal:

—¿Ibi-tule-wede? Purwa tegin mata-aroed Jesús-ega-chogzhad-pallí ibzhe. ¿Tegil we Jesús purwa-ibeddé?

²⁶Tegin Jesús aga e-chapinganbak yabli Galilea-mata-opakal omosmalzhun, Gerasaje.

Jesús Gerasagin tule-nia-ichejul-nikad-nudajad

(Mateo 8:28-34; Marcos 5:1-20)

²⁷Tegin Jesús Gerasa-omopen naigunonimalgu, ul-akar aktesmal. Tegidgin tule-neg-kweburgined-nianikad-walgwen Jesús-abingusmal. Tenal teun we tule-nia-nikad pirkabalgus neggin kwen maichul. Tenal we tule uanbal chwili mai, mol pel nikchul.

²⁸Tegin tule-nia-nikad Jesús-takchagu, sapejul kolmas, tegin Jesús-abir chimitinoni. Tegin tule-nia-nikad sapejul Jesúszhe kote chogal:

—Jesús Pab-Pul-Tummad-e-Machiye, čibiga pe ankin yoledani-wedeye? An peje wile, pe melle sapejul an-imakoye.

²⁹(Imi teun Jesús pato niaga chogzhagusdo: “Pedin keg-chulgu we tule-akar pe noenab.” Tenal tulemal melugus ezha-tubgin chunkalgin tegin naggin tule-nia-nikad-etinmalan, melle wakingal. Tegin tulemal tule-nia-nikad-takkwisdamalbal. Tenal nia tulegin tognonikil, tule ilgwen ezha-tubetilenad idirda, neg-nikchulidbal wakisda.)

³⁰Tegin Jesús tule-nia-nikadzhe ekichial:

—Igi pe nugdé?

Tegin tule-nia-nikad Jesúsga chogal:

—An nug Ichejulid.

—Tenal ibiga Ichejulid nug pe ebinzhe? Imi nia we tulegin íchejul-mamikidbal weob nugdo. ³¹Tegin niamal kannan-kannan Jesúszhe wilenaigualmal melle Jesúsde nia-oturdaleged-negzhe e-palmidgal.

³²Imi teun takalgu, chinmal-ichejul yal-abal mas mabukmal. Al niamal Jesúszhe wilegalmal emalde nabir chinmalgin ukpoodewa. Tegin Jesús niamalga igal-ukchajun chingin ukpogal.

³³Tegin niamal tule-akar nodmalgu, ilgwen chingin ukpotapmalzhun. Tegidgin chinmal arpak koelegalmalgu, pulal turmadmal, yal-urchikal-kwichidgin mataje pél apatismal. Tegin chinmal pél tigin ogangusmalzhun.

³⁴Tegin tulemal-chintakpukmalad takchagu chin-ogangusmal, abarmadmal tulemal-igalbal-mamimaladga choge-nad tegin tule-neg-kweburginmaladga

choge-nadmalmo. ³⁵Tegin tulemal wisgusmalgu tule-nia-nika-nad nugus tegin chinmal ogangusmal, al tulemal taknadmalzhun igi immal kujad.

Tegin tulemal Jesúszhe nonimalgu, tule-nia-nika-nad-taknonimal Jesús-nabal mol-yowinued-chii, pato koelegal-chul. Al tulemal Jesús-tobgualmalzhun. ³⁶Tegin tule-takchamalad tule-nonimaladga palchogzhamal tule-nia-nika-nad igi nugus.

³⁷Tegin Gerasa-tulemal-pel-kwapa Jesús-gin-kwakijadbal Jesúszhe wilenaigualmal ilgwen kannan Gerasa-neg-akar negal. Al Jesús kannan ulgin nakwisbal kannan negal.

³⁸Tegin tule-nia-nika-nad Jesúszhe wilenaigualmo, Jesúsbak mes negalmo. Tenal Jesús we tulega chogal:

³⁹—Tenal pedin keg anpak neel. Tenal pedin kannan aga negzhe neenab tulemalga pél palchoggal Pabdin igi pe-nudas.

Tegin tule-nia-nika-nad nadzhun, tule-neg-kweburgin-pukmaladga pel-kwapa palchogzha Jesús e-nudaspajad.

Jesús purkwijad-akar Jairo-chiskwa-otulojad tegin ome-yeed-nudasbalid

(Mateo 9:18-26; Marcos 5:21-43)

⁴⁰Tegin tulemal wisgusmalgu Jesús mata-opakal-akar tani, al tulemal-ichejul Jesús-abintabukmal. Tegin tulemal yer Jesús-abingasmalzhun.

⁴¹Tegidgin tule-walgwen Jesús-abir chimitinoni. Tenal we tuledin Judio-ormaked-neg-e-tummad-walgwen. Tenal we tule nug Jairo. Tegin Jairo Jesúszhe wilenoni e-negzhe negal. ⁴²Imi teun takalgu, e-chiskwa-walkwénnagwad-pirkaambe-kakabo-nikad iche-napi-purkwedani-mai. Tegin Jesús Jairoga chogal:

—Tegil nabirde, an pebak negzhe naodo.

Tegin Jesús Jairo-negzhe nadedgin, tulemal-ichejul Jesúsbak ali-ali natapmalmo.

⁴³ Imi teun takalgu, ome-walgwen Jesúsbak natapmo. Tenal we ome pirkaambe-kakabogus aga e-purpatakedbak a-imadii. Tenal ome ina-tulganzhe ina chaabin, tenal omega yabli ina kwen kuszhulkus, ((tenal ome pinche-pakal pél aga mani misbal)). ⁴⁴ Tegin ome yankalbal-akar Jesús-mol-turpaturpad ebusgu, apka-pakal omega e-ponigan akunoni.

⁴⁵ Tegidgin Jesús chogal:

—¿Toa an-ebusdé?

Tegin tulemal-wal-walgwen Jesúsga chogalmal:

—An wichíwa toa pe-ebus.

Tegin Pedro Jesúsga chogal:

—Tummad, ¿pe takchulzhí tulemal-ichejul pegin yolenanimal? ¿Igi pe wisguo: ‘We tule ankin walmas?’

⁴⁶ Tegin Jesús kannan chogbal:

—Tenal an wisdo, tule-walgwen an-ebus. Tenal an naga mag itos, an tule-walgwen-nudas.

⁴⁷ Tegin ome itosgu Jesús e-wisgus, ome ampayo Jesús e-takeddu, tu-tu-tu-tu Jesús-abir chimtinoni. Tegin ome tulemal-wagin Jesúsga chogal, ede yola-pirkambe-kakabo-kus aga poniganbak a-imadii. Tegin ome chogbal ede Jesús-mol-tuku-ebujadgin apka-pakal ega e-ponigande akunoni.

⁴⁸ Tegin Jesús omega chogal:

—Puna, pe ulubgin ankin penzhul-kunonikidbal, pe nugus. Imisgin pe akalzhul nejunno.

⁴⁹ Tegin Jesús ampa ome-nugujadbak chunma-kwichidgin, tule-walgwen Jairo-neg-akar noni. Tegin we tule Jairoga chogal:

—Jairo, pe-chiskwa pato purkwis. Pe melle Tule-oturdakedzhe pal wilego, pebak negzhe negal.

⁵⁰ Tenal Jesús tule-Jairoga-chognonikid itosgu, Jairoga chogal:

—Pe melle akal-itogo, ankinbi pe unnila ibzhao. Tenal pe ankin ibzheel, pe-chiskwa yabli tullego.

⁵¹ Tegin Jesús Jairo-negzhe omosgu, tule-pimalad-odagal kwen imaszhl. Tenal Jesús unnila odos; Pedro, Juan, Jacobo tegin puna-purkwijad-e-pab tegin e-nan. ⁵² Tenal tulemal-negginkukmalad ponanimal, tegin pukib-itogedbal puna-purkwijadga okormananimalbal. Tenal Jesús tule-okormananimaladga chogal:

—iMelle pe pomalma! We puna purkwiszhl, pinche kabmai.

⁵³ Tenal tulemal Jesúsga allealmal, tenal tule-ponanimalad nued wismaldo, punade purkwis.

⁵⁴ Tenal Jesús chunkalbal punakasu, punaga chogal:

—iPuna, pe kwisguma!

⁵⁵ Tegidgin puna-purpa kannan punagin tognonibalgu, puna ilgwun kwisgudzhun. Tegin Jesús puna-enanganga chogal:

—Masgin pe puna-okunno.

⁵⁶ Tegin puna-kannan-tullejad-e-pabgan weob pakal pesmal. Tenal Jesús puna-e-pabganga chogal:

—Pe melle tule-pimaladga pe palchogo, puna igi kannan tullejad.

Imi teun Jesús weob Jairo-chiskwa-otulosdo.

Jesús walambe-kakabog e-nuggin-palmilegalmalad-palmijad

(Mateo 10:5-15; Marcos 6:7-13)

9 Tegin Jesús aga e-chapingan-walambe-kakabogwadzhe kocha ormagal. Tegin Jesús ormabukwadgin, aga e-chapinganga igal-ukcha kannaleged-nikugal tulegin-nia-onogal, tegin tule-yemalad-nudagalbal. ² Tegin Jesús aga e-chapingan-palmidzhun tulemalga Pab-neg-takmaidgin chunmagal, tegin tule-yemalad-nudagalbal. ³ Tenal Jesús ampayo

aga e-chapingan-palmieddu, aga e-chapinganga chogal:

“Imi pe nadmalal, pe melle kabaston chedo, pe melle muchila chedo, pe melle mas-kunned chedo, pe melle mani chedo, tegin pe melle mol-ogwaged chedbalo, chunkal-kwabi pe nemalo.”⁴ Imi meke-ibi-neg-kweburzhe pe omojal, ibi-neggin pe togdapódin, pe ilgwen we neggin peio, pe-needzhe.

“Imi meke-pia pe omos-dewa, tulemal pe-kwen-abingashulil, pe ilgwen we neg-kwebur-akar pe nao. Tenal pe we neg-kwebur-akar alil, pe kutargin nap-pur-nanikid pe opat-opat imako oyogal, Pab-kakapurwa pato we tulemalzhe arpi, tenal tulemal yabli Pab-kakapurwa kwen abingashulmal. Tenal tegi-kuo, Pab-kakapurwa we neg-kweburzhe pal kwen nonikojul-kuo.”

Tenal teun Jesús weob aga e-chapingan-uanaís Pab-neg-takmaidgin chunmagal.

“Tegin Jesús-e-chapingan nadmalgu, neg-kwebur-purwigana-chijiid-ilbal Pab-kaka-nuegangin chunmake-nadmal tegin tule-yemalad-nudake-nadmalbal.”

“Imi teun Errey-Herode wisgus, Jesús immal imadiid. Tenal teun tulemal-wal-walgwen chogdimal, we Jesúsde Juan-Bautista-kannan-tullejad.”⁸ Tenal tule kwen chogdimalmo, Jesúsde Pab-kaka-palchoged-Elías. Tegin tule kwen chogdimalmo, Jesúsde akpene-Pab-kaka-palchoged-purkwijad-walgwen-kannan-tullejad. Tenal tulemal-akal-akal-chogdiibal, al Herode chuli-pinzhé-pes.

“Tegin Herode chogalzhun:

“¿Imi ante Juan-tukal-idiriszhulzhí? ¿Tede toa-tulejun an itogedde?”

Tenal te-ulgin Herode sanal Jesús-takpi-kualzhun.

“Tegin Jesús-nuggin-palmilegalmalad-walambe-kakabogwad

kannan Jesúszhe nonimalgu, pél Jesússga chognonimal, emalga igi immal kujad. Tegin Jesús pidzhi aga e-chapingan-walambe-kakabogwadbak Betsaida-neg-kweburzhik nadmal.

Jesús miliatal masgin tulemal-okuchad

(Mateo 14:13-21; Marcos 6:31-44;
Juan 6:1-15)

“Tenal tulemal wisgusmalgu Jesús Betsaidazhik nad, tulemal Jesús-cholbal nadmalmo. Tegin Jesús weligwal tulemal-abintas, tegin Pab-neg-takmaidgin tulemalga chunmas, tegin Jesús tule-nudalegoed-napimalad-nudasbal.”

“Tegin neg-chedoalgu, e-chapingan-walambe-kakabogwad Jesúszhe nonimal. Tegin e-chapingan Jesússga chogalmal:

“Imi animal neg-kweburgin pukchul-choggú, al pe tulemal-palmienabmal, we tulemal neg-kwebur-purwiganaigin tegin tule-nagnugin-mamimaladzhe nemalgal, aga mas-kunned wis pakmalgal.”

“Tenal Jesús aga e-chapingan-walambe-kakabogwadga chogal:

“Tagoed. Tenal pemal we tulemalga mas-uked-wilubmal.”

“Tegin e-chapingan Jesússga chogal:

“Tummad, animal we tulemalga mas-kunned kwen paknejulil, mas-kunned kwen nikchul tulemal-okunkal. Imi animalga madú-walatal tegin ua-ukabo wis mai. ¿Tede animal igi tulemal-okunmaló?”

“(Imi teun tulemal-tégín-pukmalad macherganbi-miliatal, omegan tegin purwigana kwen choglejul.)”

“Tegin Jesús aga e-chapinganga chogal:

“Imi pemal tulemalga chognemalo, wala-tulabo-

kakaambegin tunnul-tunnul
ampagumalo.

¹⁵Tegin Jesús-e-chapingan tunnul-tunnul tulemal-urpismalzhun. Tegin tulemal Jesús-chogzhadyob pél ampagusmalzhun.

¹⁶Tegin Jesús madu-walatal-tegin-ua-ukabo-chusgu, Pab Tummadga tog-nuedi chogzha. Tegin Jesús purwi-purwi madu pipichisgu, madu Jesúsga melgud. Tegin Jesús purwi-purwi ua-pipichisbalgu, ua Jesúsga melgudbal. Tegin Jesús aga e-chapinganga madu, ua-ukchagu, tulemalga chiapchun aga kunmalgal.

¹⁷Tegin tulemal-pel-kwapa immedzhe mas-kuchamalgú, ampa madu, ua-okpis. Tegin Jesús-e-chapingan mas-okpitchad ampa karpa-kwaambe-kakabog wesmal.

Pedro Jesúsga chogzhagujad:
“Pedin Pab-Machi-chunnad”

(*Mateo 16:13-20; Marcos 8:27-30*)

¹⁸Imi te ibagwengin Jesús pidzhi Pabzhe-kolnaidgin, e-chapingan Jesúsbak kudimalmo. Tegin Jesús aga e-chapinganzhe ekicial:

—¿Tulemal igi ankin chogmal, ante toa-tule?

¹⁹Tegin e-chapingan Jesúsga chogal:

—Tulemal-kwénna-kwénna chogmaldo, pede Juan-Bautista-purkwijad. Kwéntin chogmo, pede Elías-patoun-purkwijad. Kwéntin chogmo, pede Pab-kaka-palchoged-pid-kannan-tullejad.

²⁰Tegin Jesús aga e-chapinganzhe ekicialmo:

—¿Anná, pesimalde igi ankin chogmalmode, ante toa-tule?

Tegin Pedro Jesúsga chogalzhun:

—Pedin Cristo-Pab-akpene-choghad-palmidagoed-tule.

²¹Tegin Jesús aga e-chapinganga chogal:

—Imi pe melle tule-pimaladga pe palchogo, antin Pab-akpene-choghad-palmidagoed-tule.

Jesús aga chogzhagujad ede purkweenab

(*Mateo 16:21-28; Marcos 8:31-9:1*)

²²Tegin Jesús aga e-chapinganga chogal:

—Imi an-Te-Tule-Chunna peyedzhe wilegenab, tegin Judio-chelegan-tummagan an-kwen-abingaojulmal, tegin tule-irwal-Pabzhe-kolmalad-e-tummagan an-kwen-abingaojulmalbal, tegin Moisés-igalgin-tulemal-oturdamalad an-kwen-abingaojulmalmogo. Tegin tulemal an-mesmalo. Tenal an ibapágún kannan tullenonibalo.

²³Tegin Jesús pel-kwapa tule-e-itobukmaladga chogal:

“Imi meke-ibi-tule anpal naigubiel, we tule pane-pane aga tukingabi pal kwen pinzhejulinab. Tenal we tule kuakwa kudiinabbal anka purkwegal, tule nakrusgin aga purkwe-natapidyo. Tenal tule an-chogzhadyob naneel, kep ankin turdanoniko.

²⁴“Tenal meke-ibi-tule anpal-naidbal yapa purkwejogel we tule yabli pelgunoniko. Tenal meke-ibi-tule anpal-naidbal akalzhul purkwejogel, we tule kannan tullenoniko. ²⁵Imi tule iti-napkin pel-kwapa immalmal nikunonikilen, tenal purpa-abonoged kwen nikchulil, ɿibi-nued we tulega kunoniko pe ebinzhe? Chulá. ¿Tenal tule ibi-immalmal-ukedgin unnigu aga purpa abonagal melle sapejul oturdalegal? Chulá. Keg kue. Tenal immal kwen nikchul tule aga purpa abonogal.

²⁶“Imi meke-ibi-tule ankin chogzhal; ‘Ante wichí wedin toa-tule,’ tegin an-chogzhadgin chogzhabalil, ‘An we kaka wichul,’ an-Te-Tule-Chunna nugu-taklegedgin tegin an naga kannaledgedgin tegin Pab-Tummad-kannaledgedgin iti-napche angelman-kannaledgedgin an kannan tanikil, an we

tulegin chogmogo: 'An wichí wedin toa-tule.'

²⁷ "Tenal an chunchunnad pemalga chogdo: imi tulemal-pukwad-wal-walgwen ampayo purkweddu Pab-neg-takmaid takmalo."

Jesús arpak chipú kanoni-kujad

(Mateo 17:1-13; Marcos 9:2-13)

²⁸ Tegin Jesús aga e-chapinganbak chunmajad ibapábak-kuchaledgin, Jesús walapá aga e-chapingan-ches: Pedro, Juan tegin Jacobo, pelugles Jesúsgin walabake. Tegin we tule-walabakegwan yal-tummad-pirzhe nadmal Pab Tummazhke kolgal.

²⁹ Tenal teun Jesús Pabzhe-kolnaidgin, arpak e-wagal akalgunoni. Tegin Jesús-e-mol ilgwen chipú pi-pip-pes. ³⁰ Tegidgin tule-walbo yer-taklegedgin Jesúsbak chunmanonimal. ³¹ Tenal we tule-walbogid, Moisés tegin Elías. Tenal we tule-walbogid Jesúsimichal-Jerusaléngin-purkoedgin chunmasmal.

³² Imi teun Pedro tegin e-pakamalad kabidzhá-pukwamal. Tenal Pedromal nued atasmalgu, takalmal, Jesús nugu-taklegedgin tule-walbogidbak chunmagwis.

³³ Tegin Moisés, Elías Jesús-akar nejogalidgin, Pedro Jesúsga chogal: —Tummad, animal wegin nued pukwamal. Imi animal pemalga kwápá obuneg chobnemal: pega kwagwen, Moiséska kwagwen tegin Elásiga kwagwenmo.

(Tenal Pedro immal-kwen-wichulidgin chunmas, ede ibi chognai.)

³⁴ Tegin Pedro ampa chunmanaidgin po aktenoni, tegin po pel-kwapa Jesúsmal-edunonimal. Tenal Pedromal po-tar-edudanikidgin kwakialmal. ³⁵ Tegin Pedromal po-yabal ukposmaladgin, tule-kakapurwa kolnoni chogal: "Wedin an-Machi, an-tar-nugzhajad

anka immal-imagal. Imi pemal nue an-Machi-itogenabmal."

³⁶ Tegin Pab-kakapurwa pél chunmasgu, Jesús-e-chapingan pato takalmal, Jesúsbi walkwénna kwichi. Tenal Jesús-e-chapingan tule-pimaladga Jesús-akalgujadgin kwen chunmaszhulmal, ilgwen yakir pesmal.

Jesús tule-machigin-nia-maid-onojad

(Mateo 17:14-21; Marcos 9:14-29)

³⁷ Tegin te pangin, Jesús aga e-chapingan-walapágwadbak yal-akar aktenonimalgu, takalmal tulemal-íchejul Jesús-abintabukmal.

³⁸ Tegidgin tulemal-pukwad-abalgin tule-walgwen sapejul kolal chogal:

—Tule-oturdaked, an-machi-walkwénna-nikadbal an peje wileye, pe an-machi-wis-pentakoye.

³⁹ Imi an-machi nia-nika. Tenal nia an-machigin tognonikil, arpak kolmakalda. Tegin an-machi neg-owedel, pela-pela pintomakalda, tegin kaka maku-makaldabal. Tegin nia keg machi-iptakedbal pul-pule chabzhul machi-e-chan imanatap.

⁴⁰ Tenal antin pe chapinganzhe wilejan an-machigin nia-onogal, tenal pe-chapingan kwen unniguszhulmal we nia-onogal.

⁴¹ Tegin Jesús chogal:

—¿Imi pemal-anakin-penmalad tegin pe-yapa-an-itomalad, an inkwáje pemalbak kudiguenaabmal-wede ankin penzhulmalgal?

¿Tegin an inkwáje pemal-abin-purtidio-wede, pemal kep ankin ibzhemalgal? Nabir. Imisgin pe anka machi-chedado, an pega nudagal.

⁴² Tegin tulemal Jesúszhe machi-cheidanimaladgin, nia machi-olas. Tegin machi neg-owedgu, pintomamai-pes. Tenal Jesús niaje ulusgu, machi-nudas. Tegin Jesús machi-e-pabga nuedgin kannan machi-ukchabal. ⁴³ Tegin tulemal-pel-kwapa-takpukmalad

Pab-Tummad-kannaledged takchamalgu, weob pakal pesmal.

Jesús ilabogus aga chogzhagujad ede purkweenab

(*Mateo 17:22-23; Marcos 9:30-32*)

⁴⁴Tegin tulemal Jesús-machi-nudajadgin ampa weob pakal pejadgin, Jesús aga e-chapinganga chogal:

—Machimal, an pemalga-immal-chogoed pe nukwa itomalo pe melle igemagal. Imi an-Te-Tule-Chunna tulemalzhe uklenoniko.

⁴⁵Tenal Jesús-e-chapingan Jesús-chogzhad aku-itomal ibi chog. Tenal Pab Tummad Jesús-e-chapinganga igal-kwen-ukchajul Jesús-chogzhad itogal. Tegin Jesús-e-chapingan Jesús-tobgualmal Jesúszhe immal ekisgal ibi chogle-wede.

Jesús-e-chapingan aga imakal-kujad toa pul tule-tummadga kuo

(*Mateo 18:1-5; Marcos 9:33-37*)

⁴⁶Imi teun takalgu, Jesús-e-chapingan aga emal-emal imakalmal chogalmal, toa emal-abalgin pul tule-tummadga kuo. ⁴⁷Tenal Jesús wisgusgu e-chapingan aga ulubgin igi pinzhenanimal, Jesús machi-toto-amis tegin e-nabal okwisnoni. ⁴⁸Tegin Jesús aga e-chapinganga chogalzhun:

—Imi meke-ibi-tule an-nuggin yer machi-toto-abingajal, we tule pato weligwaledgin an-abingasco. Tenal meke-ibi-tule yer an-abingajal, we tule pato weligwaledgin Pab-an-palmialid-abingasco. Imi tule pemal-abalgin pul mosyob naneel, we tule pul tule-tummad.

⁴⁹Tegin Juan Jesúsga chogal:

—Tummad, animal tule-walgwen-takcha pe-nuggin tulegin nia-onodii. Tenal tule-animal-pakadzhulidbal animal we tulegin igal-kasmal melle pe-nuggin nia-onogal.

⁵⁰Tegin Jesús Juanga chogal:

—Pe melle tulegin igal-kao an-nuggin tulemalgin nia-onogal.

Tenal meke-ibi-tule animalbak istar chulil, we tule animalzhikidmogad.

Samaritano-tulemal yapa Jesús-abingegusmalad

⁵¹Tegin Jesús-e-wilubgan omosgu Pab-negzhe kannan negal, Jesús aga tukin chognoni, ede keg-chulgú Jerusalén-neg-kweburzhe neenab.

⁵²Tegin Jesús igalbal-natapidgin, e-iktual Samaritano-neg-kwebur-totoje aga e-chapingan-palmis ega neg-toged amigal. ⁵³Tenal Jesús-Jerusalénzhe-natapidbal, Samaritano-tulemal-pukmalad Jesús-kwen-abingaszhulmal.

⁵⁴Tenal Jesús-e-chapingan-Jacobo-tegin-Juan takchamalgu Samaritano-tulemal yapa Jesús-abingegusmal, Jesúsga chogalmal:

—¿Tummad, imi pe pei, animal Pabzhe kolmal nikpa-neg-akar cho palmidagal we tulemal-opelogal, ((akpenegwad-Pab-kaka-palchoged-Elías imajadyob))?

⁵⁵Tenal Jesús Jacobo-tegin-Juanzhik akpiridgu, Juanmalga chogal:

—Machimal, čibiga pe tule-mejedgin pe chunmanani-wede? Pe weob chunmaked-wilubzhulmal. ((Pe wiszhulzhí pe ibi-purpa nikamal? ⁵⁶Tenal an-Te-Tule-Chunna iti-napche noni tulemal-abonogal, tulemal-opelogal chul.))

Tegin Jesús neg-kwebur-pidzhe nadmalzhun.

Jesús chogzhagujad tule ebak nanebiel, wilegenabmo

(*Mateo 8:18-22*)

⁵⁷Tegin Jesús aga e-chapinganbak ampa igalbal-natapidgin, tule-walgwen Jesúsga chogal:

—Tummad, meke-pia pe naódin an pebab nemogo.

⁵⁸Tegin Jesús we tulega chogal:

—Tenal pe nukwa pinzheenabgwel. Imi chug-achu nap-ya nika meggal, tegin chikwimal

ampa u nika-nemalmo meggal.
Tenal an-Te-Tule-Chunnadin neg
pel nikchul wis ulukugal. ¿Tenal pe
anyob unnigumogojí neg-nikchul
nanegal? Imi pe unnimogal, pe
akalzhul anpak nemogodo.

⁵⁹Tegin Jesús tule-pidga chogal:
—Anpak nemalma ankin
turdagal.

Tegin tule Jesúsga chogal:
—Tummad, an pebak nabir
naoendo, tenal an pilal naga pab-
taknegwelo. Tenal an-pab-
purwijad-cholbal kep an pebak
nemogo.

⁶⁰Tegin Jesús we tulega chogal:
—Chuli machi. Imi
tule-purkwemaloed meke tule-
purkwaled-e-mui-tigmalo.
Tenal pedin tulemalga Pab-neg-
takmaidgin chunmanao.

⁶¹Tegin tule-pid Jesúsga
chogalmo:
—Tummad, an pebak
nebimogando, tenal an pilal naga
napi kwenamalad taknegwelo.
Tenal an kwenamalad-takapid-
cholbal kep an pebak nemogo.

⁶²Tegin Jesús we tulega chogal:
—Chuli machi. ¿Pe wiszhulzhí,
tule nap okpinail, nuekwa
takenab inniki chedgal? Tenal pe
nuekwa takchulil, pega ibga kwen
kunonikojul. Tenal tule-Pab-neg-
takmaidga-arpaged ampamo. Imi
pe igal-akpenegwad ebejulil, pega
ib-nuedga kwen kunonikojul.

Jesús wala-tulapá-kakaambe- kakabog aga e-chapingan- palmijad Pab-igalgín chunmagal

10 Tegin Jesús pél
chunmajad-cholbal,
wala-tulapá-kakaambe-kakabog
aga e-chapingan-nugzhas
e-iktual negal. Tenal Jesús
neg-kwebur-tummaganzhe
tegin neg-kwebur-purwigana-
e-naoedzhe wal-walbogin aga
e-chapingan-palmijogal.

²Tegin Jesús aga
e-chapinganga chogalzhun: “Imi
tule-ichejul nika Pabbak naigugal,
tenal tule walpókwa wis nika
Pabga arpagal. Al an pemalga
purpal chogzhundo: imi immal-
kwa-weied ichejul nai weigal. Tenal
tule-weimalad walpókwa wis nika.
Tenal Pab immal-kwa-weied-e-ibed-
choggú, al pe Pabzhe wilegenabmal
tule-pimalad-palmidagal Pabbal-
naigugal tule-imagal, tule
immal-kwa weiedyob.

³“Imi antin purkwed-abalgin
tulemalzhe pe-palmine, oveja-
mimmi achú-kwegwed-abalgin
kudmaladyob. Imisgin pe
nadmalzhundo. ⁴Tenal pe nadmalal,
pe melle mani chedo, tegin pe
melle muchila chedo, tegin pe melle
kutar-ogwaed chedmalbalo. Tegin
pe igalbal tule-takalil, pe melle
kwisguo tulebak chunmagal.

⁵“Tegin pe neg-togedzhe
tognatapil, pe chognatapo: ‘Anná,
tegidde. Imi pemal-wegin-pukmalad
akalzhul ampagumalalen, nabirin.’

⁶“Tenal we neggin tule-
akalzhul-itogedgin-naneed mail,
pe-we-tulega-chogzhad-yopí keg-
chulgu targa kued-wilub. Tenal
we tule-ulubgin-akalzhul-itoged
maichulil, pe-targa-chognonikeyob
kwen kuojul-kuo. ⁷Tenal pe
neg-togzhadgin tule pega meke-
ibi-immala ukchal kunkal o kobgal,
pe kunno pe kobo. Tenal pe melle
neg ogwa-ogwa-nanemalo, pe
ilgwen we neggin peio, pe needzhe.
Imi tule e-arpagedbal keg-chulgu
akwilegenab. Al pemal pinche
akwilegenabmalmo.

⁸“Tegin pe neg-kweburzhe nonikil,
ibi-mas tulemal pega ukmalódin, te
mas-kunned pe kunno. ⁹Tegin pe
tule-yemamimalad-nudako. Tegin
pe tulemalga chogo: ‘Pab-neg-
takmaid pato pemal-omodan.’

¹⁰“Tenal pe neg-kwebur-
kwagwenzhe omojal,
tenal tulemal-pukmalad

pe-kwen-abingaszhulmalal, pe neg-kwebur-igalmalbal pe nao. Tegin pe chogo: ¹¹ ‘Imi pemal-animal-abingaszhulidbal anmal kutargin nap-pur-nanimaladzhe-pakal opatnemal oyogal anmal pemalzhe pal kwen tanikojul, pemalga Pab-igalgan chunmagal. Tenal pe nuekwa wisgugal an pemalga chogdo: Imi Pab-neg-takmaid pato omodani.’

¹² ‘Imi an chunchunnad pemalga chogdo: imi Pab Tummad sapejul tule-oturdakoed-wilub nonikoedgin, we neg-kweburgin-tulemal-pe-abingaszhulmalad Sodoma-tolganga pul-pule sapejul oturdalenoniko.’

Jesús neg-kweburmal ukapchajad

(Mateo 11:20-24)

¹³ Tegin Jesús chogalbal: ‘¡Corazín-tolgan anpi pe wilesmala, pemal peyedzhe oturdalenoniko! ¡Betsaida-tolgan anpi pe wilesmalmoma, pemal peyedzhe oturdalenonimalmogo! Tenal Tiro-tolgan tegin Sidón-tolgan pemalyob immal-taktijulmalad takchamalalen, pato tikajulgus cho-purgin obzhamalan, tegin chagu-mol yosmalbalin, oyogal emalde aga ulubgin iskuedgin pukib-itonominal. ¹⁴ Al Pab-tulemalga-igal-itoged-ibegin pemaldin Tiro-tolganga tegin Sidón-tolganga Pab Tummadzhe pul-pule sapejul oturdalenonimalo.’

¹⁵ Tegin Jesús chogalbal: ‘Capernaum-tolgan, épmal ebinzhebukmal peyedzhe otummoledi-kuo? Chulá. Tenal pemaldin ankin-ibzhejulidbal pul-pule nug iskunonimalo.’

¹⁶ Tegin Jesús aga e-chapinganga chogalbal: ‘Imi tule yer pe-chunmaked itosmal, we tule yer an-chunmaked abingasmo. Tenal tule pe-chunmaked abingaszhulil, we tule an-chunmaked kwen abingaszhulmo. Tenal tule

an-abingaszhulil, we tule-an-palmialid-kwen-abingaszhulmo.’

Tegin Jesús-e-chapingan nadmalzhun Jesús-ega-chogzhadyob immal-imagal.

Jesús-e-chapingan wala-tulapá-kakaambe-kakabogwad kannan Jesúszhe-akpirnonimalad

¹⁷ Tegin Jesús-e-chapingan-wala-tulapá-kakaambe-kakabogwad weligwaledgin kannan Jesúszhe akpirnonimalgu, Jesúsga chognonimal:

—Tummad, imi niamalzhe-pakal anmal-pe-nuggin-immal-imajadbal anmalbal ibzhasmal.

¹⁸ Tegin Jesús aga e-chapinganga chogal:

—Tenal pe melle tummarba itomalo. Imi an takchado nia-sagla-Satanás tummarba-itogedbal nikpa-neg-akar maripedyob iti-napche arkannoni. ¹⁹ Tenal an pemalga igal-ukchado, nakpemalgin tegin tiolmalgin annegal. Tegin an pemalga igal-ukchabal pemal pe-aichulid-Satanás-kannaledgedgin nakwegalbal. Tenal pemal yabli kwen naklik-kunonikojulmalbal. ²⁰ Tegin niamal-pe-chogedbal-ibzhajadbal pe melle welgumalo. Tenal Pab-neggin pe-nug-nermalejadgin pe welgumalo.

Jesús weligwal itononikid

(Mateo 11:25-27)

²¹ Imi teun Jesús Pab-Purpa-Nued-nikadbal pela-pela weligwaledgin chogal: ‘Pabye, an pe-otummoye. Imi pe nikpa-neggin tegin iti-napkin e-Tummadga maiye. Tenal pe tule-immal-wismalad tegin tule-nono-nikmalad an-immal-imajad aku-itogal pe imasbalye. Tenal an-immal-imajad pe mag-itogal tule-polgana-imasbalye. Al an pe-nug otummoye. Pabye, an wisdo, pe yer itos weob immal imagalye. Imi pe weob immal-imajadyob an weob peigunainye. Pitogua.’

²²Tegin Jesús chogbal: “Imi an-Pabdin pel-kwapa anka immal ukcha an immal imagal. Tegin tule-kwen-nikchul nuekwa Machi-wisgugal, tenal e-Pabbi nuekwa e-Machi-wiis. Tegin tule-kwen-nikchulbal nuekwa Pab-wisgugal, tenal e-Machibi nuekwa e-Pab-wismo. Tenal e-Machi aga e-itolegedbal tule-imma e-Pab-wisgugal.”

²³Tegin Jesús aga e-chapinganzhik akpiridgu, e-chapingangabi chogal: “Imi pe-immal-an-immal-imajad-takchadbal, ib-nued pemalga kus.
²⁴Imi an chunchunnad pemalga chogdo: Pab-kaka-palchogmalad-ichejul tegin erreymal-ichejul pe-immal-takchiidyob takpi-kusmogan, tenal we tulemal yabli kwen takchajulmal. Tegin we tulemal pe-immal-itosmalad itobi-kusmalmogan, tenal we tulemal yabli kwen itoszhulmalbal.”

**Jesús purpal chogzhagujad
Samaritano-tule,
tule-mellemaid-pentajad**

²⁵Tegin te ibagwengin tule-pirkin-Moisés-igal-wijiid arpak kwisgual Jesús-wilub-takegal. Tegin tule-pirkin-igal-wijiid Jesúsga chogal:

—Tule-oturdaked, ¿an igi imakel nabir ilagwen Pab-neggan meggal, tegin an melle pal purkwegalbal?

²⁶Tegin Jesús we tulega chogal:
 —Nabir. ¿Tenal Moisés-igalgín igi nermakal-mai-chogna? ¿Igi pe apcho?

²⁷Tenal tule-Moisés-igal-wijiid Jesúsga chogal:

—Imi pe Pab-Pul-Tummad-pilalguenab, pél aga pe-ulubgin-itogedzhe, pél pe-purpaje, pél pe-kannaled-nikadzhe, pél pe-pinzheedzhe, pel-kwapa.

Dt. 6:5

Tegin pe aga tukin chan
pilaledyob
tule-pe-tikalbal-mamimalad
pe pilalguenabmalbal.

Lv. 19:18

²⁸Tegin Jesús we tulega chogal:
 —Eye, pe nued chogzhado. Tenal pe chogzhadyob pe naneel, pe ilagwen-nadgu tullego, pe pal kwen purkojul-kuo.

²⁹Tenal tule-Moisés-igal-wijiid, melle tule-kegeyob peigal, Jesúsga chogbal:

—Nabir pe anka chogzhando, čtenal toa-tulemalzhun an-tikalbal-mammaladdé?

³⁰Tegin Jesús purpal tule-Moisés-igal-wijiidga chogal:

“Nabirdo. Imi te ibagwengin tule-walgen Jerusalén-akar Jericóje nad. Tegin tule igalbal-natapidgin tule-iskana-abingus. Tegin tule-iskana we tulegin mol chus. Tegin tule-iskana peyedzhe we tule-sakisbal. Tegin tule-iskana igalbal neg-wichul mellemai we tule-ebesbal.

³¹“Tegidgin tule-irwal-Pabzhe-koled-walgen igalbal immal-kwen-wichul tanikidgin, arpak mellemai tule-taknoni. Tegin tule-irwal-Pabzhe-koled mellemai tule-takchagu, tikabal tule-mellemaid-ebiris. Tegin tule-irwal-Pabzhe-koled ilgwen ukin nad.

³²“Tegin tule-pid, tule-irwal-Pabzhe-kolmalad-pentamalad-walgen, tule-mellemaidzhe nonimo. Tenal tule-nonikid pinche imial tule-mellemaid-takchagu ilgwen ukin nadmo.

³³“Tegin Samaritano-tule-walgen ampa igalbal tanimogadgin panna tule-sakilejad-taknonimo. Tenal Samaritano-tule wilejakwa tule-sakilejad-taknonikidbal, tule-sakilejad-waglik kwisgunoni.

³⁴Tegidgin Samaritano-tule, tule-sakilejadga ina chaalzhun. Tegin Samaritano-tule, tule-sakilejad-

ya-chijiidgin kwallu tegin vino imas, tegin molgin ya-ebirmasbal. Tegin Samaritano-tule aga e-moli-burrogin tule-sakilejad-onakwisgu, tule-kabmalad-negzhe tule-yeed-ches. Tegin Samaritano-tule kabmalad-negggin nuekwa tule-sakilejad-takcha.

³⁵“Tegin te pangin Samaritano-tule neg-ibedga tulabo e-mani ukchagu, neg-ibedga chogalbal: ‘Imi pe anka nuekwa we tule-tako. Tenal an-pega-mani-ukchad ampa pega akuel, pedin, pe aga pe-manigin we tule-pentagwelo. Tenal an-kannan tanikil, pe-mani-owejadun an kannan pega penukbalo.’ Tegin Samaritano-tule ukin nadzhun. Pitogua.”

³⁶Tegin Jesús tule-Moisés-igal-wijidzhe ekichial:

—¿Imi piti we tule-walpágwad tule-e-waglik-mamimaladyob tule-sakilejad-pentas?

³⁷Tegin tule-Moisés-igal-wijiid Jesúsga chogalzhun:

—Samaritano-tule wilejakwa tule-sakilejad-taknonikidde.

Tegin Jesús tule-Moisés-igal-wijidzhe chogal:

—Pe nued chogzhado. Tenal pe imis-akar we Samaritano-tuleyob pe tule-pentakenabmo.

Jesús Marta-tegin- María-negzhe kalmanonikid

³⁸Tegin Jesús aga e-chapinganbak natapidgin, neg-kwebur-totoje omosmal. Imi teun ome-walgwen- Marta-nugad we neg-kweburgin chimo. Tegin Jesús we neg-kwebur-totoje nonigu, Marta weligwal e-negggin Jesús-abingas. ³⁹Tenal Marta urpa-nika. Tenal Marta-e-urpadin nug María. Tenal Maríadin Jesús-nabal chii-pes Jesús-itogal. ⁴⁰Tenal Marta echar-echar-immal-imanaidbal Marfagin Jesúsga chognoni:

—Tummad, ¿pe akal kwen takchul, an-urpa an-kwen-pentajul?

¿Ibiga pe keg Maríaga chogde an-wis-penta?

⁴¹Tegin Jesús Martaga chogal:

—Marta, imi pe ichejul immalma- cheedgin pinzheedbal, pe sae-itonai.

⁴²Tenal immal-choggwen pul-chunchoged naido. Tenal María pul-ib-nued chus an-chunmaked itogal. Tenal antin Maríaga kwen chogojul-kuo. ‘Pe we-akar nao.’

Jesús Pabzhe-koledgin e-chapingan-oturdajad

(Mateo 6:9-15; 7:11)

11 Imi te ibagwengin Jesús akne Pabzhe-kolnайд pelgusgu, e-chapingan-walgwen Jesúszhe wilenaigual chogal:

—Tummad, pe animal-wis- oturdama Pabzhe-kolgal, Juan aga e-chapingan-oturdajadyob.

²Tegin Jesús aga e-chapinganga chogalzhun:

—Imi pe Pabzhe kolneel, pe weob Pabzhe kolmalo:

An-Pab-nikpa-negggin-maidye, imi tulemal pegin chogmalalen, nabirin: ‘Pe-nugdin chwilimakalye.’ Tenal pe-neg-takmaid nonikilen, nabirbalinye. ((Imi nikpa-negggin pe-itelegedbal pél immal-kunaidyob, iti-napkin pe-itelegedbal pél immal-kunaimogalen, nabirbalinye.))

³ Imi pe anka pane-pane mas-kunned ukoye.

⁴ Pabye, imi tulemal:

ankin-walmajadbal an nega iskued pelgus chogzhadyob, pe anka iskued pelgus chogmogoye. Imi pe wilub-takleged-naidzhik, pe melle an-palmioye. ((Tenal pe iskuedgin- yoledanikid-akar pe an-onobaloye.)) Pitogua.

Imi pemal weob Pabzhe kolmalo.
5 Tegin Jesús aga e-chapinganga purpal chogalbal:

“Imi tule mutik-neg-kabgwen peje nonikal, tenal pe mas kwen nikchulil tule-nonikid-okunkal, ḡpe ilgwén ai-nuedzhe naojulzhí mas amigal? Tegin pe aizhe kolnatapo; ‘An-ai, an peje walapá madu wis amidani, ogwagal. 6 Imi an-ai-pid tikajul-akar anche noni. Tenal antin mas-kunned kwen nikchul an-ai-okunkal. Tenal pe madu nikale, pe anka madu wis uko.’

7 “Tegin pe-ai-neggín-maid pega chogo pe ebinzhe: ‘Pe melle anche kolma. Imi an-wanagak pato chaktigal chii, tegin anmal tegin an-nuskan pato pél kabmamimal. Al an kwen kwisguejul pega madu ukegal?’ Chulá.”

8 Tegin Jesús chogalbal:
“Tenal an chunchunnad pemalga chogdo: imi ai-neggín-maid pe-aiyadbal yabli kwen kwisguojul pega madu ukegal. Tenal pe-ai-neggín-maid melle pinkegugal keg-chulgu yabli unnigualedzhe pega immalmal-napi-kujiid uko.”

9 Tegin Jesús chogalbal:

“Al an pega chogzhundo: imi pemal Pabzhe immal ekismalal, Pab pega uko. Tenal pemal Pabzhe immal aminanimalal, pedin we immal onomalo. Tegin pemal Pabzhe pali-pali kolmalal tule-wanagakkin-kolnanikidyob, Pab pe-itogo, tule pega wanagak egenonikidyob.

10 “Tenal meke-ibi-tule Pabzhe immal ekisnail, we tule keg-chulgu immal-ekisnail nikunoniko. Tenal meke-ibi-tule Pabzhe immal aminail, we tule keg-chulgu immal onogo. Tenal meke-ibi-tule Pabzhe pali-pali kolnail, tule-wanagakkin-kolnайдyob, Pab keg-chulgu we tule-itogo, tule wanagak egajadyob.

11 “((Imi pe-machi peje madu ekisdanikil, pe machiga akwa uko? Chulá. Teginbal,)) ḡpe-machi peje

ua-ekisdanikil, pe machiga nakpeuko? Chulá. 12 Teginbal, ḡpe-machi peje kallin-nuzha ekisdanikil, pe machiga tiol-uko? Antin chog chul. 13 Tenal pemal tule-iskanagwando, tenal pemal yabli wiis aga nuskanga immal-nuegan ukmal. Al pe animal-Pab-nikpa-maidzhe Pab-Purpa-Nued-ekisnail, Pabdin pemalga pul-pule E-Purpa-Nued-uko.”

Teob Jesús chogzhagusdo.

**Tulemal yami Jesúsgin
chogzhagujad:
“Jesús niabal immal ima”**
(Mateo 12:22-32; Marcos 3:20-30)

14 Tegin te ibagwengin Jesús tulegin nia-keg-chunmaked-onosgu, tule nabir chunmanoni. Tegin tulemal-Jesús-takpukmalad weob pakal pesmal.

15 Tenal tulemal-wal-walgwen chogalmal: “Imi we Jesús nia-tummad-Beelzebú-kannaledegin tulegin nia-onimai.” 16 Tenal tule-pimalad Jesús wilub-takegal Jesúsga chogalmal: “Imi pe Pab-Tummad-akar anmalga wilub oyogenab pe Pab-nuggin nia-oni o chul-dewa.”

17 Tenal Jesús wiis we tulemal igi pinzhebukmal. Tegin Jesús tulemalga chogalzhun: “Imi meke-ibi-napa abal-marral chiil, pél neg iskunoniko. Tenal meke-ibi-neg-yagimmalad, aga abal istarmalal, kwen unniguojulmal mes pulakwa ampagugal. 18 Tenal nia-Satanás aga e-chapingan-onidel, aga abal istar kunonimalo. 19 Imi Satanás aga iskudmalalen, igi Satanás-neg-takmaid unniguelo? Keg kue. Tenal pemal-ankin-chognonikidbal antin Beelzebú-kannaledegin nia-onimai, al an pemalga weob chogzhado.

19 “Tenal an Beelzebú-kannaledegin tulegin nia-oniel, tede pe-chapingan toa-kannaledegin tulegin niamal-onimalmójun?

¿Imi pe-chapingan ampa nia-nuggin nia-onimalmojulzhí? Tenal pemal wismal pe-chapingan nia-nuggin niamax-kwen-onijulmal. Al pe-chapingan nia-oninaidgin pemalga oyos pe-ankin-chogzhad, ib-chunchunnad-chul.

²⁰“Tenal an Pab-kannaledgedgin niamal-oni-choggú, al wedin choglejundo, Pab-neg-takmaid pato pemalzhe noni.”

²¹Tegin Jesús purpal chogalbal: “Imi tule-kal-ibed es-annik aga neg-takmail, e-immal-mal tarbi kwen aturzhelegojul-kuo. ²²Tenal tule-neg-takmaidga pul tule-kal-ibed nonikil, tule-kal-ibed-maidgin nako. Tenal tule-nonikid tule-kal-ibed-maidgin nakwíjal, tule-kal-ibed-maidgin pél immal-mal idirnoniko, esgin-penzhulidzhe-pakal tule-kal-ibed-maidgin chulenoniko. Tegin tule-nonikid tule-pimaladga pél tule-kal-ibed-maid-e-immal-mal mimibalo.

²³“Tenal tule anpak naichulil, we tule anchikid-chul, tenal we tule anpak istargad. Tenal tule anka pulakwa tulemal-urpenaichulbalil, we tule pul-kigma anka tulemal-izhonai tulemal melle anpak naigugal.”

**Nia tulegin nojal,
tule-Pab-Jesús-abingashzhulidbal
tulegin kannan tognonibalo**

(Mateo 12:43-45)

²⁴Tegin Jesús chogalbal: “Imi nia tule-akar nojal, neg-ti-nikchulidbal pipirmadi-peio, neg-ulukued amigal. Tenal nia neg-ulukued onoszhulidbal kannan pinzhedago: ‘An pul kannan nao akpenegwad neg-nojadzhe.’

²⁵“Tegin nia tule-akar-nojadzhe kannan nonibalil, taknoniko neg turwial chii, pato kuakwa meggal.

²⁶Tenal nia takchal neg-olobi chii, kannan nao. Tegin nia aga walakugle e-pakamalad-ega-pul-nia-iskana-amio. Tegin nia aga e-pakmalad-amijal, we niamal-pel-

kwapa tulegin megnoniko. Tenal tule-nia-nikad akpenegwadga pul-pule iskunoniko.”

²⁷Tegin Jesús ampa chunmanaigdin, tulemal-abalgin ome-walgwen arpak sapejul kolal, chogal:

—Imi we ome-pe-nikujad tegin pe-otummojadga peyedzhe-ib-nuedga kus.

²⁸Tenal Jesús omega chogal:

—Imi pe nabir chogendo, tenal tule Pab-kaka itojal tegin Pab choged-pallí naneel, we tulega pul-pule ib-nuedga kunonikodo.

**Jesús chogzhagujad
Jonás-gin-immal-kujadbal
tulemal wisgunonimalo,
Jesúsde toa-tule**

(Mateo 12:38-42)

²⁹Tegin tulemal Jesúszhe pul-pule irmanonigu, Jesús tulemalgin chogal: “Imi imisgwagwad-tulemal, tule-nuegan-chul, tule-iskana. Tenal we tulemal peigujimaldo, an-immal-taktijulid-imakedbal ega oyo an Pab-akar tani. Tenal imisgwagwad-tulemalga immal-taktijulid-pid pal kwen oyolegojul-kuo. Tenal we tulemalga akpene Jonás-gin-immal-kujadbalbi oyolego an toa-tule.

³⁰“Imi Jonás-gin-immal-kujad Nínive-tolganga wilub oyos Nínive-tolgan Jonás-chogzhad itogenabmal. Tenal an-Te-Tule-Chunnagin-immal-kuoed ampa teopí tule-imis-pukmaladga wilub oyomogo, tule-imis-pukmalad an-chogzhad itogenabmalmo.

³¹“Imi Reina-tad-chapiredzhik-neg-takmai-kujaddin nap-kaka-akar noni Salomón-pirkin-immal-wijiid-wisgugal. Al we Reina Pab-tulemalga-igal-itoged-ibegin tule-imis-pukmalad-tuktinonimogo. Imisgin pe takto, antin Salomónaga pul tule-tummadga kudii, tenal pemal yabli yapa ankin ibzhemal.

³²“Teginbal, Nínive-tolgan Jonás-chunmajadbal aga ulubgin iskuedgin

pukib-itononimal. Al Nínive-tolgan Pab-igal-tulemalga-itoged-ibegin tule-imis-pukmalad-tuktinonimalo. Imisgin pe takto, an Jonásga pul tule-tummadga kudii, tenal pemal yabli yapa ankin ibzhemal.”

**Jesús chogzhagujad imia
tule-chan otalo, kallen
neg-otalonaidyob**

(Mateo 5:15; 6:22-23)

³³ Tegin Jesús purpal chogalbal: “Imi tule kwen nikchul kallen ogajal, otukal kallen chigal, tegin meteyabal chigal-chulbal. Tenal tule kallen ogajal, keg-chulgu kallen-kalugin kallen chimal pel-kwapa tule-ukpomamimalad mag takegal pia immalmal pukwa.

³⁴ “Imi pe-imia, pe-changa kallen-neg-otalonaidyobmo. Tenal pe-imia nuedil, pe-chan pel-kwapa mag immal tak. Tenal pe-imia-iskunonikil, pe-chan aku-ata peimogo, neg-chichidgin kudiidyob.

³⁵ “Imi pemal nue aga takermal, melle pe chogdago: ‘Antin pel-kwapa Pab-igal mag ito,’ tenal pemal yabli aku Pab-igal itomal.

³⁶ Tenal pe chunchunnad mag Pab-igal itogel, pedin pel-kwapa Pab-igal mag itogo, kallen tale neg-imajiidyob pe pel-kwapa mag immal-tak, pe-aku-immal-taked kwen nikchul.”

**Jesús Pariseomal-
tegin-Moisés-igalgın
tulemal-oturdamalad-tuktijad**

(Mateo 22:1-36; Marcos 12:38-40;
Lucas 20:45-47)

³⁷ Tegin Jesús tulemalga pél chunmasgu, Pariseo-walgwen aga negzhe Jesús-ches masgin okunkal. Tegin Jesús Pariseo-negzhe tognatapku, ilgwen mesa-nabal ampagunomial mas kunkal.

³⁸ Tenal Pariseo Jesús-takchagu, Jesús ampayo mas kunneddu igal-mamikidbal chunkal kwen enukchajul, weob pakal pes.

³⁹ Tegin Jesús Pariseoga chogal: “Imi pemal-Pariseomal askinbi pate tegin muruk enukmal, tenal pe yabal pate tegin muruk kwen enukchulmal. Tenal pemal askinbi aga chunkal enuknanimal, tenal pemal ulubgindin kantikidgin immal-egwanedginbi pinzhenanimal, tegin pe istar-immal-imakedginbi pinzhenanimalbal.

⁴⁰ “Ipé immal kwen wichulma! ¿Pe wiszhulzhí Pab Tummad askin pe-opinnis tegin ulubgin pe-opinnisbal? ⁴¹ Tenal pe tule-wilemaladga pategin-mas-kunned-chiid ukenabmal. Tenal pe tule-wilemaladga pategin-mas-kunned-chiid ukchal, pemal kep pé chwilimakal kunoniko.

⁴² “Imi pemal-Pariseomal anpi pe wilesmalma! Imi pemal immal-polléje-pakal: menta, ruda tegin immal-kagan kwaambegwad-kwagwen Pabga ukmal. Tenal pemal yabli ampa itojulmal piti igal-nued, piti igal-iskana.

“Teginbal, pemal Pab-tule-pilaledyob kwen pinzhejulmal tule-pilalgugal. Tenal pemal Pab-tule-pilaledyob tule-pilalguenabmal. Tegin pe tulemalga nuekwa immal-imakedgin pe naneenabmalbal. Tenal pemal ampa kwaambegwad-kwagwen Pabga-immal-uked-igalgın pinzheenabmalbal.

⁴³ “Imi pemal-Pariseomal anpi pe wilesmalma! Imi pemal Judío-ormaked-neggan tule-tummagán-ampagumalad-kangin ampagugal pe yer itomal. Tenal tulemal immalmal-uked-neggan tule-tummaganyob peje kolalil, pe yer itomalbal.

⁴⁴ “Imi pemal-Pariseomal, anpi pe wilesmalma! Imi tule uan-askin wichul pipirmadiidyob, pemal askin yer-taklemal, tenal pemal aga ulubgin tule-purkwijad-nungumaidyob, pe istar nanemal.”

⁴⁵Tegidgin tule-Moisés-igal-wijiid-walgwen Jesúsga chogal:

—Tule-oturdaked, imi pe-chogzhadyob, pe anmalgin istar chunmanaimo.

⁴⁶Tegin Jesús chogbal:

“⁴⁷Imi pemal-Moisés-igal-wismalad, anpi pe wilesmalma! Imi pemal peyedzhe-tutujul tulemalga igal-mesmal, tule pel unnijulidzhe. Tenal pemal pel-iche tulemal-kwen-pentajulmal igal-mezhijadgin nanegal.

⁴⁷“⁴⁸Imi pemal-Moisés-igal-wismalad, anpi pe wilesmalma! Imi pemal uangin Pab-kaka-palchogmalad-akpene-purkwismaladga neg-nued chobmal. Tenal pe-tadgan Pab-kaka-palchogmalad-mechamal.

⁴⁸“Tenal pe uangin neg-chobzhadbal pe oyonai pemal tadgan-Pab-kaka-palchogmalad-mechamalad yer itsmalmo.

⁴⁹Al Pab Tummad pela-pela immal-wijiidbal pemalgin chognoni: ‘Imi an we tulemalzhe an-kaka-palchogmalad tegin an-nuggin-palmilegalmalad-palmialmal. Tenal we tulemal an-nuggin-palmilegalmalad-wal-walgwen-mesmalo, tegin an-nuggin-palmilegalmalad-wal-walgwen sapejul-imanonimalbalo.’

⁵⁰“Al pemal-imis-pukmalad istar tule-palmilegalmalad-imakoedbal, Pab-kaka-palchogmalad-kepe-sagla-akar-opurkwismalad pel-kwapa pemalgin chii, Abel-opurkwijad-akar Zacarías-opurkwijadzhe-pakal. ⁵¹Tenal pe-tadgan Pabzhe-koled-neg-akar Pabga-immal-uked-kwichid-abalgin Zacarías-mechamal. Tenal an chunchunnad pemalga chogdo: imi Pab-kaka-palchogmalad-mechamalad-pel-kwapa tule-imis-pukmaladgin kunoniko, sapejul oturdalegal.

⁵²“⁵³Imi pemal-Moisés-igal-wismalad, anpi pe wilesmalma!

Imi pemal tulemalgin Pab-neg-takmaid-toged-igal otusmal. Tenal pemal aga tukin kwen togzhajulmal, tenal pemal tule-Pab-neg-takmaidzhe-togbi-kunanimaladgin igal-kasmalbal melle toggal.”

⁵³Tegin Jesús pél chunmasgu, akne nadzhun. Tenal Pariseomal tegin Moisés-igal-wismalad istar itos-pesmal. Al Pariseomal Jesúszhe kannan-kannan immal-ekisnai-kualmal, ⁵⁴ade, Jesús noal-wis-chunmanonikil, Jesús-kamalgal.

Jesús chogzhagujad: “Askinbi melle nued nanemalo.”

12 Imi teun takalgu, tule mili-milibal Jesúszhe ali-ali irmanonimalgu, Jesús aga e-chapinganga-inzhel chunmakal chogal: “Wijira, Pariseomal-e-madu-inagin. Imi wedin choglege: pinche-askinbi-nued-nanemalad-igal.

²“Tenal immal-otukal-maid keg-chulgu wisgulenoniko, tegin immal-otukal-kujad keg-chulgu mag taklenoniko. ³Tenal pe neg-chichidgin immal-chogzhad, neg-ibgin kannan choglenonibalo. Tenal pe neg-yabal aga apinni arpa-arpa chunmajad, neg-uwas-pir-akar sapejul choglenonibalo.”

Tule-pe-mesbiedga pe pul Pab-Tummad-tobguenab

(Mateo 10:26-31)

⁴Tegin Jesús chogbal: “An-aimal, an chunchunnad pemalga chogdo: imi tule-pe-mesbi-kunanimalad pe melle tobguenab. Tenal tulemal pe-chan-mechad-cholbal, tule keg pe-purpa-pal-akalo. ⁵Tenal antin pega chogdo toa-tule pe tobguenabmal. Imi pedin, pe Pab-Tummad-tobguenab. Tenal Pab Tummad igal-nikado, pe-chan purkwijad-cholbal, cho-chaglaje pe-purpa-metkal. Al an pemalga chogdo: pemal Pab-Tummad-tobguenabmal.

⁶“¿Imi chickwi-purwigana kwaatalgin mani-pogwal, ibiga nabir? Keg kue. Tenal we immal-tulgán pel karkejul. Tenal Pab Tummad yabli we chickwimal-kwen-igeojul-kuo. Tenal Pab Tummad chickwimalga pul-pule pemal-takodo. ⁷Tenal Pab Tummad pemal-chagla-ki-kigwenzhe-pakal episal cheitii. Al pe melle tule-tobgumalo, Pab Tummad chickwi-purwigana-ichejulidga pul-pule pemal-takmal.”

**Jesús chogzhagujad tule-egin-ibzhemalad tulemal-wagin keg-chulgu chogenabmal:
“An Jesúsbal nai”**

(Mateo 10:32-33)

⁸Tegin Jesús chogbal: “Imi an chunchunnad pemalga chogdo: imi meke-ibi-tule, tulemal-wagin choghal: ‘An Jesúsbal nai,’ an-Te-Tule-Chunna Pab-angelmal-wagin chogmogo: ‘We tule anpal nai.’ ⁹Tenal meke-ibi-tule, tulemal-wagin choghal: ‘An Jesúsbal naichul,’ antin Pab-angelmal-wagin chogmogo: ‘An we tule kwen wichul.’

¹⁰“Imi meke-ibi-tule istar an-Te-Tule-Chunnagin chunmajal, Pab Tummad we tulega nabir iskued elio. Tenal meke-ibi-tule Pab Purpa Nuedgin istar chunmajal, Pab Tummad meke-igi we tulega iskued pal kwen eliojul-kuo.

¹¹“Imi tulemal pe-kasmalal, Judio-ormaked-neggan-tummagan-pukmaladzhe pe-chedmalo. O chulil, igal-itomalandzhe o tummagán-pimaladzhe pe-chedmabalo pega igal-itogal. Tenal pe melle pukib-itomalo pe igi chunmako-dewa, o pe igi chogo-dewa. ¹²Tenal tegidgin Pab-Purpa Nued pega chogo, pe igi chunmakenab.”

Tule-mani-ibed Pab Tummadgin kwen pinzhejulid

¹³Tegin tule-pukwad-walgwen Jesúsga chogal:

—Tule-oturdaked, imi pe an-iaga chogo: an-pabgad-immalmal-pejad anka abalzhal wis ukmogo.

¹⁴Tegin Jesús tule-ega-chognonikidga chogal:

—Chuli machi. ¿Ante pemal-saglají-ade, pega igal-nudagal, pemalga immal mimigal? ¿Toa saglaga an-nugzhas-ade? Imi an we immalmalgin kwen yolenejul.

¹⁵Tegin Jesús tulemalga chogalzhun:

—Wijir, nue aga pe takermal. Pe melle twagdar pel-kwapa immal-peiguijidgin pinzhemalo. Imi tule keg chogel: ‘An ichejul immalmalnikadbal pirkabal megne.’

¹⁶Tegin Jesús tulemalga purpal chunmakalzhun: “Imi te ibagwengin tule-mani-ibed immal tigzhalu, ichejul we tulega immal chanmanoni. ¹⁷Tegin tule-mani-ibed pinzhealzhun: ‘An igi pul immal imakel pul nabir? An immal-chaboed-neg-tummagan kwen nikchul immalmal chabogal’

¹⁸“Tegin tule-mani-ibed chogalzhun: ‘Aáá, imi an wiis an igi imakenab. Imi an immalmal-chaboed-neg-pukwad an eyarne, tegin an neg-pul-tummagan chobne pel-kwapa an-immalmal-nikad chabogal. ¹⁹Tegin an pél immal chabojal, an pinzhenoniko: Imisgin an kus arpas. Tenal an immalmal-ichejul nika-choggu pirkabal megal, al an wis ulukune, an mas-kunne, an kobne tegin an yer itononibalo.’

²⁰“Tegin Pab Tummad tule-mani-ibedga chognoni: ‘iPe immal-kwen-wichulma! Pe imis-mutik purkwene. ¿Tede pél pe immalmal-nikad, toaga peio? Pega immal kwen peiojul.’”

²¹Tegin Jesús chogbal: “Imi tule Pab Tummadgin nue pinzhejulidgin ichejul immalmal chaboel, weob kunonida-take.”

**Jesús chogzhagujad:
“Pe melle twagdar pukib-itogo
pe igi mego-dewa”**

(Mateo 6:25-34)

²²Tegin Jesús aga e-chapinganga chogbal: “Al an pemalga chogdo: pe melle twagdar pukib-itogo, pe igi mego-dewa, pia pe mas-kunned amio-dewa. Tegin pe melle twagdar pukib-itombalbal, pia pe mol amio-dewa wis yogal.” ²³¿Imi tule-tula-kudiil, pul ib-nuedzhulzhí, pul mas-kunnedga? ¿Tegin tule-chan pul chunchogedbalzhulzhí, pul mol-yomalamadga? Teobdo.

²⁴“Imi pe takto, chikwi-chichimal igi nanemal. Tenal we immal-tulgán pel immal tigdijulmal, tegin keg immal weimalbal chabogal, tegin neg pel nikchulmalbal mas-kunned chabogal. Tenal Pab Tummád yabli chikwimalga mas-kunned uk. Tenal pemal chikwimalga pul tule-nuedchoggu, al Pab Tummád pemalga pul-pule mas-kunned uko.

²⁵¿Imi toa peyedzhe-pukib-itogedbal unniguo wachilgwen e-purkwed okpingal? Chulá. Keg kue. ²⁶Tenal pemal immal-ichegwadgin peyedzhe-pukib-itogedbal keg pel immal ima unnigugal, étede ibiga pemalde pul-pule immal-pimalad-nikuedgin peyedzhe pukib pinzhemal? Pe peyedzhe pukib-pinzhed-wilubzhulin.

²⁷“Imi pe takto, tud-chapurbalid a-ito chunnemal. Tenal tudmal kwen arpajulmal, tegin tudmal pel purrejulmalbal. Tenal an pemalga chogzhundo, Errey-Salomón-e-mol pul-yer taklegendo, tenal tud, Errey-Salomónga pul yer-takle. Tenal tud-chapurbalid imis tula, tegin we tud te-pangin tinkual, chogin yok okummakal.” ²⁸Tenal Pab Tummád yabli tudga yer tud-oturpama, molyob.

“¿Tede ibiga pemal Pabgin nuekwa ibzhejulmal? ¿Pab pemalga pul-pule mol ukojulzhí yogal? Teobdo.

²⁹Al pemal melle mas-kunnedginbi tegin kobedginbi pinzhemalo. Tegin pe melle we igalgin peyedzhe pukib-itombalbal.

³⁰“Tenal tule-Pab-wichulmalad unnila pane-pane alamananimal we immalmal nikugal. Tenal Pab Tummád pemal-nued-wismal ibi pe napi kujimal.

³¹“Tenal pemal kepegin alamakenabmal Pab-neg-takmaidgin immal-nuegan nikugal. Tenal pemal Pab-neg-takmaidga alamasmalal, kep pe pél immal-napi-kuijid pega uklego: mas-kunned, kobed, tegin mol.”

Jesús Pab-neggin-immal-nuegan-nikuoedgin chunmajad

(Mateo 6:19-21)

³²Tegin Jesús chogbal: “Tenal pemal-an-mimmigan-walpókwagwad, pe melle tobgedamalo. Tenal Pab Tummád yer-itogedbal pemalga igal-ukcha e-neg-takmaidgin ebak mes meggal.

³³“Tenal pe immalmal-nikmalad manigin pe uko, tegin pe tule-wilemaladga mani mimio. Tenal pe alamakenabmal Pab-neggin mani-chabolejiid-keg-pelgued nikugal, tegin Pab-neggin immalmal-nuegan nikugalbal. Imi tule Pab-neggin kwen togojulmal immal aturzhegal, tegin chumal immalmal kwen kunojulmalbal izhogal.

³⁴“Imi pe-immalmal Pab-neggin pega chabolejiil, pe Pab-neggin pinzhedago. Tenal pe-immalmal iti-napkin pega chabolejiil, pe iti-napkinbi pinzhedago.”

**Jesús chogzhagujad:
“Pemal kuakwa kudiguenaabmal an tanikoedzhe”**

³⁵Tegin Jesús chogbal: “Imi mosmal kuakwa mol-yoyo tegin kallen-kabuk aga e-tummád-abintajidiyob, pemal kuakwa kudiguenaabmalmo.” ³⁶Imi tule-tummád machi-ome-nikunaidgin

mas-kuchad-cholbal, kannan negzhe tanikil, e-mosmal kuakwa kudimal. Tenal mosmal e-tummad wanagakkin-kolnonikoedgin ilgwen e-tummadga wanagak egemaloedyob, pemal kuakwa kudiguenabmalmo pe-tummad tanikoedzhe.

³⁷“Tenal tule-tummad negzhe-nonikil, e-mosmal kuakwa tar-abintabukmalal, we mosmalga ib-nued kunoniko. Imi an chunchunnad pemalga chogdo: we tule-tummad mosmal-mol yojal, mesa-nabal we mosmal-ochio, tegin tule-tummad mosmalga mas-weigwiszhunno.

³⁸“Tenal an pemalga kannan chogbaldo: imi tule-tummad meke neg-kabgwen o meke neg-wakurudzhik negzhe nonikil, tenal mosmal yabli kuakwa tar-abintabukmalal, mosmalga ib-nuedga kunoniko.

³⁹“Tenal an wisgal pemalga chogdo: imi neg-ibed wisgualen ibi-wachigin tule-immal-aturzheed noniko, neg-ibed pali-pali neg algenaioen, melle ebi immal aturzhalegal. ⁴⁰Tenal pemalampa-an-kwen-abintajulidgin an-Te-Tule-Chunna pemalzhe kannan noniko-choggwu, al pemal kuakwa kudiguenabmalmo an-abingegal.”

Jesús mos-nuedgin, tegin mos iskanagin chunmajad

(Mateo 24:45-51)

⁴¹Tegin Pedro Jesúszhe ekichial: —¿Tummad, pe-imis-immal-otukal-chogzhad anmalgabi pe chogzha, o tule-pimaladga pe otukal chogzhamo?

⁴²Tegin Jesús purpal Pedroga chogal: “Nabir. ¿Imi toa-tule-jogna inniki nanemogo, mos-immal-wijidbal e-tummad-chogzhadyob inniki-nanajadyob? Nabir. Imi neg-ibed mos-walgwen-ebes mos-pimalad-takegal, tegin

e-tummad-chogzhadyob masgin mos-pimalad-okunkal. ⁴³Tegin neg-ibed kannan nonikil, taknoniko, mos e-chogzhad-pallí inniki immal imanai, we mos ib-nued imas, tegin we mosga ib-nuedga kunoniko.

⁴⁴“Tenal an chunchunnad pemalga chogdo: imi mos-yer-nanajadbal e-tummad pél we mosga e-immalmal ebeo ega takegal. Imi an-Te-Tule-Chunna ampa tule-tummad e-mos-imajadyob pemal-imamogo.

⁴⁵“Tenal mos-iskanadin pinzhedago: ‘An-tummad imiszhuł noniko.’ Tegin we mos sapejul mos-pimalad, machergan tegin omeganze-pakal sakidago. Tegin we mos mas-kuntago tegin innakobdabalo mumurguedzhe. ⁴⁶Tenal mos-iskana-e-tummad ampa abintajulidgin e-moszhe noniko. Tegin tule-tummad nonikil koakoa mos-iskana-imanoniko. Tegin tule-tummad mos-iskanaga igaluko tule-Pab-wichulmaladbak mes sapejul oturdalegal.

“Tenal an-Te-Tule-Chunna kannan tanikil, tule-tummad e-mos-iskana-imajadyob pemal-istar-an-chapingan-imasmalad-imanonimogo.

⁴⁷“Tenal mos wijiindo e-tummad igi peiguji ega immal imagal. Tenal we mos yabli kuakwa kudijul, tegin e-tummad peigujiidyob immal kwen imaszbulbal. Imi mosmal-wegii-tamalad peyedzhe sakilenoniko. ⁴⁸Tenal mos immal-wichulidgin immal akalojal, oturdaledeg-wiluban. Tenal we mos pul nue-peyedzhe sakilegojul-kuo.

“Imi tule ichejul Pab-igal wisgunonikil, Pab we tuleje peyedzhe immal ekisnoniko. Tenal tule íche Pab-igal wisgunonikil, Pab we tuleje íche immal wis ekisnonimogo. Tegin Pab tulega ichejul immal ebejal ega takegal, Pab we tuleje pul-pule immal ekisnoniko.”

**Jesús chogzhagujad:
“Tule anpal-naigujadbal
tulemalbak iskunoniko”**

(Mateo 10:34-36)

⁴⁹Tegin Jesús purpal choghalbal: “Imi an iti-napche noni cho ogegal. Tenal an ínkwasus peigujiin cho turmagwis. ⁵⁰Tenal ankin peyedzhe ib kuenabgwel. Tenal ankin pel-kwapa immal-peyedzhe kuoedgin, an ulubgin pukib-ito.

⁵¹“Imi pemal pinzhemal antin noni iti-napkin-pukmaladga neg-nudagal tulemal melle aga imamalgal? Chulá. Tenal an chunchunnad pemalga chogdo, an noni pis-pis tule-neg-yaginmalad-imagal.

⁵²“Tenal imis-akar tule neg-yagin walatal pukmalal, istar aga taktamalo, walpágwad walbogwadbak imadamalo, tegin walbogwad walpágwadbak imadamalmogo. ⁵³Tegin pab aga machibak iskunonimalo, tegin machi aga pabbak iskunonimogo. Tegin nan aga chiskwabak iskunonimogo, tegin chiskwa aga nanbak iskunonimogo. Tegin chakome aga palabak iskunonimalo, tegin pala aga chak-omebak iskunonimogo.”

**Jesús chogzhagujad:
“Pemal wisguenabmal neg-imis-kunaid, ibi chogle-wede”**

(Mateo 16:1-4; Marcos 8:11-13)

⁵⁴Tegin Jesús tulemalga choghalbal: “Imi pemal tad-arkwanedzhik mogil-takalil, pemal ilgwen chogdamalo: ‘Ti-wine.’ Tegin keg-chulgu ti-winonida. ⁵⁵Tenal pe takalil, yol-purwa kolmai, pemal chogaldamal: ‘Neg-ued pela-pela tani.’ Tegin neg-ued keg-chulgu nononida.

⁵⁶“Imi pemal pinche-askinbi-nued-nanemalad! Imi pemal nued wismaldo nikpa-neg-taklegedbal neg igi kunoniko. ¿Tede pemal igi

wichul-kune, neg imis igi kunaid? Pemal pato wijiid-wilumbogan.”

**Pab ampayo saejul
tule-oturdaked-wilub omoeddu,
pe Pabbak igal-nudakenab**

(Mateo 5:25-26)

⁵⁷Tegin Jesús choghalbal: “¿Tenal pemal-wagin-immal-kunaid ibiga keg pe chogmal wedin ib-nued o chul? ⁵⁸Imi tule-walgwen ebi immal-akalojadbal igal-itogedzhe pe-chedbi-kualil, pe ampa igalbal-natapidgin pe we tulebak igal-nudakenab.

“Tenal pe we tulebak igal-nudaszhulil, we tule igal-itogedzhe pe-odogo, tegin tule-igal-itoged ilgwen chulubga pe-uko oturdaledged-neggan pe-odogal.

⁵⁹Tenal pe we tulebak igal-nudaszhulil, an chunchunnad pemalga chogdo: pél pe penukchulil, pe oturdaledged-neg-akar pal kwen noojul-kuo. Imi Pab Tummad saejul tulemal-oturdaked pato omodani-choggua, al pe Pabbak igal-nudakenabmal. Pitogua.”

**Jesús chogzhagujad:
“Pe-istar-tiibal, pe aga ulubgin pukib-itogenabmal”**

13 Imi teun takalgu, tulewal-walgwen Jesúsga chognonimal Galilea-tolgan immal-tulgan-mesnaidgin Pabga ukegal, Pilato aka-tégin we tulemal-mecha. ²Tegin Jesús tulemal-nonimaladga chogalzhun: “¿Imi pemal ebinzhemal Galilea-tolgan-weob-purkwijadbal Galilea-tolgan-pimaladga pul tule-iskana? Chulá. ³Tenal an chunchunnad pemalga chogdo: imi pe iskued-nikadbal pe aga ulubgin pukib kwen itononijulil, pemal pél pe pelgunonimalmogo.

⁴“Teginbal, tulemal-walambe-kakapábak torre-Siloégan-kwichid kin aglajadbal purkwismal. ¿Imi tulemal-purkwismalad tule-

Jerusaléngin-pukmalad-pimaladga pul tule-immal-akalosmalad pe ebinzhe? Chulá. ⁵Tenal an chunchunnad pemalga chogdo: imi pe iskued-nikadbal pe aga ulubgin pukib kwen itononijulil, pemal pél pe pelgunonimalmogo.”

Jesús purpal wag-islub-keg-chanmakedgin chunmajad

⁶Tegin Jesús purpal wag-islubgin chunmakal chogal: “Imi tule-walgwen e-nagnugin wag-islub tigzha. Tegin wag-islub chanmaked-wilub omosgu, e-ibed taknad aga e-chan kwangal. Tenal wag-islub-ibed wag-islub-chalzhe nonigu, taknoni e-chan saté.

⁷“Tegin wag-islub-ibed tule-nagnu-takedga chogalzhun: ‘Imi antín pirkapágus wag-islub-chan amidanigus, tenal an wag-islub-chan kwen onoszhul-kus.’ Tegin wag-islub-ibed tule-nagnu-takedga chogalzhun: ‘Imi wag-islub pinche neg-kani-kwichi-choggú, al pe akalzhul olejunno.’

⁸“Tegin tule-nagnu-taked wag-islub-ibedga chogalzhun: ‘Tummad, pe melle wag-islub olegweloma, pirkagwen pe napi takkwelo. Tenal antin imis-akar nagabal chikachika nap imane tudu-cheagal. Tenal an moli-cha wis eyonebal takegal, chanmako o chul-dewa. ⁹Tegin wag-islub nabir chanmanonikil, meke kwichio, melle pe olao. Tenal wag-islub chanmanonijulil, akalzhul pe olejunnodo.’

“Tegin wag-islub-e-ibed chogalzhun: ‘Tegin nabirde.’”

Theob Jesús chogzhagus.

Jesús ome-tulludik-naneed-nudajad

¹⁰Tegin te ibagwengin Jesús ulukued-ibegin Judío-ormaked-neggin Pab-igalgin tulemal-oturdadi-kus. ¹¹Imi teun takalgu, ome-walgwen chimo. Tenal we ome nia-nikadbal pirkaambe-

kakapábakkus tulludik nanedii, keg inniki kwisgu.

¹²Tegin Jesús ome-takchagu, omeje kocha eje taggal. Tegin ome Jesúszhe nonigu, Jesús omega chogal:

—Mu, pe imis-akar poni-pe-kanikid-akar pe ololgune.

¹³Tegin Jesús omechin chunkal mezhisgu, ome apka-pakal inniki kwisgunonijun. Tegin ome Pab-Tummad-otummoalzhun.

¹⁴Tegin Jesús ulukued-ibegin ome-nudajadbal, Judío-ormaked-neg-e-tummad istar-itogedbal tulemalzhe ulual chogal:

—¿Imi pemal wichulzhí ibe-ibanerkwa nika arpagal? Al pe we ibemalgin tagdo nudalemalgal. Tenal pe ulukued-ibegin pe melle tagmalo nugugal.

¹⁵Tegin Tummad-Jesús Judío-ormaked-neg-e-tummadga chogalzhun:

—¡Pe-askinbi-nued-nanemalad-tule! ¿Imi pemal-pel-kwapa ulukued-ibegin aga moli echiktamalzhulzhí, tije tigin moli-okobnegal? Teobdo. ¹⁶Tenal we omedin Abraham-e-wagwa. Tenal Satanás pirkaambe-kakapábakkus we ponibal we ome-kasgudii. ¿Tede ib-nuedzhulzhí, ulukued-ibegin ponigin-kalesgudiid-akar ome-onogal? Ib-nueddo.

¹⁷Tegin Jesús pél chunmasgu, tulemal-istar-Jesús-takmalad peyedzhe pinkegusmal. Tenal tulemal-pimaladdin Jesús-immal-taktijulid-imajadbal yer itos-pesmalmo.

Jesús purpal Pab-neg-takmaidgin chunmajad

(Mateo 13:31-33; Marcos 4:30-34)

¹⁸Tegin Jesús chogalbal: “¿Imi Pab-neg-takmaid ibiyob an pega chogel-kad-wichul? ¹⁹Nabir. Imi Pab-neg-takmaid, tule nagnugin chapi-mostaza-kwa tigzhadyob. Imi mostaza-kwa tunkusgu,

chapiun tunkus, tegin chikwimal e-aanganbal ampagunonimal."

²⁰Tegin Jesús kannan chogalbal: "¿Imi Pab-neg-takmaid ibiyob an pega chogel-kad-wichul? ²¹Nabir. Imi Pab-neg-takmaid ome-walgwen madu-pur-liber-tulapágwadgin madu-ina eyojadyob. Tenal madu-ina pinna-pinna madu-pur-kadel, pel-kwapa madu omuo."

Tule-pel-kwapa Pab-neg-takmaidgin kwen togojul-kuo

(Mateo 7:13-14; 21-23)

²²Imi teun takalgu, Jesús Jerusalén-neg-kweburzhe natapidgin neg-kwebur-tummagangin tegin neg-kwebur-purwiganagin Pab-igalgin tulemal-oturdake-nad. ²³Imi teun tule-walgwen Jesúszhe ekichial:

—¿Tummad, tule-walpókwajal wis abonolenonimalo melle sapejul oturdalegal?

Tegin Jesús tulemalga purpal chogal:

²⁴"Nabir. Imi an chunchunnad pemalga chogdo: imi tulemal-íchejul alamananimalan wanagak-alikwágwadgin toggal. Tenal tulemal keg kugusmal toggal. Al pemal pela-pela alamakenabmal wanagak-alikwágwadgin toggal.

²⁵"Tegin tule-neg-ibed kwisgudel, ilgwen wanagak chaktio. Tenal pemal-magadbal-pesmalad wanagakkin neg-ibedzhe kolnonimalo, wilenoanimalo. Tegin pemal chogdamalo. 'Tummadye, pe anka wanagak wis egegewelye.' Tenal tule-neg-ibed pemal-tarzhe-kolnonimaladga chogdago: 'An wichí pe ibi-tule, pia pe tani.'

²⁶"Tegin pemal-magarbal-pesmalad neg-ibedga chogdabalo: '¿Imi an pebak mes kobzhamalzhulzhí, tegin an pebak mes mas kuchamalbalzhulzhí? ¿Tegin pe animal-neg-impabal Pab-igalgin tulemal-oturdadi-kusbalzhulzhí?'

²⁷"Tegin tule-neg-ibed pemal-magarbal-pesmaladga chogdabalzhunno: 'Pinche pe koltima.

An wichí pe ibi-tule, pia pe tani. iPe-tule-iskana, pe ilgwen we-akar nao!

²⁸"Tegin pe takalil Abraham, Isaac, Jacob tegin Pab-kaka-palchogmalad-pel-kwapa Pab-neg-takmaidgin pukwamal. Tenal pemal kwen togzhajulmalal, pe pela-pela pononimalo, tegin pe peyedzhe-wilejiidbal nugal kotamalbalo.

²⁹"Tenal Pab-neg-takmaidgin tulemal-akne-akne-tanimalad, tad-nakwedzhik, tad-arkwanedzhik, tegin tad-chabiridzhik-nuedzhik, tegin tad-chabiridzhik-chapilezhik-tanimalad mesagin pel-kwapa pukmalmogo mes mas-kunkal. Tenal pemaldin saté. ³⁰Imi tule-pinchemalad-wal-walgwen tule-tummadga kunonimalo, tenal tule-tummagan-wal-walgwen tule-pinchegadga kunonimalmogo."

Imi Jesús teob chogzhagusdo.

Jesús Jerusalén-tolgan-yapa-e-abingeedbal-pukib-itogedbal pojad

(Mateo 23:37-39)

³¹Tegidgin Pariseomal-wal-walgwen Jesúsga chognonimal:

—iPe kueye nao! Errey-Herode pe-aminai pe-mesgal.

³²Tegin Jesús Pariseomalga chogalzhun:

—Imi pe us-tad-Herodega chogo: 'An imis, pan tulemalgin nia-onine, tegin tule-yemalad-nudanebal. Takalgu achul kep an immalmal pelogo.' ³³Tenal antin keg-chulgú imis, pan, tegin achul ukin neenab. Tenal Pab-kaka-palchoged-tule keg-ku akne purkwegal, keg-chulgú Jerusaléngin purkwed-wilub. Al an Jerusalénzhe omoed-wilubmo purkwegal.

³⁴Tegin Jesús chogalbal:

—Jerusalén-tolgan, pemal Pab-kaka-palchogmalad-mechamal, tegin pe akwagin tule-peje-palmilegmalad-mechamalbal. Tenal antin melugus peiguijin pemal-pel-kwapa anche tagmal nuekwa pe-akwegal, kallin-nan

aga chakan-tarbal mimmigan-chabogedyob an pemal chabogal. Tenal pemal yabli yapa-kusmal. Al an peyedzhe pukib-itodo.³⁵ Imi pe-negdin mellegal-peio. Tenal an pemalga chogdo: imi pemal meke-igi an-pal-kwen-takojulmal, pemal chognonimaloedzhe:

Imi pe-Pab-nuggin-tanikid-tule otummoledi-kuelen, nabirinye. Pitogua.

Sal. 118:26

Jesús tule-abgan-mued-poni-nikad-nudajad

14 Tegin te ibagwengin ulukued-ibegin, Jesús Pariseo-tummad-negzhe nad mas kunkal. Tegin Jesús-mas-kunchiidgin, tulemal Jesús-algebukmal, Jesúsde igi immal imako-dewa.
²Tenal Jesús-abir tule-walgwen chimo. Tenal we tuledin abgan-mued-poni nika.³Tegidgin Jesús Pariseomalzhe tegin tule-pirkín-Moisés-igal-wismaladzhe ekichial:
—¿Imi ulukued-ibegin tule-nudagal ib-nued o chul?

⁴Tenal Judío-tummagan ilgwen yakír pesmal, Jesúsga immal kwen chogzhajulmal. Al Jesús tule-abgan-mued-poni-nikad-ebusgu, ilgwen tule-yeed-nudas. Tegin Jesús tule-yeed-palmiszhun.

⁵Tegin Jesús Judío-tummaganzhe ekichialbal:

—Imi pemal-walgwen machinikal, o moli-peb-nikad-dewa, ulukued-ibegin pebi ya-yabal arkwatchal, ¿pe apka-pakal moli-onaknaojulzhí?

⁶Tenal Judío-tummagan Jesús-kwen-abin-imaszulmal, ilgwen yakir pesmal.

**Jesús chogzhagujad:
“Pe melle aga tukin
tule-tummadyob nanao”**

⁷Imi teun Jesús tule-mas-kunnonimalad-takchagu tule-tummagan-kangin chigbi-

kualdamal, al Jesús tulemalga purpal chogalzhun:

⁸“Imi machi-ome-nikuedgin tule peje wis kochamogal-dewa e-wis-taknegal, pe melle tule-tummagan-ampagumalad-kangin chigo mas kunkal. Tenal pe kwen wichul tule-pega-pul-tule-tummad arpak noniko-dewa.

⁹“Tenal pe tule-tummagan-ampagumalad-kangin chigwijal, tenal tule-pega-pul-tummad arpak nonikil, mas-kunned-e-tummad peje noniko, tegin pega chogdago: ‘Imi pe we tummad-kan-akar pe kwisguenab, tule-tummad pe-anal chiggal.’ Imi an-pega-chogzhadyob pega kuelen, pe peyedzhe pinkeguoen, tegin pe kan-pinchedadgin chignatapchunno.

¹⁰“Tenal te ibagwengin tule peje kocha-dewa mas kunkal, pe kan-pinchedadgin chigo mas-kunned-e-ibed pega chognonikoedzhe: ‘An-ai, pe tule-tummagan-pukwadgin pe chigmogo.’ Tenal mas-kunned-e-ibed pega teob chognonikil, kep pe tulemal-pebak-mes-mas-kunpukmalad-wagin pe otummolenoniko.

¹¹“Imi meke-ibi-tule aga tukin tummarba itogel, we tule, pul tule-pinchedadga kunoniko. Tenal tule aga tukin pinchedadga imakel, pul tule-tummadga kunoniko.”

¹²Tegin Jesús tule-neg-ibedga chogal:

“Imi pe íchejul mas-imabi-kualil tulemal-okunkal, pe melle aga aimalzhe kolo, pe melle aga urpamalzhe kolo, pe melle aga kwenamaladzhe kolo, pe melle tule-mani-ibgan-pe-waglik-mamimaladzhe kolbalo. Tenal pe an-chogzhadyob pe tulemalzhe kochamalal, we tulemal kujal peje kolnonimalmogoen. Wedin choglejun, pemal aga muchub-muchub masgin okunnanimaladgin aga nabonanimal.

¹³“Tenal pe ichejul mas imabikualil tulemal-okunkal, pe tule-wilemaladzhe pe kolo, pe tule-ponigwalmaladzhe pe kolo, pe tule-mego-mego-nanemaladzhe pe kolo, pe tule-aku-atamaladzhe pe kolmalbalo.

¹⁴“Tenal pe masgin tule-wilemalad-okuchal, pega ib-nuedga kunoniko. Tenal tule-wiledimalad muchub pe-kwen-okunnojul-choggū, al tule-chwilidik-nanedimalad-kannan-tullegoed-ibegin Pab-neggin pega immalmal-nuegan uklenoniko.”

Jesús purpal chogzhagujad tule-tummad tulemalzhe kochad ebak mes mas kunkal

(Mateo 22:1-14)

¹⁵Tegin tule-walgwen-Jesúsbak-mes-mas-kunchiid Jesús-chunmajad itosgu, Jesúsga chogal:

—Imi tule Pab-neg-takmaidgin mas kunpukwal, ib-nued we tulega kunoniko.

¹⁶Tegin Jesús we tulega chogalzhun:

“Nabir pe chogendo. Tenal an pemalga purpal chog, imi te ibagwengin tule-walgwen íchejul-mas-imajogalidgin íchejul tulemalzhe kocha, ebak mes mas kunkal. ¹⁷Tegin tule-tummad mas-kunned ogusgu, aga e-mos-palmis tule-akpene-tarzhe-kochamaladga chognegal: ‘Tagmalo, mas pato akwigus kunkal.’”

¹⁸“Tegin mos tulemalga chognatapku, tulemal-pel-kwapa yapa taggusmal. Kwéntin mosga chogal: ‘An imichal naga nagnu pakcha. Al an naga nagnu takneenab. Al tule-anche-kochadgin an wis naojulidbal walmanejun.’

¹⁹Tegin kwéntin mosga chogal: ‘An imichal naga walameb moli-pakcha. Al an naga moli-takneenab molide nued arpamal-dewa. Al tule-anche-kochadgin an naojulidbal wis walmanejun.’ ²⁰Tegin kwéntin

mosga chogalmo: ‘An imichal omenikkus. Al an keg neel.’

²¹“Tenal mos e-tummadzhe kannan akpirronigu, pél aga e-tummadga chognonijun, tulemal ega chogzhad. Tegin tule-tummad e-mos-ega-chognonikid itosgu tulemal yapa taggusmal, sae-itos-pes.

“Tegin tule-tummad e-mosga kannan chogbal: ‘Imi pe kueye-kueye kannan neenabbal, neg-kweburgin callebal tegin neg-chukungangin tule-wiledimaladzhe kolnegal. Tegin pe tebal nadel, tule-ponigwalmaladzhe, tule-mego-mego-nanemaladzhe pe kolmogo anpak mes mas kunmalgal.’

²²“Tegin mos e-tummad-chogzhadyob pél pipirmasgu, e-tummadga chognoni: ‘Tummad, pél pe anka chogzhadyob an imas. Imi tulemal-íchejul irmanoni, tenal tulemalga neg ampa unni.’

²³“Tegin tule-tummad e-mosga chogal: ‘Imisgin pe nebalo, tule-igalbal-mamimalad-aminegal tegin tule-chapurbal-mamimalad-amigalbal. Tegin pe kantikidgin tulemal-chedago an-neg enzhegal.

²⁴Tenal an pega chogdo, imi tulemal-an-kepe-neje-kochamalad-pel-walgwen meke-igi an-neggin mas pal kwen kunnojulmal.’”

Teob Jesús chogzhagus.

Jesús chogzhagujad: “Tule anpal-naigujadbal wilenoniko”

(Mateo 10:37-38)

²⁵Imi teun tulemal-íchejul Jesúsbak irmadimal. Tegin Jesús tulemalzhik akpiridgu, tulemalga chogal: ²⁶“Imi meke-ibi-tule anpal naigubiel, aga pabga, aga nanga, aga omega, aga nuskanga, aga urpamalga, tegin aga punmalga, pul an-pilalzhulil, we tule an-chapinga keg kuel. Tenal meke-ibi-tule an-pilaedbal, yapa anka purkwel, we tule an-chapinga keg kubalil. ²⁷Tenal meke-ibi-tule anpal-naigujadbal

kuakwa purkwegal natapchulil, tule-aga-nakrus-cheinatapidyob, we tule an-chapinga keg kubalil.

²⁸“Al an pemalga purpal chognejun, imi pe neg-tummad chobbi-kualil, ēkepegin pe nuekwa pinzheenabgwelzhulzhí pe mani unni-dewa o chul-dewa, pél neg-tummad chobgal? ²⁹Tenal pe kepegin nuekwa pinzhaszhulil, neg-tummad mani-akujadbal abal kalenai melledo.

“Tenal tulemal takchal neg abal-kalenai, pegin chogdamalo: ³⁰‘We tuledin immal-kwen-wichulma. Tenal tule neg-tummad-chobnaindo tenal kwen okuszhul-kus neg-tummad pelogal.’

³¹“Tegin an pemalga purpal chogbaldo: iimi errey-walgwen errey-pidbak pila-chebi-kualil, nuekwa pinzheenabzhulzhí, ede chulub-miliambe-nikadgin unnio-dewa errey mili-tulagwen chulub-nikadbak pila-chenaigdin, nakwegal? ³²Tenal errey unnjulil, errey-pid ampa tikajulidgin tulemal-palmio, errey-pidbak igal-nudagal melle pila-chegal.

“Imi pemal ampamalmo. Al pe nuekwa pinzheenabmal pe unnio-dewa anpal-naigugal o chul. ³³Teginbal, pe pél immalmal-nikad pe ebejulil anpal naigugal, keg pe an-chapinga kuel.

³⁴“Tenal palu ib-nueddo yer-kulle mas imagal. Tenal palu iskunonikil, keg kannan pal nudale. ³⁵Tenal palu iskujal, ibga pal kwen kunonikojul, nap-nudagal pel chul, tegin turwa-nudagal pel chulbal, unnila migal nabir. Imi an-pemalga-chogzhad, pe nuekwa itomalo.”

Jesús purpal oveja-owelejadgin chunmajad (Mateo 18:10-14)

15 Imi teun tule-Romanotummadga-tulemalgin-mani-egwanmalad tegin tule-iskana-pimalad Jesúszhe

irmanonimal Jesús-itogal. ²Tenal Pariseomal tegin Moisés-igalgin-tulemal-oturdamalad Jesúsgin chogalmal:

—We tule yer tule-iskana-abinge, tegin tule-iskanabak mes mas kunpal.

³Tenal Jesús Pariseomal-chogzhad itosgu, Pariseomalga purpal chogalzhun: ⁴“Imi pemal-walgwen oveja-wala-tulaatal-nikal, tegin oveja pebi walwen owelejal, ēpe moli-kagan-naidgin oveja-pimalad-ebegojulzhí, walkwénna-oveja-owelejad-aminegal onogedzhe? Teobdo.

⁵¿Tegin pe oveja-owelejad onojal, pe negzhe weligwaledgin kwikangin pirnai oveja-chedagojulzhí? Teobdo.

⁶“¿Tegin pe negzhe nonikil, pe-aimalzhe tegin pe-tikalbal-mamimaladzhe pe kolojulzhí? Teobdo. Tegin pe tulemalga chogo: ‘Imi an oveja-owelejad an kannan onojadbal, pe anpak mes welgumalo.’

⁷“Tenal an chunchunnad pemalga chogdo: imi oveja-wala-tulabake-kakaambe-kakabakepak kwen oweleszhulmaladga pul oveja-owelejad-kannan-onojadbal pe welgumalo. Imi tule-inniki-timalad aga iskuedgin pukib-itogal kwen napijulibal, Pab-neggin tule-inniki-timaladga pul tule-agaiskued-pukib-itononikidgin pul welgunimalo.”

Jesús purpal mani-chipú- owelejadgin chunmajad

⁸Tegin Jesús purpal chogalbal: “Imi ome-walgwen kwaambe mani-chipú nikal, tegin mani-chipú omebi kwagwen owelejal, ēwe ome kallen ogao, tegin neg-turwidago tegin nuekwa mani amidagojulzhí ilgwén onogedzhe? Teobdo.

⁹“Tegin ome mani-owelejad onojal, aga aimálzhe kolo tegin

tule-agá-tikalbal-mamimaladzhe kolmogo. Tegin ome tulemalga chogdago: 'Imi an mani-owelejad an kannan onojadbal, pe anpak mes welgumalo.'

¹⁰"Tenal an chunchunnad pemalga chogdo: imi tule-walgwen aga ulubgin iskuedgin pukib-itononikidbal, ome aga e-aimalbak welgujadyob Pab-angelmal peyedzhe welgumalmogo."

Jesús purpal machi-e-pabgin-purkwijadyob-owelejadgin chunmajad

¹¹Tegin Jesús purpal chogbal: 'Imi te ibagwengin, tule-walgwen machimal-walabo-nika. ¹²Tegin machi-totogwad aga e-pabga chogal: 'Paba, imi pe-purkwijad-cholbal-anka-immalmal-uklegoed pe imis-imis anka uko.' Tegin machi-e-pab e-machimalga pél e-immalmal-nikad mimishzhun.

¹³"Tegin machi-totogwad nue-nadzhul manigin pél aga e-immalmal-nikad ukcha. Tegin we machi napa-pidzhe nadzhun. Tegin machi napa-pidzhe omosgu, kalagwenzhul nanedi-kual, innakobdi-kual, tegin omegangin mani midi-kualbal. ¹⁴Tegin machi pél aga e-mani misgu, mani-nikchul-kunoni. Tenal machi-maid-napkin mas-kunned-kwen-nikchul kunonigu, machi ukul mejal. Al we machi peyedzhe wilegalzhun.

¹⁵"Tegin machi tule-aka-mamimaladzhe nadzhun arpaged wis amigal. Tegin machi arpaged onosgu, e-tummad chapur-tikalzhe machi-palmis ega chin-takegal.

¹⁶Tenal we machi chin-okunnaidgin pela-pela ukul-chaal. Al we machi chinbi-mas kunpi-kual. Tenal tulemal machiga yabli chin-mas kwen ukchajulmal.

¹⁷"Tenal machi aga mag itononigu ede pela-pela wiledii, aga chognonijun: '¿Ibiga an wegin wiledi-wede? An-pab-mosmal, mas-

ichejul nikamal, tenal antin itigin ukul mesdani. Al an pabzhe nejun.

¹⁸Tenal an pabzhe kannan nadel, an pabga chognatapo: Pabye, an Pab Tummadbak iskus, tegin an pebak iskusmoye. ¹⁹Al an igal-kwen-nikchul choggal: An pe-machiye. Tenal pedin, pe mosyob an-takoye.'

²⁰Tegin machi aga e-pabzhe alzhun.

"Tenal machi ampa untar-panku tanigu, e-pab panna-akar aga e-machi-takcha. Tegidgin e-pab peyedzhe wilejakwa machi-takchagu, ilgwen machi-abin abarmakalzhun. Tegin e-pab allakwa aga machi-kas, tegin igal-midal machi-wagal usbal.

²¹"Tegin machi e-pabga chogal: 'Pabye, an Pab Tummadbak iskus, tegin an pebak iskusmoye. Al an igal-kwen-nikchul choggal: An pe-machiye.' Tegin machi-e-pab aga e-machiga chogalzhun: 'Machi, pe melle weob anka chogma. Pedin ampa an-machido.'

²²"Tenal machi-e-pab aga e-mosmalga chogal: 'Pe kueye-kueye mol-pul-nued aminao, tegin pe ko-yoed tegin sapat aminebalo. Tegin pe an-machigin pél pe we immalmal yoyomalo. ²³Tegin pe kueye moli-peb-nikad-chapini-kwamtkid-chunao mesgalbal. Tegin anmal weiligwal-itogedgin we chan kunmalo. ²⁴Imi an-machi tikajulgus tule-purkwijadyob oweledi-kus, tenal imidin kannan tullejadyob anmalzhe nonibal.' Al tulemal weiligwal-itogedgin mas kunonimalzhun.

²⁵"Tenal teun takalgu, e-ia-chered neggin maichul, nagnuganbal kudii. Tenal e-ia-chered negzhe tanikidgin, panna-akar itos kal kolomajii, tegin tule kwilnanimalbal. ²⁶Tegin e-ia-chered mos-walgwenzhe kocha ekisgal: '¿Ibiga tulemalde kwilnanimal-wede?' ²⁷Tegin mos machi-cheredga chogal: 'Imi pe-upra-akpene-nadgujad kannan chana-nued akpirnonibal. Al pe-pab

moli-peb-nikad-chapini-kwamtkid-mecha, pe-urpa-nonikidbal tulemal weligwal-itogedgin mas kunmalgal.’

²⁸“Tenal machi-chered e-pab-e-urpaga-immal-imajadbal sae-itos-pes. Tegin machi-chered yapa mas-kunnanimaladgin toggus.

“Tenal e-pab wisgusgu e-machi-chered noni, magadbal nod e-machi-cheredga chogal: ‘¿Ibiga pe keg wis togmodeé, mas wis itogal?’ ²⁹Tegin machi-chered e-pabga chogalzhun: ‘Imi antin pirkabalgus pebak kudii, tegin an pe-choged-pallí pél immal imadi-kus. Tenal pe anka cabra-chapini kwen ukchajul, naga aimalkak weligwal-itogedgin wis kunkal.

³⁰Imi an-urpa omegan-machergan-wismaladgin pél pe-mani misgu, kannan negzhe noni. Tenal pedin an-urpaga moli-kwamtkid-mecha kunmalgal.’ Tenal pe an-urpaga weob immal-imaked-wilubzhulin.

³¹“Tegin e-pab machi-cheredga chogal: ‘Machi, pedin anpak pane-pane kudii, tegin an-immalmal-nikad pel-kwapa ampa pegadmo. ³²Tenal pe-urpadin tikajulgus tule-purkjadyob oweledi-kus, tenal imidin pe-urpa kannan tullejadyob anmalzhe nonibal. Tenal pe-urpa owelejan, tenal imidin kannan anmalzhe nonibal. Al anmal weligwal-itogedgin mas-kunned-wilubmal.’”

Teob Jesús chogzhagus.

Jesús purpal tule-istar-tummadga-immal-takedgin chunmajad

16 Tegin Jesús purpal aga e-chapinganga chogalbal: ‘Imi te ibagwengin tule-mani-ibed mai. Tenal we tule-mani-ibed tule-pid-nikbal ega pél immalmal takegal. Tenal tule-mani-ibed iche-iche wisgus, e-mos-ega-immal-takedde pinche-pinche-pakal e-mani mimai.

²“Al tule-mani-ibed tule-ega-immal-takedzhe kocha. Tegin tule-mani-ibed tule-ega-immal-takedga chogal: ‘Imis an wisgusdo, tulemal pegin chogmal, pede nuekwa an-immalmal kwen taknaichul. Imi an pei pe-anka-immalmal-takchiid pél pe anka chogo, melu ampa immalmal wis pukwa. Tegin pe anka chogbalo tulemal melu ankin kalenanimal. Tenal pe we arpagedgindin anka pe pal kwen arpanejul.’

³“Tegin tule-immal-taked aga pinzhealzhun: ‘Imi an-tummad arpaged-akar an-metel. Tede, ¿an igi kuojun? Imi antin unniyal nagnugin arpagal, tenal an pinkebal magadbal tulemalzhe mani ekisgal. ⁴¡Aaá! Imi an wiis an igi imakenab. Imi an tummad ankin arpaged idirijal, an akalzhul tule-negggin mego.’

⁵“Tegin tule-immal-taked tulemal-e-tummadgin-immalmal-kalenanimaladzhe kocha. Tenal tule-immal-taked tule-kepe-nonikidga chogal: ‘¿Pe melu an-tummadgin immalmal kalenai-chogna?’ ⁶Tegin tule-immal-kalenaid tule-immal-takedga chogal: ‘Kwallubi, barril-tulaatal an kalenai.’

“Tegin tule-immal-taked tule-immal-kalenaidga chogal: ‘Nued, wegin pe-karta. Tegil pe kueye chigdo nermagal. Tenal pe kartagin unnila barril-tulabo-kakaambe pe nazhiko.’ Tegin tule-immal-kalenaid tummad-immal-taked-chogzhadyob imas.

⁷“Tegin tule-immal-taked tule-pidga chogalbal: ‘¿Pe melu an-tummadgin immalmal kalenai-chogna?’ Tegin tule-immal-kalenaid-pid tule-immal-takedga chogal: ‘Trigobi quintal-tulaataled-ilatal an kalenai.’

“Tegin tule-immal-taked tule-immal-kalenaidga chogal: ‘Nued, wegin pe-karta. Tegil pe kueye

chigdo nermagal. Tenal pe kartagin unnila quintal-tulaataled-ilabake pe nazhiko.' Tegin tule-immal-kalenaid tummad-immal-taked-chogzhadyob imas.

⁸"Tegin tule-mani-ibed tule-ega-immal-taked-wisgusgu, tule-immal-taked-iskanagin chogalzhun: 'Imi tule-immal-taked pirkin pinzheed-nika melle kujal wilegal.' Imi tule-iti-napkin-pinzhedimalad tule-Pabgin-pinzhedimaladga pul-pirkin immal wismal, e-tulemalgin immal-imagal melle kujal wilemalgal.

⁹"Tenal an pemalga chogdo: imi pemal iti-iskued-napkined-mani pe ebugo, pe-ai-nuedga tule-imagal. Al pega we mani pelgunonikil, pe neg-keg-pelquedgin abingelenoniko.

¹⁰"Imi meke-ibi-tule yer immal-ichegwad akwel, we tule ampa nabir immal-ichejulid akwemogo. Tenal meke-ibi-tule wichul immal-ichegwad akwel, we tule ampa istar immal-ichejulid akwemogo. ¹¹Imi pe iti-napkined-iskued-manigin pe nuekwa nanejulil, tede ɿtoa pega immalmal-nuegan-chunchunnad uko? Keg kue. ¹²Teginbal, pe tule-pid-immalmalgin pe nuekwa nanejulil, tede ɿtoa pega immalmal uko pegadga kugal? Keg kue.

¹³"Imi tule walbo keg tummagan-nikuel. Imi pe keg-chulgu tummad-walgwen-ter-taknoniko, tenal pe tummad-pid-istar-taknoniko. Chulil, pe tummad-walgwen-choged-pallí immal imanoniko, tenal pe tummad-pid-choged-pallí immal kwen imanonikojul. Imi pemal keg Pab-walbo nanemalal. Tenal pemal walkwénna chuenabmal pe tummadga kugal, Pab Tummad o mani."

¹⁴Imi Pariseomal pul-peyedzhe manigin pinzhedimal-choggú, al Pariseomal pél Jesús-chunmajad itosmalgu, Jesúsgin todoalmal chogalmal: "Pinche pe koltima."

¹⁵Tenal Jesús Pariseomalga chogal:

—Imi pemal tulemal-wagin aga tukin oyodimal, pemal tule-nuegan. Tenal Pab Tummad ulubzhe-pakal pemal-wiis pe igi pinzhebukmal. Imi tulemal chogmalal wedin ib-nued, Pab Tummaddin istar tegiid-immal tak.

¹⁶Tegin Jesús chogbal: "Imi Moisés-igal tegin Pab-kaka-palchogmalad-chogzhad Juan-Bautista-nonikidzhe chunmaledi-kus. Tenal Juan-Bautista-nonikid-akar Pab-neg-takmaid-kaka-nuegan chunmalenoni. Tenal tulemal-pel-kwapa kantikidgin alamananimal Pab-neg-takmaidgin toggal. ¹⁷Tenal iti-nap tegin nikpa-neg pul-puleju lpeguo, Moisés-igal-pul-totógwadga.

¹⁸"Imi meke-ibi-tule aga ome-metel, tegin ome-pid-nikujal, pato ome-pidgin-yolejadyob iskunonoi. Teginbal, tule ome-melleded-nikujal, pato ome-pidgin-yolejadyob iskunonimo."

Jesús tule-mani-ibedgin tegin tule-wileged-Lázarogin chunmajad

¹⁹Tegin Jesús chogbal: "Imi te ibagwengin tule-mani-ibed mai. Tenal tule-mani-ibed mol-nueganbi yo, mol-kwalugiid tegin mol-chibu-karked. Tegin tule-mani-ibed pane-pane mas-nueganbi kunpal. ²⁰Tenal teun tule-mani-ibed-neg-magadbal, tule-wileged-Lázaro-nugad ya-chunnabi mellejimo. ²¹Tenal Lázaro tule-mani-ibed-mas-kunned-apatmaid kucha-tagmogan. Tenal achumal Lázaroga ya emenonidamalbal.

²²"Tegin te ibagwengin Lázaro purkwenoni, tenal angelmal Lázaro-chunonimal Abraham-maidzhe chedgal. Tegin Lázaro-purkwijad-cholbal, tule-mani-ibed purkwenonimo. Tegin tulemal tule-mani-ibed-tigzhamalmo.

²³"Tegin tule-mani-ibed cho-chagla-negggin peyedzhe wilejiidgin,

panna-akar Lázarobak-chii tad-Abraham-takcha.²⁴ Tegin tule-mani-ibed Abrahamzhe kote chogal: ‘Tad-Abrahamye, imi pe wilejakwa an-takelen, nabirinye. Tenal pe anka Lázaro-palmidagelen, nabirbalinye, Lázaro ko-tukugin anka ti wis chedagalye, Lázaro an-kwabin-tukugin ti wis nazhigalye. Imi an peyedzhe we cho-chaglagin wilenakiye.’

²⁵“Tenal Abraham tule-mani-ibedga chogal: ‘Machi, ampa pe wiis, pe napkin tigusgu, pe igi kus? Imi pe napkin tigusgu, pe ichejul immalmal-nuegan nikus, tenal Lázarodin peyedzhe wiles. Imidin Lázaro itigin nued akwilejii, tenal pedin peyedzhe wilejii.²⁶ Tenal animal-abalgan ya-tummad chibal. Al tule-anchik-pukmalad meke-igi keg peje opakel. Tenal tule-pezhik-pukmalad meke-igi keg anchik opakelmo.’

²⁷“Tegin tule-mani-ibed Abrahamga chogalzhun: ‘Tad-Abraham, imi antin urpamal-walatal-nika. Al an peje wileye, pe an-kalgwenmaladzhe Lázaro-wis-palmioye.²⁸ Tenal pe Lázaro palmidel, Lázaro an-urpamalga chunmagal, melle iti-wileged-negzhe nonimalgalmoye.’

²⁹“Tenal Abraham tule-mani-ibedga chogalzhun: ‘Chulá. An Lázaro-kwen-palminejul. Imi pe-urpamal Pab-karta nika-nemal, Moisés-nermajad tegin Pab-kaka-palchogmalad-nermasmogad. Al pe-urpamal akalzhul Pab-karta itomalo.’

³⁰“Tegin tule-mani-ibed Abrahamga chogal: ‘Nabir pe chogendo, tenal an-urpamal Pab-karta kwen itogojuilam. Tenal tule-purkwijad kannan an-urpamalzhe nadel, an-urpamal kep e-iskuedgin pukib-itonomimalo.’

³¹“Tegin Abraham tule-mani-ibedga chogalzhun: ‘Imi pe-urpamal Moisés-karta-nermakal-maidgin

tegin Pab-kaka-palchogmalad-karta-nermakal-maidgin kwen ibzhaszhulmalal, tenal imi an pe-urpamalzhe tule-purkwijad-palmijal, pe-urpamaldin ampa tule-purkwijadbal kwen ibzhaojulmalbal.’”

Teob Jesús chogzhagus.

Jesús chogzhagujad: “Pe melle iskuedgin tule-pid-egwano”

(Mateo 18:6-9; Marcos 9:42-48)

17 Tegin Jesús aga e-chapinganga chogalbal: “Imi tulega keg-chulgu wilub-takleged nonida iskuedgin arkwangal. Tenal tule-walgwen iskuedgin tule-pid-egwannonikil, we tule peyedzhe-oturdalenoniko. Tenal we tule ampi peyedzhe wilesmalma.² Tenal tukalgin-akwa-mu-edinal-nai termalzhe tule-walgwen metel, wedin pul iwen-akalzhul, pul tule-walgwen iskuedgin Pabgin-ibzheed-mimmi-egwangal.

³“Al pemal nue aga takermal, melle iskuedgin tule-pid-egwangal. Imi pe takel, pe-kwenad iskuedgin kudii, pe kwenadga chogo: ‘Pe melle iskuedgin nane.’ Tenal pe-kwenad aga iskuedgin pukib-itonomikil, pe kwenadga chogo: ‘Pe-iskueddin pato pelgus.’

⁴“Tenal pe-kwenad ibagwengin ilakugle pegin walmajal, tenal pe-kwenad ilakugle pega chognonikil: ‘Antin pegin-walmajadbal pukib-itonomi,’ pedin ilakugle pe kwenadga chogenabmo: ‘Pe-iskueddin pato pelgus.’”

⁵ Tegin Jesús-nuggin-palmilegalmalad Tummad-Jesúsga chogalmal:

—¿Ibiga pe keg animal-okannode, animal pegin pul penzhulgal?

⁶“Tegin Jesús e-nuggin-palmilegalmaladga chogalzhun:

—Imi pemal mostaza-kwaun ankin penzhulil, pemal chunna we morera-chapiga chogo: ‘We-akar pe

nao, tegin pe termalzhe kwisgunao.' Tenal we chapi keg-chulgu pe-choged-pallí kuenab.

Jesús chogzhagujad mosmal e-tummadga nuekwa naneenab

⁷Tegin Jesús chogbal: "Imi pemal-walgwen mos-nikal, tegin pe-mos oveja-takap-dewa, o nagnugin arpajad-akar nonikil-dewa, ¿pe mosga chogo pe ebinzhe: 'Imisgin pe chigwelo mas kunkal?' Chulá. ⁸¿Tenal pe pul-kigma mosga chogdagojulzhí? 'Pe anka mas tuenab, tegin pe mol ogwaenab. Tegin pe anka mas-kunned tegin kobel chedabalo. Tegin pe anka-pél-immal-imajad-cholbal kep pe mas-kunchunmogo.'

⁹¿Tegin mos pe-chogzhad-pallí immal imajadbal, pe mosga chogo pe ebinzhe: 'Tog-nued pe anka immal-imajadbal?' Chulá. ¹⁰Tenal pemal ampamo. Imi pemal an-chogzhad-pallí pél immal imajal, pe melle aga tukin otummogo. Tenal pemal choged-wilubmal: 'Antin twagdar mos-nued-chul. Tenal antin pinche an-tummad-chogzhad-pallí immal imas.' "

Teob Jesús chogzhagus.

Jesús walambe tule-lepra-poni-nikmalad-nudajad

¹¹Tegin Jesús Jerusalén-neg-kweburzhe natapidgin Provincia-Samaria tegin Provincia-Galilea-abinguiidgin natapmal. ¹²Tegin Jesús neg-kwebur-totoje togdanikidgin tule-walambe-lepra-poni-nikmalad Jesús-iktual pukmal. ¹³Tenal tule-lepra-poni-nikmalad panlla igal-pial sapejul Jesúszhe kolalmal chogalmal:

—¡Jesús tule-tummadye, imi pe wilejakwa anmal-takelen, nabirinye!

¹⁴Tegin Jesús tule-lepra-poni-nikmalad-takchagu, ka chogal:

—Imi pemal ilgwen tule-irwal-Pabzhe-kolmaladzhe nemalo,

pemal aga chan oyomagal, pedin nugusmal.

Tegin tule-lepra-poni-nikmalad Jesús-ka-chogzhadyob ilgwen tule-irwal-Pabzhe-kolmaladzhe nadmalzhun.

Tenal tule-lepra-poni-nikmalad ampa igalbal-natapidgin aga takalmal e-ponidin pato pelgus.

¹⁵Tegin tule-lepra-poni-nika-nad-walgwen aga takchagu ede nugus, kolmakal-kolmakal Pab-Tummad-otummo Jesúszhe kannan al. ¹⁶Tegin we tule Jesúszhe nonigu, Jesús-abir askun chimtinoni. Tenal tule-nonikid tog-nuedi Jesúsga chognoni. Tenal takalgu, tule-tog-nuedi chognonikiddin, Samaritano-tule.

¹⁷Tenal Jesús tulemalga chogal: —¿Imi tulemal-nugujadde walamebjulzhí? ¿Imi tule-walabakebakkwaddé, pia nadzhun? ¹⁸¿Tenal we tule-kwapidbi noni Pab Tummadga tog-nuedi choggal? iPaaa! ¡Igi taklejun?

¹⁹Tegin Jesús tule-eje-nonikidga chogal:

—Kwisgu, pe akalzhul nejunno. Imi pe ankin-penzhul-kujadbal, pe nugunoni.

Pariseomal Jesúszhe ekichijad: "¿Pab-neg-takmaidde inkwa noniko?"

(Mateo 24:23-35)

²⁰Tegin te ibagwengin Pariseomal Jesúszhe ekisnonimal, Pab-neg-takmaid inkwa kunoniko. Tegin Jesús Pariseomalga chogal: "Imi Pab-neg-takmaid pe kwen takojuł-kuo tani. ²¹Tegin tule Pab-neg-takmaidgin kwen chogojul-kuo: 'Wegin chii,' o 'Wépal chii.' Tenal Pab-neg-takmaiddin pato tule-ulubgin mai."

²²Tegin Jesús aga e-chapinganga chogalzhun: "Imi ibe nonikodo, pemal takpi-kudamalo an-Te-Tule-Chunna neg-takmai, tenal pemal kwen takojuł-kuo. ²³Tenal tulemal pemalga chogdamalo: 'Wegin

Cristo mai.’ Tegin tule pemalga chogdamalbalo: ‘Cristo wépal mai.’ Tenal pemal melle tak-nemalo, tegin pe melle we tule-itomalbalo.

²⁴“Tenal an-Te-Tule-Chunna kannan tanikil, mariped pél nikpa-neg otalogedyob an noniko. ²⁵Tenal an-Te-Tule-Chunna kepegin peyedzhe wilegenabgwel, tegin tulemal-imis-pukmalad an-kwen-abingaojul-kuenabmalbal.”

Tule kwen wichul ibi-ibegin Jesús kannan taniko

(Mateo 24:36-44; Marcos 13:32-37)

²⁶Tegin Jesús chogalbal: “Imi akpene Noé-maigu-kujadyob an-Te-Tule-Chunna iti-napche kannan tanikil, tulemalga ampa kunonimogo.

²⁷“Imi Noé-maigu tulemal pul mas-kunnedginbi pinzhedi-kusmal, kobedgin pul pinzhedi-kusmal, ome-nikuedgin pul pinzhedi-kusmal, tegin pabgan aga nuskan-ukedgin pul pinzhedi-kusmalbal aga nikumalgal. Tenal Noé ul-tummadzhe-togzhadzhe weob kudigusdo. Teginbal tulemal ampa immalgin-kwen-pinzhejul-pukmaladgin mu-tummad arpak neg-odononi. Al teun tulemal pel-kwapa purkwismal.

²⁸“Tegin Lot-maigu ampa weob kusmodo. Imi teun tulemal mas-kunnedgin pul pinzhedi-kusmal, kobedgin pul pinzhedi-kusmal, immalmal-pakedgin pul pinzhedi-kusmal, immalmal-ukedgin pul pinzhedi-kusmal, immal-tigedgin pul pinzhedi-kusmal, tegin neg-chobedgin pul pinzhedi-kusmalbal. Tenal tulemal Pab Tummadgin kwen pinzhedi-kuszhulmal.

²⁹“Tenal Lot Sodoma-akar nodgu, tulemal ampa immalgin-kwen-pinzhejul-pukmaladgin ti tar-winaidyob nikpa-neg-akar cho-azufrebak winoni. Tenal teun tulemal-pel-kwapa ilgwen we chogin purkwismal.

³⁰“Tenal Noé-maigu tegin Lot-maigu, tulemal ampa immalgin-kwen-pinzhejul-pukmaladgin neg kujadyob an-Te-Tule-Chunna kannan tanikoedgin, tulemalga kunonimalmogo.

³¹“Tenal an-Te-Tule-Chunna kannan tanikil, tule neg-uwas-askin pukmalal, melle neg-yabal pal togmalo immalmal weigal, ilgwen pe-kunaid-akar pe wakinabmal. Tenal tule nagnugangin kudimalal, melle negzhe pal tagmalo immalmal weigal, ilgwen aka pe wakinabmal. ³²¿Imi pemal ampa wismalzhulzhí Lot-e-ome igi kus? Imi teun Lot-e-ome kannan-akpiridedgin ilgwen purkwenoni.

³³“Imi meke-ibi-tule yapa purkwejogel, yabli pelgunoniko. Tenal meke-ibi-tule akalzhul purkwejogel, we tule kannan tullenoniko.

³⁴“Tenal an chunchunnad pemalga chogdo: imi an-tanikoedgin tule-walbo mutik aga kachigin kabmamikil, wal Gwen chulenoniko, tegin wal Gwen peio. ³⁵Teginbal, ome-walbo ob-nagnanikil, wal Gwen chulenoniko, tegin wal Gwen peio. ((³⁶Tegin machergan-walbo nagnugin arpananikil, wal Gwen chulenoniko, tegin wal Gwen peio.))”

³⁷Tegin e-chapingan Jesúsga chogalmal:

—¿Tummad, imi we immal-pe-chogzhad, pia kuo-wede?

Tegin Jesús aga e-chapinganga chogalzhun:

—Imi immal-purkwaled pia nungumaídin, tebal mulamal keg-chulgu ampagunonimalo.

Jesús chogzhagujad tule pali-pali Pabzhe koldi-kuenab

18 Tegin Jesús aga e-chapingan-oturdakalu, chogal: “Imi pe Pabzhe kolneel, pe keg-chulgu pali-pali Pabzhe kolmalo. Tenal pe melle

chogdamalo: 'An weje-ugak an Pabzhe kol.' ² Al Jesús aga e-chapinganga purpal chogalzhun: 'Imi te ibagwengin tule-walgwen neg-kweburgin tulega-igal-itogedga mai. Tenal we tule Pab-Tummad-kwen-tobzhul, tegin tulemalgin pel atajulbal.

³ "Tegin we neg-kweburgin, ometarbi-macheder-purkjwijd chimo. Tenal we ome pane-pane tule-igal-itogedzhe chognonida: 'Imi tule-anpak-istargadbak pe anka igal-wis-nudakoye.' ⁴ Tenal tule-igal-itoged kepegin omega yapa igal-itogus.

"Tegin tule-igal-itoged untaradgin pinzheal: 'Imi antin Pab-Tummad-kwen-tobzhul, tegin tulemalgin pel atajulbal. ⁵ Tenal ome pane-pane keg-chulgú anka immal chognonida-choggú, al an we omega igal-nudanejun, ome melle anka kannan-kannan an-pudar-itogedzhe immal pal chognonigal.'

⁶ Tegin Jesús aga e-chapinganga chogalbal: '¿Pe itosmal, tule-igal-itoged igi chog? ⁷ Nabir. Imi tule-Pab-tar-chusmalad mutik-ibgin Pabzhe kolel, ¿Pab we tule-pentakojul pe ebinzhe igal-nudagal? Pab we tule-pentakodo. ⁸ Tenal Pab pane-pane tulemal-yardako pe ebinzhe melle pentalegal? Chulá.

⁸ Tenal an pemalga chogdo: Pab Tummad ilgwen tule-chusmaladga igal-nudanoniko.

"Tenal an-Te-Tule-Chunna iti-napche kannan tanikil, ⁹ ¿an iti-napkin tule-ankin-penzhulmalad-onogo-día o chul?"

Jesús purpal tule-walbo-Pabzhe-kochamaladgin chunmajad

⁹ Imi teun takalgu, tule-walgwen chogmal ede tule-nued, tenal tule-pimalad, tule-iskana. Al Jesús tegiid-tulemalga purpal chogalzhun: ¹⁰ "Imi te ibagwengin tulemal-walbo Pabzhe-koled-negzhe nadmal Pabzhe kolgal. Tenal

tule-walgwen Pariseo-tule, tegin kwéntin e-tulemalgin-Romanotummadga-mani-egwaned-tule.

¹¹ "Tegin Pariseo kwisgusgu, weob Pabzhe kolaldo: 'Pab Tummadye, an tog-nuedi pega chogye. Imi antin tule-pimaladyobzhul tule-iskanaye. Tenal antin tule-immal-aturzheed-chul, tenal an tule-immal-akaloed-chul, tegin an tule-pimaladyob ome-pidgin-yoleged-chulbalye. Tenal an we tule-mani-egwanedyob tajulbalye. ¹² Tenal antin tumigwengin ilabo mas-kunchulidgin nanedabalye, tegin an-immal-nikad-ilbal, kwaambegid an kwagwen pega ukye.' Tenal Pariseo weob Pabzhe kochagusdo.

¹³ "Tenal tule-mani-egwaneddin panna kwichi-pes Pabzhe kolgal. Tenal tule-mani-egwaned pukib-itogedbal pel nikpa atadzhul, ilgwen chagla-tukkinbi pes, tegin aga twisgal okolnai-pesbal. Tegin Pabga chogal: 'Pab Tummadye, imi an tule-iskued-nikad-choggu, al pe wilejakwa an-takelen, nabirinye.' Tenal tule-mani-egwaned weob Pabzhe kochagusmodo.

¹⁴ "Tenal an chunchunnad pemalga chogdo: imi tule-mani-egwaned Pab-wagin iskued-nikchulidgin negzhenad. Tenal Pariseodin iskued-kwen-elieszhul negzhe nad.

"Imi meke-ibi-tule aga tukin otummoel, we tuledin, tule-pincheadga kunoniko. Tenal meke-ibi-tule aga tukin totogwadga imakel, we tuledin tule-tummadga kunoniko."

Teob Jesús chogzagus.

Jesús wiles nuskan-purwigana-takchad

(Mateo 19:13-15; Marcos 10:13-16)

¹⁵ Imi teun takalgu, tulemal Jesúszhe nuskan-cheinonimal, Jesús chunkalgin nuskan-ebujadgin choggal: "Pab Tummad pega immal-nuegan imakelen, nabirinye."

Tenal Jesús-e-chapingan takchagu nuskan-e-pabgan Jesúszhe aga nuskan-cheidanimal, Jesús-e-chapingan nuskan-e-pabganzhe ulualmal chogalmal: "Melle Jesúszhe nuskan-pal-chedamalo."

¹⁶Tenal Jesús nuskan-e-pabganzhe kote chogal: "Pe anka nuskan-chedama." Tegin Jesús aga e-chapinganga chogal:

—Pe melle nuskangin igal-kao. Meke nuskan anche tagmalo. Imi Pab-neg-takmaid we nuskanyob-kudimaladga kunoniko. ¹⁷Tenal an chunchunnad pemalga chogdo: meke-ibi-tule we nuskanyob Pab-neg-takmaid kwen abingejulil, we tuledin Pab-neg-takmaidzhe kwen togojul-kuo.

Jesús tule-mani-ibedbak chunmajad

(Mateo 19:16-30; Marcos 10:17-31)

¹⁸Tegin tule-tummad-walgwen Jesúsga chogal:

—Tule-oturdaked, pedin tule-nued. ¿Imi an igi imakenabzhun an ilagwen-nadgu tullegal?

¹⁹Tegin Jesús tule-tummadga chogal:

—Nabir. ¿Ibiga pe anka chogde, antin tule-nued? Pab Tummadi unnila tule-nued. ²⁰¿Imi pe nued wiszhulzhí, Pab Tummadi Moisésbal igi igal-mezhis? Imi Pab chogdo:

Melle ome-pidgin yolego,
melle tule-mejo,
melle immal aturzhao,
melle pinche-pinche
kakanchao.

Tenal pe aga pabgin
tegin pe aga nangin
atagenabmalbal.

Ex. 20:12-16; Dt. 5:16-20

²¹Tegin tule-tummad Jesúsga chogal:

—Imi antin toto-akar pe-chogzhadyob nanedii.

²²Tegin Jesús tule-tummad-chogzad itosgu, tule-tummadga chogalzhun:

—Nabir pe chogendo: 'Pe-chogzhadyob antin pel-kwapa nanedii.' Tenal pe immal-choggwen napido. Imi pe immalmal-nikad pel-kwapa manigin uko. Tenal pe tule-wiledimaladga pe we mani mimio. Imi pe tule-wilemaladga pel-kwapa we mani ukchal, pedin Pab-neggin ichejul immalm-nuegan nikunoniko. Tenal pe tule-wiledimaladga mani-ukchad-cholbal kep pe anche tago, ankin turdagal.

²³Tenal tule-tummad peyedzhe-immalmal-nikad-yapa-ukedbal, Jesús-ega-chogzad itosgu, peyedzhe pukib-itogedgin-pes.

²⁴Tegin Jesús ampa nuu tule-mani-ibed-takkwichidgin tulemalga chogal:

—¿Peyedzhe, pe takchulzhí, tule-mani-ibed pirkin-mani-pilaledbal Pab-neg-takmaidzhe toggal? ²⁵Imi moli-camello wag-iko-imia-yabal pul-pulejul togo, pul tule-mani-ibed Pab-neg-takmaidgin toggal.

²⁶Tenal tule-itopukmalad Jesúszhe ekichialmal:

—¿Imi tule-mani-ibed Pab-negzhe toggal ib-peyedzhe-choggu, tede toa abonolegojun?

²⁷Tegin Jesús tulemalga chogal:

—Imi tulega immal-keg-kued, Pabgadin pél nabir immal kunonida. Al Pab unni e-neg-takmaidgin tule-odogal.

²⁸Tegin Pedro Jesúsga chogal:

—Imi animal pel-kwapa naga neg ebessmal pebal-naigugal. ¿Tegil ibi analga uklenonimalmogojun?

²⁹Tegin Jesús tulemalga chogal:

—Imi an chunchunnad pemalga chogdo: imi meke-ibi-tule Pab-neg-takmaidga-arpagedbal immalmal ebejal, nega, ome, kalgwemmalad, pabgan, o nuskan-dewa, ³⁰we tule iti-napkin keg-chulgú immal-ebejadga pul-pule immalmal nikunoniko. Tegin we tule Pab-neggin ilagwen-nadgu tullenonibalo.

**Jesús ilapágus aga
chogzhagujad ede purkwene**
(Mateo 20:17-19; Marcos 10:32-34)

³¹Tegin Jesús pidzhi aga e-chapingan-walambe-kakabogwadzhe kocha. Tegin Jesús aga e-chapinganga chogal: “Imi animal Jerusalénzhe nejogalmal. Tenal Pab-kaka-palchogmalad iktual an-Te-Tule-Chunnagin-immal-kuoedgin chogzhagujad Jerusaléngin pél kunoniko.

³²“Imi an-Te-Tule-Chunna Judiojulmaladga uklenoniko. Tenal tule-Judiojulmalad peyedzhe ankin istar todomalo, tegin ankin istar chunmamalo. Tegin Judiojulmalad ankin kwi mimalo, tegin peyedzhe an-ebiomalo, tegin an-mesmalbalo.

³³Tenal an-Te-Tule-Chunna ibapágim kannan purkwaled-akar tullenonibalo.”

³⁴Tenal Jesús-e-chapingan aku itos-pesmal, Jesús ega ibi chogzhad. Tenal Pab Tummad aku-itogal Jesús-e-chapingan-imajadbal, Jesús-e-chapingan chichikaal-pesmal, Jesúsde ibi chogza.

Jesús tule-aku-ataged-mani-ekichii-taed-nudajad

(Mateo 20:29-34; Marcos 10:46-52)

³⁵Tegin Jesús Jericó-neg-kwebur omodanikidgin, teun, tule-aku-ataged igalgin mani ekichi. ³⁶Tenal tule-aku-ataged itosgu tulemal ichejul egin irmamami, tulemalzhe ekichial:

—¿Igi negde kunai-ade?

³⁷Tegin tulemal, tule-aku-atagedga chogalmal:

—Jesús-Nazaretkined natapte.

³⁸Tegin tule-aku-ataged sapejul koteju chogal:

—Jesús, pe-David-wagwaye. Imi pe wilejakwa an-takelen, nabirinye.

³⁹Tenal tule-Jesús-iktual-irmamamimalad tule-aku-atagedga chogalmal:

—iPe melle kolmama! Pe yakir-kuma.

Tenal tule-aku-ataged pul-kigma kolmakal chogal:

—David-wagwaye, pe wilejakwa an-takelen, nabirinye.

⁴⁰Tegin Jesús itosgu tule eje kol, kwisgus. Tegin Jesús tulemalga chogal:

—Anka pe we tule-cheda.

Tegin tulemal Jesúszhe tule-aku-ataged-cheinonigu, Jesús tule-aku-atagedga chogal:

⁴¹—¿Igi pe pei ante pe-penta?

Tegin tule-aku-ataged Jesússga chogalzhun:

—Tummad, antin, an pei, pe anka imia nudaye.

⁴²Tegin Jesús tule-aku-atagedga chogal:

—Nabir. Imisgin pe-imia nugudo. Imi pe ankin penzhul-kujadbal, pe nungunoni.

⁴³Tegidgin tule-aku-ataged ilgwen mag atanoni-peszhun. Tegin tule-nugujad Jesús-cholbal Pab-Tummad-otummoe-nadzhun. Tenal tulemal-pel-kwapa tulemag-atajad-takchamalgú, Pab-Tummad-otummoalmalmo.

**Jesús Zaqueo-neggín
mas kuchad**

19 Tegin Jesús Jericó-neg-kweburzhe tognonigu, ilagwen igalbal irmadmal.

²Imi teun takalgu, Jericógin tule-walgwen-Zaqueo-nugad maimo. Tenal Zaqueodin Romano-tummadga-tulemalgin-mani-egwanmalad-e-tummadga mai, tegin tule-mani-ibedga maibal.

³Imi Zaqueo Jesús-takpi-kudiin. Tenal Zaqueo tule-matu-choggú, al Jesús nasgu, Zaqueo tulemal-Jesúsbak-ichejul-irmamaidbal Jesús-kwen-takchajul-kus. ⁴Al Zaqueo Jesús-iktual abarmad. Tegin Zaqueo Jesús-najoedgin sicómoro-chapigin nakwis Jesús-takegal.

⁵Tenal Jesús Zaqueo-chiid inniki-kusgu, nikpa atad. Tegin Jesús Zaqueoga chogal:

—Zaqueo, pe ilgwen aktema. Imis an pe-negggin keg-chulgu togenab.

“Tegin Zaqueo chapi-akar ilgwen aktesgu, Jesúsbak mes aga e-negzhe nadzhun. Tegin Zaqueo weligwaledgin aga e-negggin Jesús-abingashun. ⁷Tenal tulemal Jesús-takchagu, Zaqueo-negggin togzha, tulemal Jesús-uachogalmal: —Imi Jesús tule-iskana-neggin togzha.

⁸Tenal Zaqueo Jesúsbak-pukwadgin kwisgusgu Tummad-Jesúsga chogal:

—Tummad, an kakabo pega immal wis chogbido. Imi antin, an-immalmal-nikad an tule-wiledimaladga abal ukne. Tegin an-tulegin-immal-aturzhajad ilabakegwad-wilub an kannan nega uknebal.

“Tegin Jesús Zaqueoga chogalzhun: —Imis-ibegin iti-neg-yaginmaladga tule-abonoleged noni. Imi pedin ampa Abraham-e-wagwaga kannan kunonibal. ¹⁰Imi an-Te-Tule-Chunna iti-napche nonido, tule-Pabgin-nojbal-oweles-kudimalad-amigal tegin we tulemal-abonomalgabal.

Jesús purpal tule-tummad e-mosmalga ichejul-mani-ebejadgin chunmajad

(Mateo 25:14-30)

¹¹Imi teun takalgu, Jesús Jerusalénzhe-omodanikidbal, tulemal ebinzhenatapmal Pab-neg-takmaid ilgwen noniko. Al tulemal ampa Jesús-itobukwadgin, Jesús purpal tulemalga chogal: ¹²“Imi te ibagwengin tule-tummad mai. Tegin tule-tummad nap-pidzhe nejogalgu, erreyga nugzhalegal. Tenal we tule-tummad kannan akpirnonibalo.

¹³“Tenal tule-tummad walambé e-mosmalzhe kocha. Tegin tule-tummad mosmal-ilbal yopí ichejul-mani ebés. Tegin tule-tummad e-mosmalga chogal: ‘Imi pemal we mani-ochanmamalo an kannan tanikoedzhe.’

¹⁴“Tenal tulemal-e-negkweburginmalad istar we tummad-takmal. Al tule-tummad-naded-cholbal e-negkweburginmalad tulemal-palmis tummaganga choggal: ‘Imi anmal we tule-kwen-peichulmal anmal-erreyga kugal.’

¹⁵“Tenal tule-tummad yabli erreyga nugzhales. Tegin tule-tummad kannan e-negzhe nonibal. Tegin tule-tummad e-mosmalgamani-ebemaladzhe kocha. Tegin tule-tummad mosmal-ilbal ekichial melu ega mani-ochanmasmal-dewa.

¹⁶“Tegin mos-kepe-inzhel-nonikid e-tummadga chognoni: ‘Tummad, pe-anka-mani-ebejad eg-ilambe an pega mani ochanmas.’

¹⁷“Tegin errey e-mosga chogal: ‘Pe nued imas. Imi pe immal-totogwad yer akwis-choggú, al pe neg-kweburgan-kwaambe, pe tako.’

¹⁸“Tegin mos-pid e-tummadzhe nonibalgu, chognonimo: ‘Tummad, pe-anka-mani-ebejad eg-ilatal an pega mani ochanmas.’

¹⁹“Tegin errey e-mosga chogal: ‘Pe nued imas. Imi pe immal-totogwad yer akwis-choggú, al pe neg-kweburgan-kwaatal pe takmogo.’

²⁰“Tegin mos-pid erreyga chognonimo: ‘Tummad, wegin pe mani. Imi antin muswegin-ebirmakal pe-mani chabos. ²¹Imi pe tule-puled-choggú, al an pe-tobgual. Imis an wisdo, pe kwen arpajul, tenal pe pinche kuakwa immal aminonida. Tegin pe immal kwen tizhulbal, tenal pe immal weinonidabal.’

²²“Tegin errey e-mosga chogal: ‘Pe mos-iskanama! Imi pe aga tukin chunmajadbal, an chabzhl pe-imane. ²³Imi pe nued-wijiinzulzhí, antin tule-puled? Imi an kwen arpajul, tenal an pinche kuakwa immal aminonida. Tegin an immal kwen tizhulbal, tenal an immal weinonidabal. ²⁴Tede, ɿibiga pe

bancogin an-mani chaboszhuldé?
Imi pe bancogin an-mani
chabojalen, an kannañ akpirijadgin
bancogin anka mani ochanmajan.'

²⁴"Tegin errey tule-e-
itobukmaladga chogalzhun: 'Imi pe
we tulegin an-mani chumalo, tule-
ilambe-mani-ochanmajadga pe we
mani ukmalo.'

²⁵"Tegin tule-itobukmalad
erreyga chogalmal: 'Ibigadé? Imi
we tule mani-chogambe pato nika.'

²⁶"Tegin errey chogalbal: 'Imi
an pemalga chogdo: imi meke-ibi-
tule ichejul immalmal nikal, we
tulega pul-melu immal uklego.
Tenal meke-ibi-tule iché immalmal
nikal, we tulegin immal-ichegwad
egwalemoniko, chunkal-kwabi
kwichi-peio. ²⁷Tenal tulemal-
anpak-istarmalad yapa erreyga
an-odogusmalad, pe anka
chedamalo, pemal an-wagin tar-
mesmalgal.'

Teob Jesús chogzhagus.

**Jesús errey-tummadyob
Jerusalénzhe tognonikid**
(Mateo 21:1-11; Marcos 11:1-11;
Juan 12:12-19)

²⁸Tegin Jesús pél chunmasgu,
tulemal-iktual nad Jerusalénzhe.

²⁹Tegin Jesús neg-kweburgan-
Betfagé tegin Betania-
omodanikidgin, Olivo-yal-inik
peinoni. Tegin Jesús aga walbo
e-chapingan-palmijogal neg-
kweburzhe. ³⁰Tegin Jesús aga
e-chapinganga chogal:

—Imi pe we neg-kwebur-toto-
pe-takchiidzhe, pe nemalo. Tenal
pe neg-kweburzhe tognatapil, pe
taknatapmalo moli-burro-chapini
edinal-un. Imi we moli-chapini
tule ampa kwen nakwedijul. Tenal
pe moli-burro-echikchal, pe anka
chedamalo. ³¹Tenal tule peje
ekichialil: 'Ibiga pe moli-burro-
echiknai-wede?' Pe we tulega
chogo: 'Tummadde choge ede we
moli-pei.'

³²Tegin Jesús-e-chapingan-
palmilesmalad Jesús-ka-chogzhad-
yopí kus. ³³Teun Jesús-e-chapingan
moli-echiknaidgin tule-moli-ibgan
Jesús-e-chapinganzhe ekichialmal:

—Ibiga pe
moli-echiknanimal-wede?

³⁴Tegin Jesús-e-chapingan tule-
moli-ibganga chogalmal:

—Imi Tummad chog, ede we
moli-pei.

Tenal tule-moli-ibgan Jesús-e-
chapinganga chogalmal:

—Tegil pe cheddo.

³⁵Tegin e-chapingan Jesúszhe
moli-cheinonimalgu, moli-
yankalgin aga e-molmal okismal.
Tegin e-chapingan moligin Jesús-
onakwismalzhun. ³⁶Tegin Jesús
moli-askin-chii natapidgin, tulemal
errey-tummadyob Jesús-takedbal
Jesús-iktual igalgin aga e-molmal
okismal.

³⁷Tegin Jesús-Olivo-
yal-odejogalidgin
Jesús-e-chapingan-pel-kwapa
ichejul-immal-taktijulmalad-
takchamaladbal, weligwaledgin
sapejul pulal Pab-Tummad-
otummoalmal chogalmal:

³⁸ iImi we errey-Pab-nuggin-
tanikid,

ib-nued erreyga kuelen,
nabirinye!

iImi Pab-neggin akalzhul-
pukmalalen, nabirbalinye!

iTegin we errey nikpa-neggin
nug okannoledi-kuelen,
nabirbalinye!

Sal. 118:26

³⁹Tegin Pariseomal-wal-walgwen-
itobukmalad Jesúsga chogalmal:

—Tule-oturdaked, pe-chapinganga
pe chogma: 'Melle weob kolmamal.'

⁴⁰Tegin Jesús Pariseomalga chogal:

—Chulá. Imi an-chapingan yakir-
pejalen, we akwamal kolmamaloen
Pab-otummogal.

⁴¹Tegin Jesús Jerusalén-
omodanikidgin, panna Jerusalén
takcha. Tegin Jesús tulemal-

Jerusaléngin-pukmaladga peyedzhe poalzhun.⁴² Tenal Jesús chogal:
 “Imi pemal yabli imis-ibegin wisguelen pe igi imakenabmal akalzhul ampagugal, pemal akalzhul ampagumaloen. Tenal imidin Pab aku-itogal pemal-imas-choggu, al pemal wisguszhulmal.

⁴³“Tenal pemalga kujal ibe-puled noniko. Tenal te ibegin tulemal-pebak-aichulmalad pel-kwapa pe-neg-kwebur ebirmalo. Tegin tulemal-pebak-aichulmalad pe-neg-kwebur ebiris malal, yalyob pel-kwapa ebiris nap omurmamalbalo, pe melle nomalgal.⁴⁴ Tenal tule-pebak-aichulmalad napkin-ebiogal pe-mesmalo, tegin nuskana-pukmalad ugakche-pakal.

“Imi Pab pemalzhe-noní pemal-abonagal. Tenal pemaldin Pab-pemalga-immal-imabied akus takchamal. Al tule-pebak-aichulmalad pel-kwapa pebi neg eyarmalo, akwa-askin chii pel peiojul, ilgwen ubibi peio.”

Jesús Pabzhe-koled-neg-akar tulemal-immalmal-ukpukmalad-onijad

(Mateo 21:12-17; Marcos 11:15-19; Juan 2:13-22)

⁴⁵Tegin Jesús Pabzhe-koled-neg-impabal togzhagu, tulemal-immalmal-ukpukmalad-onis.⁴⁶Tegin Jesús tule-immalmal-ukpukmaladga chogal:

—Imi Pab Tummad kartagin chogdo:

Imi an-neg unnila
 anche-kolgalbi,
 tenal pemaldin immalmal-
 aturzheed-negga
 anche-koled-neg imanonimal.

Is. 56:7; Jr. 7:11

⁴⁷Tegin Jesús pane-pane Pabzhe-koled-neggan Pab-igalgin tulemal-oturdadi-kus. Tenal tule-irwal-Pabzhe-kolmalad-e-tummagan tegin Moisés-igalgin-

tulemal-oturdamalad tegin Judio-tummagan-pimalad igal-aminanimalan Jesús-mesgal.⁴⁸ Tenal tulemal yer Jesús-itoshmaladbal Jesúsbak kudigusmal. Al Judio-tummagan kwen unniguszhulmal Jesús-mesgal.

Judio-tummagan Jesúszhe ekichijad:

“¿Pe toa-nuggin immal ima?”
 (Mateo 21:23-27; Marcos 11:27-33)

20 Tegin te ibagwengin tule-irwal-Pabzhe-kolmalad-e-tummagan tegin Moisés-igalgin-tulemal-oturdamalad tegin Judio-chelegan-tummagan Jesúszhe nonimal. Tenal teun Jesús Pabzhe-koled-neg-impabal tulemal-oturdadii tegin Pab-kakapurwa-nuegan palchogdibal. Tegin Judio-tummagan Jesúszhe ekichijmal:

²—¿Imi pe toa-nuggin weob immal ima-wede? ¿Tegin toa pega igal-ukpal-wede, weob immal imagal? Imi an peido, pe anka chog.

³Tegin Jesús Judio-tummaganga chogal:

—Tegin an pemalzhe-inzhel immal ekisnegwel. Imisgin an pei pe anka choggwel.⁴¿Imi Juan-Bautista-tigin-tulemal-ogdi-kujad pia-akar tani-jogna? ¿Pab-akar o tule-akar? Anka chogdo.

⁵Tegin Judio-tummagan aga emal-emal chumakalmal: “Imi animal chogzhal: ‘Juan-Bautista-tigin-tulemal-oged Pab-akar tani,’ we Jesúsde anmalga chogdago: ‘¿Tede, ibiga pemalde Juangan keg ibzhemalzhun?’⁶Tenal animal chogzhabalil: ‘Juan-Bautista-tigin-tulemal-oged tule-akar tani,’ tulemal-pel-kwapa Juan-Pab-kaka-palchoged-takedbal, akwagin animal-mesmalo.”

⁷Al Judio-tummagan Jesúsga chogalmalzhun:

—Anmal kwen wichulmal Juan-Bautista-tigin-tule-oged pia-tani.

⁸Tegin Jesús Judío-tummaganga chogal:

—Tegin an pemalga kwen chogojulmodo, toa anka igal-ukcha weob immal imagal.

Jesús purpal tule-iskana-uva-nagnu-takmaladgin chunmajad

(Mateo 21:33-46; Marcos 12:1-12)

⁹Tegin Jesús tulemalga purpal chogal: “Imi tule-walgwen nagnugin uva tigzha. Tegin tule-nagnu-ibed nejogalgu, tulemalga uva-naid ololchas, kujal uva-weied-omojal aga abal kamalgal. Tegin tule-nagnu-ibed napa-pidzhe nad pirkabal owegal.

¹⁰“Tenal uva-nabgued-ibe omosgu, tule-nagnu-ibed tule-nagnu-takchimaladzhe aga e-mos-palmial, uva-chan-abal-ega-uklegoam amigal. Tegin mos tule-nagnu-takchimaladzhe nonigu, tule-nagnu-takchimalad sapejul mos-nonikid-sakismal, tegin chunkal-kwabi kannan e-tummadzhe mos-palmismalbal.

¹¹“Tegin tule-nagnu-ibed e-mos-pid-palmialbal tule-nagnu-takchimaladzhe. Tenal mos-pid-nonigu tule-nagnu-takchimalad sapejul mos-sakismalbal, tegin mosgin istar chunmasmalbal. Tegin tule-nagnu-takchimalad chunkal-kwabi kannan e-tummadzhe mos-palmismalbal. ¹²Tegin tule-nagnu-ibed e-mos-pid-palmialbal. Tegin mos nonigu, tule-nagnu-takchimalad mos-naklichasmal. Tegin tule-nagnu-takchimalad nagnu-akar kantikidgin mos-onodmalbal.

¹³“Tegin tule-nagnu-ibed chogalzhun: ‘¿An igi imakenabzhun? Tegin an naga machi-pilaed-palminejun. Imi an chogdé we tulemal an-machigindin atamalo.’

¹⁴“Tenal tule-nagnu-takchimalad takchamalgu nagnu-ibed-e-machi tani, aga emal-emal chunmakalmal chogalmal: ‘Imi we machi-tanikid e-pab purkwijal, we nagnu machigadga kunoniko. Al anmal we machi-mejenabmal, we nagnu pél anmalgadga kunonigal.’

¹⁵Tenal tule-nagnu-takchimalad machi-kasmalgu, nagnu-tikalzhe machi-chesmal. Tegin tule-nagnu-takchimalad nagnu-tikalbal kep machi-mechamalzhun.”

Tegin Jesús chogalbal: “¿Imi tule-nagnu-ibed tule-ebi-machi-mechadbal, igi tule-nagnu-takchimalad-imako pe ebinzhe? ¹⁶Nabir. Imi tule-nagnu-ibed tule-nagnu-takchimaladzhe nonikil, tule-nagnu-takchimalad-mesmogo, tegin tule-pimaladga nagnu-uko ega takegal.”

Tegin tulemal-Jesús-itobukmalad chogalmal:

—Imi pe-chogzhadyob Pab Tummad anmalgin kad weob immal imada.

¹⁷Tenal Jesús nuu tulemal-taktegu, tulemalga chogal:

—¿Tede ibiga Pab-kartagin-nermakal-maid chogzhun:

Imi tule-neg-chobmalad akwa-mete?
Tenal akwa-meted akwa-pul-chunchogedga kunoni.

Sal. 118:22

¹⁸Imi meke-ibi-tule we akwa-askin arkwajal, ilgwén e-kalmal pisli-pisli peio. Tenal we akwa tule-askin arkwannonikil, we tule ilgwén akpudo.

¹⁹Tenal Moisés-igalgin-tulemal-oturdamalad tegin tule-irwal-Pabzhe-kolmalad-e-tummagan mag itosmal, Jesús purpal emalgin otukal chunmas. Al Judío-tummagan igal-aminani-pesmal ilgwén Jesús-kagal. Tenal Judío-tummagan tulemal-tobedbal Jesús-kwen-kaszhul-kusmal.

Jesús Romano-tummadga-mani-egwanmaladgin chunmajad
(Mateo 22:15-22; Marcos 12:13-17)

²⁰Tegin Judio-tummagan Jesús-algenanimal, Jesúsde icheistar wis chunmadago-dewa. Tegin Judio-tummagan tule-nueganyob tulemal-palmialmal, yami Jesúszhe immal ekisgal. Imi tule-palmilesmalad pinzhebukmal: “Imi Jesús iche wis noal chunmakelen, nabirin, animal nabir gobernadorga Jesús-uko, gobernador igal-nikadbal sapejul Jesús-oturdagal.”

²¹Tegin tulemal-nonimalad Jesúszhe immal ekichialmalzhun chogalmal:

—Tule-oturdaked, imi animal nued wismaldo, pe tulemal-oturdanaidgin pe napírra inniki chunma. Tegin animal wismalbaldo, pe tule-kwen-tobzhul, tenal pe ilgwen pakal-pud-pud Pabigalgia tulemal-oturdabal. ²²Imi pe inniki-immal-choged-tule-choggua, al an peido, pe anka chog: ćimi animal nabir Romano-Tummad-Césarga maniegwannanimalad penuko o chul?

²³Tegin Jesús takchagu tulemal pinche e-wilub-takegal eje immal ekisnanimal, Jesús we tulemalga chogal:

²⁴—Nabir. Imi pe anka mani wis oyogweldo.

Tegin tulemal Jesúszhe mani oyosgu, Jesús tulemalga chogal:

—¿We manigin, toa-wagal-purpa chii-jogna? Tegin toa-nug nermakal naibal-chogna?

²⁵Tegin tulemal Jesúsga chogalmal:

—Romano-Tummad-Césargadde.

Tegin Jesús tulemalga chogalzhun:

—Nabir. Imi immal Romano-Tummad-Césargadil, Césarga pe ukodo. Tenal immal Pab Tummadgadil, Pabga pe ukodo.

²⁶Tenal tulemal-palmilenonimalad kwen unniguszhulmal, tulemal-wagin

noal-chunmagal Jesús-imagal. Tenal tulemal-palmilenonimalad Jesús-emalga-immal-chogzhabal pul-kigma weob pakal pesmal, al ilgwen yakir pesmalbal.

Saduceomal Jesúszhe tule-purkwaled-akar-kannan-tullegoed ekisnonikid

(Mateo 22:23-33; Marcos 12:18-27)

²⁷Tegin Saduceomal-wal-walgwen Jesúszhe immal ekisnonimal. Imi Saduceomal chogmal: “Tule purkwijal, Pab-neggina pal kwen tullegojul.” ²⁸Tegin Saduceo-nonimalad Jesúsga chogalmal: “Tule-oturdaked, imi Moisés animalga igal-mezhisdo: imi tule-ome-nikad nuchu-nikchul purkwijal, e-upra keg-chulgua e-ia-omega-kujad-nikuenabmo, we omebak aga e-ia-purkwijadga nuchu-nikugal.

²⁹“Nabir. Imi te ibagwengin tule-walgwen machimal-walakuglenikus. Tegin machi-tummad ome-nikunoni. Tenal machi-tummad nuchu-kwen-nikchul purkwenoni. ³⁰Tegin e-upra-e-palid we ome-nikunonimo. Tenal e-upra nuchu-kwen-nikchul purkwenonimo.

³¹Tegin e-upra-e-palid we ome-nikunonimo. Tenal machi nuchu-kwen-nikchul purkwenonimo. Tenal we machimal-walakugled pél we ome-walkwénnagwadnikusmal. Tenal machimal yabli tegigus nuchu-kwen-nikuszul purkwismal. ³²Tegin we ome kep purkwenonimojun.

³³“Imi we ome Pab-neggina kannan tullejal, ome machimal-walakugle-pél-nikujadbal, ćipiti machi-walakugled e-machered-chunchunnadga kunoniko?”

³⁴Tegin Jesús Saduceomalga chogal:

“Imi pemal immal-kwen-wichul chunmajima. Imi tule iti-napkin ome-nikumal, tegin omegan machered-nikumalmo. ³⁵Tenal tule purkwaled-akar kannan tullejal,

tegin Pab-neggin nabir togzhamalal, machergan ome-pal-kwen-nikuojulmal. Tegin omegandemo machered-pal-kwen-nikuojulmalmo. ³⁶Tegin tule-kannan-tullesmalad pal kwen purkojulmal. Tenal tule-tullesmalad angelmalyob kunonimalo, tegin tule kannan tullejadbal Pab-nuskanga kunonimalo.

³⁷“Imi animal igi wisguo tule kannan tullego? Nabir. Imi Moisés chapi-purwi-kagwis takchadgin, teun Moisés chogzhagusdo: ‘Pab Tummadde Abraham, Isaac tegin Jacob-e-Pab-Tummadga mai.’ Al Moisés oyosdo tule-purkwaled-akar kannan tullego. ³⁸Imi Pab tule-purkwaled-e-Pab-Tummad chul. Tenal Pab Tummad tule-tulad-e-Pab-Tummadga mai. Tenal Pab pel-kwapa tuladbi tulemal-tak.”

³⁹Tegidgin Moisés-igalgintulemal-oturdamalad-wal-walgwen Jesúsga chogalmal:

—Tule-oturdaked, pe yer chogzhado.

⁴⁰Tenal Jesús pirkin-immal-wijiidbal, tulemal Jesús-tobgualmal. Al tulemal Jesúszhe immal pal ekichiszulmal.

Jesús Pariseomalzhe ekichijad:

“¿Cristode toa-wagwa-wede?”
(Mateo 21:41-46; Marcos 12:35-37)

⁴¹Tegin Jesús tulemalga chogal: —¿Ibiga chogmaldé: ‘Cristo-Pab-apene-chogzhad-palmidagoed-tulede Errey-David-e-wagwa?’ ⁴²Imi Errey-David aga tukin Pab-namaked-kartagin chogzhado:

Imi Pab Tummad an-Tummadga chogzhado:

‘Pedin an-nuedzhik tule-tummadga chigwitapo,

⁴³tule-pebak-aichulmaladgin nakwegal an pe-imakedzhe, pe kangin nag-onakwedyob.’

Sal. 110:1

⁴⁴Tegin Jesús chogbal:

—Imi Errey-David-pel Cristode kocha ‘Tummad,’ étede Cristode, igi David-e-wagwaga kuodé?

Tenal tulemal Jesús-kwen-abinimaszhulmal, ilgwen yakir pesmal.

Jesús Moisés-igalgintulemal-oturdamaladgin immal-choged nikunonikid

(Mateo 22:1-36; Marcos 12:38-40;
Lucas 11:37-54)

⁴⁵Tegin tulemal-pel-kwapa Jesús-itobukwadgin, Jesús aga e-chapinganga chogal:

⁴⁶“iWijirmal Moisés-igalgintulemal-oturdamaladzhe! Imi we tulemal yer itomal mood mol yogal. Tenal we tulemal yer itomalbal, tule-immalmal-ukmaladgin tule-tummadyob eje kolgal. Tegin Moisés-igalgintulemal-oturdamalad yer itomalbal Judio-ormaked-neggin tule-tummagan-ampagumalad-kanmalgin chiggal. Tenal we tulemal pulal mas kunnalmalal, yer itomalbal tule-tummagan-kan-ampagumaladgin chiggal.

⁴⁷“Tenal Moisés-igalgintulemal-oturdamalad kantikidgin omegan-tarbi-machered-purkwismaladgin immalmal egwanmal. Tenal we tulemal pinche yami yer e-takegal, ib-chunnadyob orojul Pab Tummadzhe kolmalbal. Imi an-chogzhadyob tulemal nanemalal pul-pule Pabzhe oturdalenoniko.”

Teob Jesús chogzhagusdo.

Ome-wileged-machered-tarbi-purkwijad Pabga mani ukchad

(Marcos 12:41-44)

21 Tegin Jesús chiidgin, panna tule-mani-ibgan-takchii, ulugin Pabga mani uknanimal. ²Tegin Jesús takchabal ome-wileged-machered-tarbi-purkwijad-walgwen ulugin Pabga mani-kollogana-kwabo ukchamo.

³Tenal Jesús tulemalga chogal:

—Imi an chunchunnad pemalga chogdo: imi we ome-wileged-machered-tarbi-purkwijad pel-kwapa tule-mani-ibganga pul-pule Pabga mani ukcha.⁴ ¿Ibiga an teob chog? Nabir. Imi tule-mani-ibgan ichejul mani ukchando, tenal we tulemal yabli aga manigwen-ukchadyob itosmal. Tenal we ome iché mani ukchando, tenal we ome-wilegeddin Pabga aga pelallé mani-napid ukcha, mas kunkal pel peszhul.

Jesús neg-tuku omodanikidgin, neg-igi-kunonikoedgin chunmajad

(Mateo 24:1-28; Marcos 13:1-23)

⁵ Imi Jesús-e-chapingan-wal-walgwen aga emal-emal Pabzhe-koled-neggin chunmakalmal, chogalmal: “Imi we Pabzhe-koled-neg yér takle-á tegin akwamal yér taklebal-á. Tegin tulemal-Pabzhe-koled-negga-immal-ukchamalad yér taklebaldo.” Tegin Jesús aga e-chapinganga chogal:

⁶ —Imi pe-immal-takchimalad ibagwengin pelgunoniko. Tenal te ibegin we neg eyarismalal, akwa-agaa-askin chiji pel peiojul.

⁷ Tegin e-chapingan Jesúszhe ekichialmal:

—¿Tule-oturdaked, imi pe-imis-chogzhadde, inkwa kuo-wede?
¿Tede igidgin anmalga oyolenoniko we neg-kunaid-wilubgan pato noni?

⁸ Tegin Jesús aga e-chapinganga chogal: “Tenal pe nue aga takermal, tulemal pe-yardadamal. Imi tulemal-ichejul yami an-nuggin nonimalo. Tenal we tulemal chognonimalo: ‘Imi antin Cristo.’ Tegin tule-pe-yardadanimalad pemalga chognonimalbalo. ‘Imi neg-tuku pato omodani.’ Tenal pemal melle we tulebal naigumalo.

⁹ “Tenal pe itoalmalal, pila-nonai, tegin pe itoalmalbalil, tulemal aga emal-emal mesnanimal, melle pe kwakidamalo. Tenal

an-pega-chogzhadyob neg-kunaid keg-chulgu iktualeba kunoniko. Tenal an-chogzhadyob neg-kunonikil, ampa neg-tukujul.”

¹⁰ Tegin Jesús chogalbal:

“Imi tulemal kaka-akal-akal-chunmamaladbak pila-onononimalo, tegin napa, napa-pidbak pila-onononimalbalo.¹¹ Tegin neg-tutumaked peyedzhe naigunoniko, tegin napa-pid-pidgin mas-kunned nikchul-kunonibalo. Tegin ponigan peyedzhe akniononiko. Tenal nikpaneg-magadbal wilubgan akal-akal oyolenonikil, tule-takmaloeabal peyedzhe kin kwakidamalo.

¹² “Tenal an chogzhadyob ampayo immalmal-kueddu, tulemal pe-kanonimalo. Tegin tulemal sapejul pe-imanonimalbalo. Tegin tulemal Judio-ormaked-negmalzhe pe-cheinonimalo pega igal-itogal. Tegin tulemal oturdaledeg-neggin pe-odomalbalo. Tenal pe anpal-naidbal, tulemal erreymalga tegin gobernadormalga pe-tuktinonimalo.

¹³ “Tenal tule-tummagan pega igal-itononimalal, pemalga igal-uklenoniko ankin chunmagal, antin tule-abonoged.

¹⁴ Imi pe kalejal, pe aga tukin chogenabmal: ‘An iktualeba kwen pinzhenejul an igi chunmako-dewa.’

¹⁵ Tenal antin, an pega pinzheed-nued uknoniko pe chunmagal. Tenal pe chunmakoedgin, tule-pebak-aichulmalad unniguojulmal pegin nakwegal, ilgwen yakir peimalo.

¹⁶ “Tenal pe-pabgan, pe-urpamal, pe-kwenamalad, pe-aimal-ugakche pe-tuktimalo. Tenal tulemal wal-walgwen pemal-mesmalo.

¹⁷ Tenal pe-anpal-naidbal, tulemal-pel-kwapa istar pe-taknonimalo.

¹⁸ Tenal pe-chagla-kia-kigwen meke-igi pegin kwen owelegojulkuo.¹⁹ Tenal pe abin-purtijadbal pe-purpa abonolenoniko Pabbak megal.”

²⁰ Tegin Jesús chogalbal:

“Imi pe takalil chulubmal Jerusalén-ebiris pukwamal, pemal

pato wisgunonimalodo, Jerusalén-pelgued omodani. ²¹Tenal te ibegin tulemal-Provincia-Judeagin-pukmalad ilgwen-wakinabmal yal-tummaganzhe. Tenal tule-Jerusaléngin-pukmalad Jerusalén-akar noenabmalmo. Tenal tule-nagnunganbal-kudimalad Jerusaléñzhe melle pal tognonimalo.

²²“Tenal te ibegin Pab-kartagin-nermakal-maidyob pél neg-kunoniko peyedzhe tulemal-oturdalegal. ²³Imi Pab-peyedzhe-tulemal-oturdaked-ibegin omegan-ponigwal-kwichimalad tegin omegan-kin-nuskan-nunanimaladdin ib-kuoedbal peyedzhe welenonimalo. Tenal te ibegin iti-napkin peyedzhe wileged noniko, tegin Pab Tummad peyedzhe tulemalzhe urwenonibaló.

²⁴“Imi tulemal-wal-walgwen esgin-eyural purkwenonimalo, tegin kwéntin kalesmalal, akne-akne napa-pidzhe palmilemaló. Tenal tule-Judiojulmalad Jerusaléngin-maidgin chabzhul-immal-imanonikidbal neg-izhononimalo, Pab Tummad Judiojulmaladga wilub-nazhijadzhe.”

Pab-Jesús kannan-

tanikoedgin aga chunmajad

(Mateo 24:29-35; Marcos 13:24-31)

²⁵Tegin Jesús chogalbal: “Imi te ibegin an-Te-Tule-Chunna-kannantanikid omodanikil, tadgwagin, nigin, tegin iskwagin wilubgan oyolenoniko. Tenal tule-akal-akal-chunmamalad iti-napkin termal pela-pela arwed kolomamaidbal, peyedzhe kwakidamalo. Tegin tulemal chuli-pinzhé itononimalbalo. ²⁶Tenal neg-nikpa-kanalejjid pela-pela tutumanoniko. Tenal tulemal iti-napkin neg-kuneedgin, peyedzhe kwagyenonimalbalo. Tegin tulemal neg-owedmalbalo.

²⁷“Imi te ibegin tulemal taknonimalo, an-Te-Tule-

Chunna mogil-impabal pela-pela kannaledegin tegin pela-pela nugu-taklegedgin aktedani. ²⁸Imi an-pega-chogzhiidyob pe neg takalil, pe kuakwa kudigumalo. Imi Pab-pe-abonogoed-wilubgandin pato omodani.”

²⁹Tegin Jesús tulemalga purpal chogalbal: “Imi pe takto, wilubgan wag-islub-chapigin tegin chapipimaladgin. ³⁰Imi pe takalil chapimal ka-nial, pemal pato wismaldo, neg yol omodani. ³¹Tenal chapimalgin-kunai-yopí, an-imis-pega-chogzhadyob pe neg takalil, pe wisgunonimalmogo, Pab-neg-takmaiddin pato omodanimo.

³²“Imi an chunchunnad pemalga chogdo: imi te ibegin-tule-pukmalad ampayo purkwenmaladdu, an-pega-chogzhadyob keg-chulgu kued-wilub. ³³Imi nikpa-neg tegin iti-nap pelgunoniko, tenal an-immal-chogzhad keg-chulgu kued-wilub, an-kakapurwa kwen perienguoju-kuo.

³⁴“Tenal pe wijirmal, pe nue aga takermal. Tenal pe melle twagdar mas-kunnedgin pinzhao, tegin pe melle mumurguedgin nanao. Tegin pe melle iti-napkin twagdar immalmal-nikuedgin pukib-itononikidbal, pe pinzheed-kalenonimalbalo. Tenal pe twagdar we immalmalgin pinzhediil, an-pega-chogzhadyob te ibe arpak pega kunoniko. Al pe we immalmalgin kalenoniko, immal-tulgang-arpakaal kalededyob.

³⁵“Imi an-pega-chogzhadyob neg-kunonikil, pel-kwapa tule-iti-napkin-pukmaladga kunoniko. ³⁶Imi pemal keg-chulgu pe pane-pane kuakwa kudigued-wilubmal, tegin pe Pabzhe kolenabmalbal, we neg-kudanikid melle peje nonigal, tegin pe Pabzhe kolenabmalbal an-Te-Tule-Chunna-assapin pe chwilimakal kwisgutapmalgalbal.”

Teob Jesús chogzhagus.

³⁷ Tegin Jesús pane-pane ibgin Pabzhe-koled-neggan Pab-igalgin tulemal-oturdadi-kus. Tenal Jesús chedo nadda Olivo-yalzhe kabnegal. ³⁸ Tegin tulemal-pel-kwapa wakur Pabzhe-koled-negzhe irmanonidamal, Jesús-tulemal-oturdanaid itogal.

Judas-Iscariote manibal

Jesúsgin akpitchad

(Mateo 26:14-16; Marcos 14:10-11; Juan 13:21-30)

22 Imi teun takalgu, Madu-Ina-Nikchulid-Itoged pato omodani, tenal we itoged pimalbal Pab-Najad-Itoged.
²Tenal teun tule-irwal-Pabzhe-kolmalad-e-tummagan tegin Moisés-igalgin-tulemal-oturdamalad igal-aminanimal Jesús-mesgal. Tenal Judio-tummagan tulemal-tobedbal kwen unninguszhulmal Jesús-kagal.

³Tegin nia-Satanás Jesús-e-chapingan-walambe-kakabogwad-walgwengin tognoni. Tenal we tuledin nug Judas-Iscariote. ⁴Tegin Judas tule-irwal-Pabzhe-kolmalad-e-tummaganzhe tegin Pabzhe-koled-negginnmalad-chulub-tummaganzhe nad, Judio-tummaganbak igal-nudagal Jesús-ukegal.

⁵Tenal Judio-tummagan yer Judas-itosmal. Tegin Judio-tummagan aga emal-emal igal-nudasmal Judasga mani ukegal. ⁶Tenal Judas weob-melgu-ega-mani-uklegoed yer itosmo. Tegin Judas igal-aminaigualzhun tulemal-pukchulidgin Judio-tummaganza Jesús-ukegal.

Jesús aga e-chapinganbak chedo napi mas kuchad

(Mateo 26:17-30; Marcos 14:12-25; Juan 13:21-30; 1 Corintios 11:17-34)

⁷Tegin Madu-Ina-Nikchulid-Itoged-ibe noni. Imi teun te ibegin

kusgu igal-maidbal Pab-Najad-Itoged wisgugal oveja-chapini-mesmalbal.

⁸Al Jesús Pedro-tegin-Juan-palmijogalidgin Pedromalga chogal:

—Imi pe neg-kweburzhe nemalo. Tegin pe tebal anmalga neg nudamalo, animal Pab-Najad-Itogedgin mas kunmalgal.

⁹Tegin Pedro Juanbak Jesúszhe ekichialmal:

—¿Pia pe pei, animal pega neg nudamalgal Pab-Najad-Itogedgin mas kunmalgal?

¹⁰Tegin Jesús Pedroga tegin Juanga chogalzhun:

—Nabir. Imi pemal Jerusalén-neg-kweburzhe tognatapil, pe tule-walgwen-taknatapo, metegin ti cheimai. Tenal pe we tule-cholbal nemalo. Tegin tule-ti-cheimaid negtogoedzhe, pe togmalmogo. ¹¹Tenal pe tule-neg-ibedga chogo: ‘Imi tule-oturdaked chog: ¿Pia negde chii, an naga chapinganbak Pab-Najad-Itogedgin mas kunkal?’ ¹²Tegin tule-neg-ibedga pega nikpa neg-tummad oyogo. Tenal we neggin pél immalmal nika. Tegin pemal we neggin anmalga mas-kunned tumalo itoged itogal.

¹³Tegin Jesús-e-chapingan-walbogid nadmalgu, Jesús-chogzhad-yopí ka kunoni. Tenal Jesús-e-chapingan we neggin Pab-Najad-Itogedga pél immalmal nudasmalzhun. Tegin Jesús kep aga e-chapingan-pimaladbak irmanimalmalo.

¹⁴Tegin mas-kunned-wachigin nonigu, Jesús aga e-chapinganbak mesa-nabal ampagunomial mas kunkal. ¹⁵Tegin Jesús aga e-chapinganga chogal:

—Imi an ampayo purkweddu, an inkwagus we Pab-Najad-Itogedgin pemalbak mes mas kunpi-kudiin.

¹⁶Imi an chunchunnad pemalga chogdo: an pemalbak we mas pal kwen kunnojul, Pab-neg-takmaidgin immal-purpal-chogle-maid sanal kunonikoedzhe.

¹⁷Tegin Jesús kobed chusgu, Pab Tummadga tog-nuedi chogzha. Tegin Jesús aga e-chapinganga chogal:

—We kobed-chiid pe chu, tegin pemal-ilbal we kobed kobmalo.

¹⁸Tenal an chunchunnad pemalga chogdo: imi an imis-akar uva-nis pal kwen koboju-kuo, Pab-neg-takmaid nonikoedzhe.

¹⁹Tegin Jesús madu chusbalgu, Pab Tummadga tog-nuedi choghabal. Tegin Jesús purwi-purwi madu pipichisgu, aga e-chapinganga ukcha. Tegin Jesús aga e-chapinganga chogalbal:

—Imi we madu an-chan pemanal purkwegal ukles. Al pe we madu kunmalo, an purkwijadgin pe pinzhedi-kumalgal.

Tegin Jesús-e-chapingan madu kuchamalzhun.

²⁰Tegin Jesús madu-imajadyob, mas-kuchad-cholbal, Jesús kobed chusbal. Tegin Jesús chogalbal:

—Imi we kobed an-abé. Tenal an-abé oyonai Pab-Tummad-kakapin-ukchad ib-chunchunnad. Al an-abé pemalga milenoniko.

²¹Tenal tule-an-kin-akpinnonikoed ampa anpak mes mesa-nabal chimo. ²²Imi Pab Tummad akpene chogzhadyob an-Te-Tule-Chunnagin kunoniko. Tenal tule-an-kin-akpinnonikoed oturdalegoedbal ampi peyedzhe wilesma.

²³Tegin Jesús-e-chapingan aga emal-emal ekichialmal, chogalmal:

—¿Toa anmal-abalgín Jesúsgin akpinnoniko-ade?

Tenal e-chapingan ilgwen yakir pesmal.

Jesús-e-chapingan aga emal-emal ekisnaigujad toa pul tule-tummad

²⁴Imi teun takalgu, Jesús-e-chapingan aga imakalmal, emal-abalgín toa pul tule-tummadga kudii. ²⁵Tegin Jesús aga e-chapinganga chogal:

“Imi erreymal-iti-napkinmalad tummarba-itogedgin saejul tulemal-imanonida. Tenal tule-tummagan aga chogaldamal, ede tulemal-pentaked-tule. ²⁶Tenal pemal melle iti-napkined-tummaganyob nanemalo. Tenal pemal-tummagan pul chapinganyob naneed-wilubmal. Tegin pemal-neg-takmamimalad pul mosyob naneed-wilubmalbal. ²⁷¿Imi toa pul tule-tummad, tule-mesa-nabal-chiid o tule-mesagin-immal-upred? ¿Tule-mesa-nabal-chiidzhulzhí? Teobdo.

“Tenal an pemal-tummadga kudiindo, tenal an pemalga yabli mosyob immal ima. Tenal pemal anyob naneed-wilubmalmo.

²⁸Imi an-wilenaidgin, pemal ampa anpak mes wiledi-kusmalmo.

²⁹Tenal an pemal-odomogo neg-takegal, Pab Tummad neg-takegal an-odojadyobmo. ³⁰Al an-neg-takoedgin, pemal ampa anpak mes mas kunno, tegin pe anpak mes kobmalmogo. Tenal pe tule-tummagan-kan-kwaambe-kakabogwad-pukwadgin pe chigwitapmalmogo, Israel-tulemal-chogambe-kakabogwadga igal-itogal.”

Jesús Pedroga chogzhagujad:

**“Pe ankin chogdago:
‘An Jesús-kwen-wichul’ ”**

(Mateo 26:31-35; Marcos 14:26-31;
Juan 13:36-38)

³¹Tegin Jesús chogalbal:

—Simónye, imi nia-Satanás Pab Tummadzhe pe-ekichis, tule aros-ominaidyo pe wilub takegal.

³²Tenal antin pega Pabzhe koldikus, pe melle ankin pengunonigal. Tenal pe ankin-iskujad-cholbal pe kannan anpal naigunonikil, pe kwenamalad-okannogo pul nuekwa anpal naigugal.

³³Tegin Simón-Pedro Jesúsga chogal:

—Tummad, pinche pe koltima. Imi antin kuakwa kudii pebak

oturdaledeg-negggin mes oturdalegal.
Tegin an kuakwa kudibal pebak
mes purkwegalbal.

³⁴Tegin Jesús Simón-Pedroga
chogalbal:

—Chulá. Pedro, imi an
chunchunnad pega chogdo: imis
ampayo kallim-mastad namakeddu,
pe ilapá ankin chogo: ‘Antin we
tule-kwen-wichul.’

³⁵Tegin Jesús aga e-chapinganzhe
ekchial:

—Imi an akpene pemal-palmisgu,
an immal-kwen-níkchul pemal-
palmis. Imi teun pemal mani pel
chedzhulmal, tegin muchila pel
chedzhulmal, tegin pe kutar-
ogwaed pel chedzhulmalbal. ¿Imi
teun pemalga immalmal-akus o
chul?

Tegin e-chapingan Jesúsga
chogalmal:

—Chulá. Anmalga immal kwen
napi-kuszhulmal.

³⁶Tegin Jesús aga e-chapinganga
chogal:

—Imi an akpene pemal-
palmijadyob pemalga ib pal kwen
kunejulmal. Imidin pe immalmal
chedenabmalzhun. Imi pe mani
nikal, pe mani chedenab. Tegin
pe muchila nikal, pe muchila
chedenabbal. Tenal pe es-pilacheed
níkchulil, manigin aga pe-chuba
uko, tegin pe we manigin aga pe
es-pilacheed pakó. ³⁷¿Ibiga an teob
pemalga chog? Nabir. Imi Pab-
kartagin nermakal maido:

Ankin choglego,
antin tule-ískana.

Is. 53:12

Tegin Pab-kartagin-nermakal-
maidyob keg-chulgu ankin
kuoed-wilub, tenal ankin pato
kunai.

³⁸Tegin e-chapingan Jesúsga
chogalmal:

—Tummad, pe tak, wegin
es-pilacheed-kabo mai.

Tegin Jesús aga e-chapinganga
chogalzhun:

—Ogus pe chunmamalma, nemal.

Jesús Getsemanígín Pabzhe napi kochad

(Mateo 26:36-46; Marcos 14:32-42)

³⁹Tenal Jesús kusgu Olivo-
yalzhe nadda-choggú, al Jesús
Olivo-yalzhe nadzhun. Tenal
Jesús-e-chapingan Jesús-cholbal
irmadmalmo. ⁴⁰Tegin Jesús
neg-natapidzhe omosmalgu, aga
e-chapinganga chogal:

—Imi pemal Pabzhe kolenabmal,
melle wilub-takleged pemalzhe
nonimalgal.

⁴¹Tegin Jesús aga e-chapingan-
akar tule-unni-akwa-miedun-panku
wis nad. Tegin Jesús yokorgin-
chimtial chigwisgu Pabzhe
kolal, chogal: ⁴²“Pabye, imi
ina-kakpidyob an-wilegoedgin
nabir-noo pe an-takel, pe an-
onogoye. Tenal an-itelegedbal-chul,
tenal pe-itelegedbalaye.”

((⁴³Tegin Pab-angel-walgwen
níkpa-akar Jesúszhe noni Jesús-
okannogal. ⁴⁴Tegin Jesús aga
ulubgin peyedzhe pukib-itogedbal
neg-owebi-kualedgin pul kantik
Pab Tummazhe kote. Tegin
Jesús-e-wigmaked abeyob napkin
tedemas.))

⁴⁵Tegin Jesús Pab Tummazhe pél
kochagu, kannan aga e-chapingan-
pukwadzhe albal. Tenal Jesús aga
e-chapingan pukwadzhe nonigu,
e-chapingan-taknoni peyedzhe
pukib-itogedbal kabmamimal.

⁴⁶Tegin Jesús aga e-chapinganga
chogal: “¿Ibiga pemal kabmamimal-
wedé? Pe atamalma, Pab
Tummazhe kolgal, imis-immal-
kuoedgin pe melle wilub-taklegal,
tegin pe melle an-midmalgalbal.”

Judio-tummagan Jesús-kasmalad

(Mateo 26:47-56; Marcos 14:43-53;

Juan 18:1-11)

⁴⁷Tegin Jesús ampa aga
e-chapinganga chunma-kwichidgin
tulemal-ichejul irmanonimal.

Tenal Jesús-e-chapingan-walambe-kakabogwad-walgwen-Judas-nugad, tulemal-iktudani. Tegin Judas Jesús-abir kwisgunoni, tenal igal-mamikidbal Jesús-wagal-us.⁴⁸ Tegin Jesús Judaszhe ekichial:

—¿Judas, imi pe an-wagal-ujadgin pe an-Te-Tule-Chunna-uknaiyé?

⁴⁹ Tegin Jesús-e-chapingan takchamalgu immal-akalgujogal, Jesúsga chogalmal:

—¿Tummad, animal es-pilacheedgin we tulemal itimimalmogo o chul?

⁵⁰ Tenal Jesús ampayo e-chapinganga chogeddu: “Melle tule-chiko,” Jesús-e-chapin-walgwen es-pilacheedgin tummad-e-mos-chiktegu, chuchu-nuedzhikpi kaletap-idirrí. Tenal tule-chuchu-chiklejad tule-irwal-Pabzhe-kolmalad-pul-tummad-emos.

⁵¹ Tegin Jesús chogal:

—¡Melle tule-pal-chikoma!

Tegin Jesús tule-chuchu-idirijad kannan nazhisgu, ilgwen tule-chuchu-idirijad-nudas.

⁵² Tegin Jesús tule-irwal-Pabzhe-kolmalad-e-tummaganga tegin Pabzhe-koled-negginc-chulub-tummaganga tegin Judio-chelegan-tummagán-Jesús-kanonimaladga chogal:

—¿Ibiga pemal es-pilacheed-annik tegin chowal-oro-annik an-kadanimal-wede, an-kantikidgin-immal-aturzheed-tuleyob?⁵³ Imi antin pemalbak pane-pane Pabzhe-koled-negginc kudigus. Tenal pemal an-kwen-kabijulmal. Tenal imidin niaga-igal-uklejadbal, al pemalga ibe-noní an-kagal.

Tegin chulubmal Jesús-kasmalzhun.

Pedro Jesúsgin chogzhagujad ede Jesús-kwen-wichul

(Mateo 26:69-75; Marcos 14:66-72;
Juan 18:15-18, 25-27)

⁵⁴ Tegin chulubmal Jesús-kasmalgu, tule-irwal-Pabzhe-

kolmalad-pul-tummad-e-negzhe Jesús-chesmalzhun. Tenal Pedro untar-panku Jesús-cholbal pinna-pinna nadmo.⁵⁵ Tegin Pabzhe-koled-neg-takmalad neg-impagin cho ogasmalgu, cho-ebiral ampagusmal chowagal. Tegin Pedro tule-pukwad-abalgin chignonimo chowagalmo.⁵⁶ Tegin puna-mos-walgwen cho-kaedbal chii Pedro-takchagu, nuu Pedro-takal. Tegin puna tule-pukmaladga chogal:

—¿We tule Jesúsbak-kudimogad-taklebalí?

⁵⁷ Tegin Pedro punaga chogal:

—Puna, an we tule-kwen-wichul.

⁵⁸ Tegin apka te-cholbal, tule-pid Pedro-takchagu, Pedroga chogalmo:

—¿Pe tule-kalejad-e-pakadmo-taklebalí?

Tegin Pedro we tulega chogal:

—Chuli an-ai, antin we tule-pakad-chuli.

⁵⁹ Tegin apka te-cholbal wachi-ilgwengin, tule-pid tule-chowa-pukmaladga Pedrogín chogalmo:

—Imi an chunchunnad pemalga chogdo: we tule, tule-kalejadbak kudimogan. We tule ampa Galilea-tolmo.

⁶⁰ Tegin Pedro tule-egin-chogzhadga chogal:

—Chuli machi, an wichí pe ibigin chunmanai.

Tegidgin Pedro ampa chunmanaidgin, kallin-mastad namanoni.⁶¹ Tegin Tummad-Jesús Pedrozhik akpiridgu, nuu Pedro-takte. Tegin Pedro kep wisgunoni, Jesús akpene ega igi chogzhagujad. Imi teun Jesús Pedrogá chogzhado: “Imi ampayo kallin-mastad namakeddu, pe ilapá ankin chognoniko: ‘An Jesús-kwen-wichul.’”

⁶² Al Pedro ilgwen magadbal nodgu, pukib-itogedbal peyedzhe pononi.

⁶³ Tegin chulubmal-Jesús-takpukmalad istar Jesúsgin

todoalmal. Tegin chulubmal sapejul Jesús-sakialmalbal.⁶⁴ Tenal chulubmal Jesús-imia-etismalgu, Jesús-sakismal. Tegin chulubmal Jesúszhe ekichialmal:

—Imi pe-immal-wijiidbal pe anka ilgwen chogo toa pe-sakis.

Tenal Jesús immal kwen chogzhajul-kus, ilgwen yakir pes.⁶⁵ Tegin chulubmal akal-akal Jesúsgin istar chunmakalmalbal.

**Judio-tummagan-wala-tulapá-kakaambegwad
Jesúsga igal-itojad**

(Mateo 26:57-68; Marcos 14:53-65;
Juan 18:19-24)

⁶⁶ Tegin neg-oiposgu, Judio-tummagan ormanonimal, tule-irwal-Pabzhe-kolmalad-e-tummagan tegin Moisés-igalgin-tulemal-oturdamalad. Tegin chulubmal Judio-tummagan-ormabukmaladzhe Jesús-cheinonimal. ⁶⁷ Tegin Judio-tummagan Jesúszhe ekichialmal:

—Imi pe Pab-akpene-chogzhad-palmidagoed-tulel, pe anmalga nuekwa chogo: ‘Antin Cristo.’

Tegin Jesús Judio-tummaganga chogal:

—Imi an pemalga chogzhal ‘Antin a-tule,’ pemal yabli anpal kwen ibzhaojulmal.⁶⁸ Tenal an pemalzhe immal ekichial, pemal anka immal kwen chogojulmalmo.⁶⁹ Tenal an imis-akar an-Te-Tule-Chunna Pab-Tummad-pela-pela-kannaled-nikad-nuedzhik tule-tummadga chigwitapo.

⁷⁰ Tegin Judio-tummagan Jesúszhe ekichialmal:

—Tegil pe Pab-Tummad-e-Machidé?

Tegin Jesús Judio-tummaganga chogal:

—Nabir pe chogzhado, antin a-tuledo.

⁷¹ Tegin Judio-tummagan chogalmalzhun:

—¿Pe itojímal igi chog? ¡Imi anmal ibiga tule-e-takchamaladzhe immal pal ekiso? We tule aga tukin chogzha, ede Pab-Machi. Al anmal keg-chulgu we tule-mejenabmal.

Pilato Jesúsga igal-itojad

(Mateo 27:11-26; Marcos 15:1-15;
Lucas 23:13-25; Juan 18:28-19:16)

23 Tegin Judio-tummagan-ormabukmalad-pel-kwapa aknidmalgu, ilgwen Pilatoje Jesús-chesmalzhun Jesúsga igal-itogal.

² Tegin Judio-tummagan Pilatoje omosgu, Pilatoga Jesús-tuktialmal, chogalmal:

—Imi anmal takalmaldo, we tule animal-tulemal-pinzheed kadii Romano-abin-kwisgugal. Tenal we tule chogdo, anmalde melle Romano-Tummad-Césarga maniegwannanimalad pal penuko. Tegin we tule chogbal, ede Cristo-Pab-akpene-chogzhad-palmidagoed-tule. Tegin we tule chogbal, ede Judio-erreyga maibal.

³ Tegin Pilato Jesúszhe ekichial:

—¿Chunnají pe Judio-erreyzhí?

Tegin Jesús Pilatoga chogalzhun:

—Imi pe nabir chogzhado. Antin a-tuledo.

⁴ Tegin Pilato tule-irwal-Pabzhe-kolmalad-e-tummaganga tegin tulemalga chogalzhun:

—Imi an takto, we tule immal kwen akaloszhul.

⁵ Tenal Judio-tummagan kannan-kannan Pilatoga chognaigual:

—Tenal we tule pel-kwapa Provincia-Judeagin tulemal-oturdadiidbal, tulemal-oulusmal Romano-tummagan-abin-kwisgugal. Imi we tule kepegin Provincia-Galileagin tulemal-oulusmal, tegin itije-pakal tulemal-ournonimalbal.

Errey-Herode Jesúsga igal-itojad

⁶ Tegin Pilato itosgu Jesúsdé kepegin Provincia-Galileagin kudigus, Judio-tummaganzhe ekichial:

—¿Imi we Jesúsde Galilea-tolzhí?
Tegin Judio-tummagagan Pilatoga chogalmal:

—Teobdo.

⁷Tenal Pilato itosgu Jesús Herode-neg-takmaidgin-tani, Herodeje Jesús-palmiszhun. Imi teun takalgu, Herode Jerusaléngin maimo. Al Pilato Herodeje Jesús-palmiszhun.

⁸Tenal teun Herode Jesús-takchagu eje tani, weligwal itononi. Imi Herode itodi-kus Jesús immal-taktijulmalad imadii. Al Herode imial Jesús-takpi-kudii, Jesús e-wagin immal-taktijulid imagalmo. Al Herode tikajulgus Jesús-takpi-kudiin.

⁹Tenal Herode peyedzhe Jesúszhe immal ekisnaigual. Tenal Jesús ilgwen yakir pes, Herodega immal kwen chogzhajul-kus. ¹⁰Tenal tule-irwal-Pabzhe-kolmalad-e-tummagagan tegin Moisés-igalgan-tulemal-oturdamalad kannan-kannan pul pela-pela Jesús-tukigalmal.

¹¹Tenal Herode aga e-chulubmalbak istar Jesúsgin todoalmal, tegin Jesúsgin istar chunmakalmalbal. Tegin chulubmal Jesúsgin mol-yér-takleged yosmal. Tegin Herode kannan Pilatoje Jesús-palmisbal. ¹²Imi teun Herode kusgu Pilatobak aga aichulmalan. Tenal Herode Jesúsga-igal-itojad-akar Pilatobak aga ai-nuedga imanonimalzhun.

Pilato Judio-tummaganga igal-ukchad nakrusgin Jesús-piokkal

(Mateo 27:11-26; Marcos 15:1-15;
Lucas 23:1-5; Juan 18:28-19:16)

¹³Tegin Pilato tule-irwal-Pabzhe-kolmalad-e-tummaganzhe tegin Judio-tummagagan-pimaladzhe tegin tulemal-yogasalmaladzhe pel-kwapa kocha. Tegin Pilato tulemalga chogal:

¹⁴—Imi pemal anche we tulecheinomial. Tegin pemal chogmal,

we tulede tulemal-pinzheed kadii Romano-tummagangin ourwegal. Tenal antin we tuleje pél immal ekichis, ibi akalos-ade. Tenal antin we tulegin-immal-akalodiid kwen onoszhul-kus. ¹⁵Imi Herode anmalzhe kannan Jesús-palmialidbal, al anmal wismal, Herode Jesús-immal-akalodiid kwen onoszhulmo. Al pemal mag itogenabmal we tule kwen purkwed-wilubzhul. ¹⁶Tenal antin we tule-wis-oturdane tegin an kannan ne-ononebal.

¹⁷Tenal Pab-Najad-Itoged-naidbal, Pilato keg-chulgu igal-maidbal tulewalgwen-onoe-wilub. Al Pilato Jesús-onobi-kual. ¹⁸Tenal tulemal pulakwa kotemal chogalmal:

—¡We tule pe mejo! ¡Barrabásdin pe onogo!

¹⁹(Imi we Barrabás Jerusaléngin Romano-tulemalbak urwedi-kujadbal tegin tulemal-mechadbal, oturdaleged-negggin mellejii.)

²⁰Tenal Pilato Jesús-onobi-kunaibdal tulemalga kannan chogbal:

—¿An Jesús-ononeé?

²¹Tenal tulemal kannan-kannan pulakwa kolnanimal chognanimal:

—¡We Jesús nakrusgin pe tar-pioko!

²²Tegin Pilato ilapágus tulemalga chogedgin, chogal:

—¿Ibiga an nakrusgin Jesús-pioko-ade? ¿Ibi akalos-ade purkwegal? Imi an Jesúsgin immal-akalojad kwen onoszhul purkwegal. Al an Jesús-wis-oturdane, tegin an kannan ne-ononebal.

²³Tenal tulemal sapejul kotemal chogalmal:

—Imi pedin keg-chulgu nakrusgin-nai Jesús-mejenab.

Tegin tulemal yabli Pilatoginnakwismal Jesús-mesgal.

²⁴Tegin Pilato chogalzhun Judiomal akalzhul nakrusgin-nai Jesús-mesmalzhunno.

²⁵Imi Barrabás Jerusalén-neg-kweburgin Romano-tummaganganbak urwedi-kus tegin tulemal-mechabal. Tenal tulemal-Pilatoje-ekichijadbal, Pilato yabli Barrabás-onos. Tenal Pilato Judío-tummaganga Jesús-ukchajun, Judío-tummagán aga itolegedbal Jesús-mesgal.

Chulubmal nakrusgin Jesús-piokchamalad

(Mateo 27:32-44; Marcos 15:16-32;
Juan 19:17-27)

²⁶Tegin chulubmal nakrusgin piokkal Jesús-cheinatapmaladgin, Simón-Cirenegined-kasmal Jesúsga nakrus chedgal. Imi we Simóndin a-ito Jerusalénzhe tanikin. Tenal chulubmal kantikidgin Simóngin nakrus mezhismal, Jesús-cholbal nakrus chedgal. ²⁷Tenal tulemal-íchejul Jesús-cholbal irmadanimalmo. Imi teun omegan pukib-itogedbal Jesúsga nakpodanimalmo, kwen okormadanimal.

²⁸Tegidgin Jesús omeganzhik akpiridgu, omeganga chogal:

“Omegan-Jerusaléngimalad, pe melle anka pomalma. Pemalaga tukin pomalma, tegin pe aga nuskanga. ²⁹Imi pemalga kujal neg-puled-noniko. Tenal pemalga neg-puled-nonikil, nuskan-peyedzhe-wilenoniko. Al pemal chogdamalo: ‘Imi omegan-kusgu-wichul-nuchu-pakmaladga, ib-nuedga kus. Tegin omegan-ampayo-nuskan-nikumaladga, ib-nuedga kusmo. Tegin omegan-nugin-nuchu-okuchajulmaladga, ib-nuedga kusmo.’ ³⁰Tegin teibe-nonikoedgin,

tulemal peyedzhe-wilenaibdal yal-tummaganga chogdamalo:

‘Imi pe ankin pel-kwapa yaswelen, nabirin,’

Tegin tulemal yal-mullunganaga chogdamalbalo:

‘Imi pe an-chaktigelen, nabirbalin.’ Os. 10:8

³¹“Imi tule chapi-wal-makidgin sapejul immal imanail, tegin chapi-wal kujal tinkunonikil, ḡwe tulemal pul sapejul immal imamalojulzhi? Teobdo.”

Teob Jesús chogzhagus.

³²Imi teun chulubmal Jesúsbak walbo tule-iskana-cheimamimalmo nakrusgin piokkalmo. ³³Tegin chulubmal Tule-Nono-Kal-Yal-neg-nugadzhe Jesús-cheinonimalgu, we yalgin nakrusgin Jesús-piokchamalzhun. Tegin chulubmal nakrus-pidgin tule-iskana-piokchamalmo, kwén Jesús-nuedzhik, kwéntin Jesús-chapilezhik.

³⁴Tegidgin Jesús chogal:

—Pabye, we tulemal-sapejul-an-imananimaladga pe chogo: ‘Pe-iskueddin pelgusye.’ Imi we tulemal immal kwen wichulmal, ibi ankin imananimalye.

Tegin chulubmal Jesús-molgin todoalmal, toa pul-melu aga mol chumalo.

³⁵Tenal tulemal pel-kwapa Jesús-takpukmal. Tenal Judío-tummagán istar Jesúsgin chunmakalmal chogalmal:

—Imi we tule, tule-pimalad-abonos. Tenal we tule chunchunnad Pab-Tummad-akpene-chogzhad-palmidagoed-Cristol, tegin Pab we tule-chusbailil, nakrusgin-naid-akar aga tukin abonodo.

³⁶Tegin chulubmal Jesús-waglik kwisgunonimalgu, Jesúsgin todoalmal. Tegin chulubmal Jesúsga vino-kakpid uknain, tenal Jesús yabli kwen kobzhajulkus. ³⁷Tegin chulubmal Jesúsga chogalmal:

—Imi pe chunchunnad Judiomal-e-erreyel, pe aga tukin nakrusgin-naid-akar pe-abonodo.

³⁸Tegin Jesús-nakrus-tukugin karta ((kaka-chogapá nermakal nai, Griego-kakagin, Romano-kakagin tegin Judío-kakagin nermakal-

naimo)). Tenal karta-nermakal-naid chognaido:

WE TULE JUDIOMAL-E-ERREY.

³⁹Tegin tule-immal-aturzhemalad-walgwen
Jesús-yalbal-nakrusgin-naid istar
Jesúsgin chunmakalmo. Tegin we
tule Jesúsga chogal:

—Imi pe Pab-akpene-chogzhad-palmidagoed-tule chunchunnadil,
pe aga tukin nakrusgin-naid-akar pe-abonodo. Tegin pe
animal-abonomogo.

⁴⁰Tenal tule-immal-aturzhemalad-piddin aga e-pakadga chogal:

—¿Ibiga pe weob we tulega chogdé? Imi pe we tule-yopí pe purkwenemo. Tede, čampa pe Pab-Tummad-kwen-tobzhul? ⁴¹Imi animal-walbogid immal-akalojadbal nabir oturdalenai. Tenal we tule immal kwen akaloszhul. Al we tule weob oturdaledeg-wilubzhulin.

⁴²Tegin tule-immal-aturzheed-e-pakad-abin-imajad Jesúsga chogal:

—Jesúsye, imi pe neg-takoed omojal, pe ankin wis pinzhemogoye.

⁴³Tegin Jesús tule-immal-aturzeedga chogal:

—Tegil pe imis Pab-neg-nuedgin anpak mes megwitapmogo.

Jesús nakrusgin-nai purkwijad

(Mateo 27:45-56; Marcos 15:33-41;
Juan 19:28-37; Hebreos 9:1-28)

⁴⁴Tegin yorokudanikid-akar wachilapáje neg-pel-kwapa chichidbi naigus. ⁴⁵Imi teun tadgwa mommó kanai-pes. Tegin Pabzhe-koled-neggín mol-naid apallala islis. ⁴⁶Tegin Jesús sapejul kotegu, chogal:

—Pabye, an pega purpa ukye, pe an-takegalye.

Tegin Jesús weob chogzhagu, ilgwen purkwis.

⁴⁷Tenal chulub-tummad pél immal-kujad takchagu, Pab-Tummad-otummoal chogal:

—¿We tule chunchunnad immal-kwen-akaloszhulid-taklebalí?

⁴⁸Tegin tule-pel-kwapa-aka-tégintakpukmalad immal-kujad takchamalgu, pukib-itogedbal aga negzhe twisgal-ebionani nadmal. ⁴⁹Tegin tulemal-pel-kwapa mag-Jesús-takmalad, tegin omegan-Galilea-akar-Jesúsbak-nonimalad-ugakche, panna Jesúsgin-pél-immal-kunaid takpukmal-pes.

Tule Jesús-mui-tigzhamalad

(Mateo 27:57-61; Marcos 15:42-47;
Juan 19:38-42)

⁵⁰Imi teun tule-walgwen-José-nugad maimo. Tenal we tule neg-kwebur-Arimateagined. Tenal we neg-kweburdin Provincia-Judeagin chii. Tenal José-din Judío-tummagán-wala-tulapá-kakaambegwad-walgwen. Tenal José tule-nued, tegin tule-innikigwad. ⁵¹Tenal akpene Judío-tummagán ormasmalgu Jesús-mesgal, we José tummagánbal kwen naiguszhul. Tenal José Pab-neg-takmaid abintadimogan.

⁵²Tegin José Pilatoje nad Jesús-mui-ekisgal tiggal. ⁵³Tegin Pilato Joséga igal-ukchagu, José nakrus-akar Jesús-mui odeszhun. Tegin José kep mol-chibugin Jesús-mui ebirmas. Tegin José akwapir-chobaled-yabal Jesús-mui-odos. Tenal we akwapir-chobaled-ya ampa-tule-kwen-tigledijulid.

⁵⁴Imi teun itogedga-immal-nudaked-ibe nai, tegin ulukued-ibe pato omodanibal. ⁵⁵Tenal omegan-Galilea-akar-Jesúsbak-nonimalad José-cholbal pinna-pinna nadmal, takegal Joséde pia Jesús-mui-tigo-dewa. Tegin omegan nuekwa takchagu pia José Jesús-mui-tigzha, kannan negzhe nadmalzhun.

⁵⁶Tegin omegan iktualeba kuakwa ina-ti-wawad amismal, tegin ina-wawad-kwamakaled imasbal, ulukued-ibe-cholbal Jesús-muigin imagal. Tegin omegan ulukued-

ibegin wis ulukusmal, Pab Tummad Moisésbal igal-mezhijadyob.

Jesús purkwaled-akar kannan tullejad

(*Mateo 28:1-10; Marcos 16:1-8;
Juan 20:1-10*)

24 Tegin omegan tumigin polego uanzhe ti-wawad-amismalad-chesmal Jesús-muigin imagal. ²Tenal omegan uanzhe omosmalgu, pato taknatapmal, akwa-tummad-uan-ya-chaktijiid oniral-chii.

³Tegin omegan uan-yabal togzhamalgu, Tummad-Jesús-mui kwen onoszhul-kusmal.

⁴Tegin omegan ampa Jesús-mui-onoszhulidgin pinzhebukwadgin, tule-walbo omegan-abin arpak nononimal. Tenal tule-walbogid mol-pi-pi-pip-kaed yowimal. ⁵Tegin omegan pela-pela kwakijadbal ilgwen tullu chigwismal. Tegin tule-walbogid omeganga chogalmal:

—¿Ibiga pemal tule-purkwalmamimalad-abalgan tule-tulad-aminanimal-wede? ⁶Imi Jesús itigin pato maichul, pato kannan tullesbal. ¿Imi pemal ampa wismalzhulzhí, Jesús pemalbak ampa Galileagin kudigusgu, pemalga igi chogzhagus? ⁷Imi teun Jesús pemalga chogzhado: ‘Imi an-Te-Tule-Chunna tule-iskanaga keg-chulgu uklegenab, tegin an nakrusgin pioklegenab, tegin an ibapágún kannan tullegenabbal.’

⁸Tegin omegan kep wisgud-nadmal, Jesús akpene emalga igi chogzhagujad.

⁹Tegin omegan uan-akar kannan negzhe nonimalgu, Jesús-chapingan-walambe-kakagwenchakkadga tegin tule-aka-pukmaladga pél palchogzhamal uangin emalga igi immal kujad.

¹⁰Tenal omegan-Jesús-nuggin-palmilegalmaladga-

chognonimalad: María Magdalena, Juana, Santiago-e-nan-María, tegin omegan-pimalad.

¹¹Tenal Jesús-nuggin-palmilegalmalad omegan-ega-chognonikdbal kwen ibzhaszhulmal. Tenal Jesús-e-chapingan chogalmal: “We omegan pinche chunmamalma.”

¹²Tegin Pedro kwisgudgu, yok ilgwen uanzhe abarmad. Tegin Pedro uan-yabal tognonigu, tullu imas. Tenal Pedro Jesús-mui-kwen-onoszhul-kus, mol-Jesús-ebirmajadbi unnila pukwa. Tegin Pedro kannan algu, pinzhe-nad Jesús-muide igi kus-dewa.

Jesús Emaús-igalbal tule-walbogidga sanal nononikid

(*Marcos 16:12-13*)

¹³Imi ampa te ibegin, tulemal-walbo-omegan-itosomalad neg-kwebur-Emaúszhe nadmal. Tenal we neg-kwebur Jerusalén-akar wachilbo-naneed-wilub.

¹⁴Tegin tule-walbogid Emaús-igalbal natapidgin, Jesúsgin-pélimmal-kujadgin chunmake-natapmal. ¹⁵Tenal tule-walbogid ampa Jesúsgin-immal-kujadgin aga chunmanatapidgin, Jesús tule-walbogid-palgalatap. Tegin Jesús tule-walbogidbак mes nadzhun. ¹⁶Tenal tule-walbogid Jesúsgin imia akismal, wichulmal wedin Jesús.

¹⁷Tegin Jesús tule-walbogidzhe ekichial:

—¿Ibigin pe chunmanatapmal-wede?

Tegidgin tule-walbogid kwisgusmalgu, e-wagal pukib-takle-pes.

¹⁸Tenal tule-walbogid-natapid-walgwen-Cleofas-nugad Jesúsga chogal:

—¿Imi pebi Jerusaléngin kwen kudijulinzhí? ¿Al pe wichulyé Jerusaléngin immal igi kujad?

¹⁹Tegin Jesús tule-walbogidga chogal:
—¿Igi kus-ade?
Tegin tule-walbogid Jesúsga chogalmal:
“Imi Jesús-Nazaretkinedga weob immal kusdo. Imi we tule, Pab-kaka-palchoged. Tegin we Jesús Pab-wagin tegin tulemal-wagin pela-pela-kannaledegdin chunmadi-kus. Tegin Jesús immal-taktijulmalad imadi-kusbal.

²⁰Tegin tule-irwal-Pabzhe-kolmalad-e-tummagan tegin animal-tummagan Romanomalga Jesús-ukchamal, emalga Jesús-messgal. Tegin tule-tummagan nakrusgin-nai Jesús-mechamalzhun.

²¹“Tenal animal abintadiindo Jesús Romanomal-akar Israel-tulemal-onogo. Imi Jesús-purkwijad-akar pato ibapágus.

²²“Tenal animal-omegan-walwalgwen animalga chognonimal, emalde wakur-polego uanzhe arpimal. ²³Tenal omegan Jesús-mui kwen onoszhul-kus. Al omegan weob pakal animal-bebesmal. Tegin omegan animalga chognonimalbaldo, emalde angelmal-takchamal. Tenal angelmal emalga chogzhamal, Jesúsde kannan tulles.

²⁴“Tegin animal-pakamalad-wal-walgpwen uanzhe arpimalmo. Tenal animal-pakamalad omegan-chogzhad-yopí takchamalmo, Jesús-mui kwen maichul. Tenal animal-pakamalad Jesús-kwen-takchajulmalmo.”

²⁵Tegin Jesús tule-walbogidga chogal:

—¿Teobí? Tenal pemal immal kwen wichulma. Tenal pemal Pab-kaka-palchogmalad pél chogzhamaladbal pe penmal.
²⁶¿Imi pemal wismalbalzhulzhí, Cristo ampayo nug-tunkueddu, weob wilegenab?

²⁷Tegin Jesús tule-walbogwadga palchogalzhun: Pab-kartagin egin pél nermalejad; kepegin Moisés egin nermajad, tegin Pab-kaka-palchogmalad egin pél nermasmalad-ugakche.

²⁸Tegin tule-walbogid neg-kwebur-natapidzhe omosmalgu, Jesús ukin-pakal nejogalbalin.

²⁹Tenal tule-walbogid Jesúsga kannan-kannan chognraigualmal:

—Pe melle ukin pal naoma. Imi pe tak, tad pato arkwandani. Pul pe akalzhul animal-neggin animalbak peio.

Tegin Jesús tule-walbogwadbak peszhun.

³⁰Tegin Jesús tule-walbo-nonikidbak mes mas-kunchogalgu, madu chus. Tegin Jesús Pab Tummadga tog-nuedi chogzha. Tegin Jesús pisli-pisli madu imasgu, tule-walbo-ebak-nonimaladga madu ukcha. ³¹Tegidgin tule-walbogid mag Jesús-taknonimalzhun. Tenal Jesús tule-walbogwad-abalgin ilgwen oweles-nad.

³²Tegin tule-walbogid aga emal-emal chogalmal:

—¿Imi Jesús igalbal animalbak chunmadanikidgin, tegin animalga Pab-karta palchogdanikidgin, animal ulubgin yer-itole-nadzhulzhí? Teobdo.

³³Tegin tule-walbogwad ilgwen kwisgudgu, kannan Jerusalénzhe almalbal. Tegin Jerusalénzhe nonimalgu, taknonimal, Jesús-e-chapingan-walambe-kakagwenchakkad, Jesús-chapingan-pimaladbak ormabukmal. ³⁴Imi teun tule-ormabukmalad chunmananimal, chogalmal:

—Imi Tummad-Jesús-kannantullejad, wedin ib-chunchunnad. Tegin Jesús Simón-Pedroga chunchunnad-sanal nononi.

³⁵Tegin tule-walbogid-nonimalad tule-pukmaladga chogalmalmo, igalbal emalga igi immal

kusmogad. Tegin tule-walbogwad chogalmalmo:

—Imi Jesús-pisli-pisli madumajadgin, animal kep mag taknonimal, we tuledin Jesús.

Jesús aga e-chapinganga nononikid

(*Mateo 28:16-20; Marcos 16:14-18; Juan 20:19-23*)

³⁶Tegin Jesús-e-chapingan ampa Jesúsgin chunmananikidgin, Jesús-chunnad e-chapingan-abaladgin sanal kwisgunoni. Tegin Jesús aga e-chapinganga chogal:

—iAnna! ¿Pemalde? Imi pemal aga ulubgin akalzhul-itogelen, nabirin.

³⁷Tegidgin Jesús-e-chapingan Jesúsgin kwakijadbal kikli nadmal. Tenal e-chapingan ebinzhasmal, wedin Jesús-e-purpa.

³⁸Tegin Jesús aga e-chapinganga chogal:

—¿Ibiga pe chuli-pinze itobukmal-wede? ¿Tegin pe ulubgin ibiga ankin penmalbal-wede?
³⁹Imi pe an-takto, an-chunkal an-nag. Antin, an Jesús. Pe an-ebudo, antin sanal, an purpajul. Tenal pe an-takto, antin chan tegin an kal nika. Tenal purpadin chan, kal pel nikchul, pinche purpabi.

⁴⁰Tegin Jesús pél chunmasgu, aga e-chapinganzhe chunkal tegin nag-maklejad oyoal. ⁴¹Tegin Jesús-e-chapingan weob pakal pejadbal, tegin peyedzhe weligwal-itononikidbal, neg-owesmal, Jesús sanal nononi o chul. Tegidgin Jesús-tule-pukmaladga chogal:

—¿Imi pemal wegin mas-kunned wis nika an pemalga oyogal, an purpajul, antin sanal?

⁴²Tegin e-chapingan Jesúsga chogalmal:

—Imi animal ua-chelogaled wis nika, ((tegin animal acha-nis wis nikmalbal)).

Tegin e-chapingan Jesúsga abal-piskal ua-ukchamalgu, ⁴³Jesús e-chapingan-wagin pél ua-kucha.

Tegin Jesús aga e-chapinganga-pukmaladga chogalbal:

⁴⁴—Imi an pemalbak ti-un, weobankin-immal-kujad, an pél pemalga chogzhado. Imi Moisés-igalgín, tegin Pab-kaka-palchogmaladgin tegin Pab-namaked-kartagin nermakal-mai pel-kwapa ankin keg-chulgu kued-wilub.

⁴⁵Tegin Jesús Pab-kartagin mag-itogal aga e-chapingan-imas.

⁴⁶Tegin Jesús aga e-chapinganga chogal:

“Imi Pab-kartagin nermakal maido: ‘Imi Cristo-Pab-akpene-chogzhad-palmidagoed-tule purkwene, tegin purkwaled-akar ibapágún kannan tullenonibalo.’

⁴⁷“Tegin Pab-kartagin nermakal maibaldo: ‘Imi tule Cristo-nuggin pel-kwapa tule-akal-akal-chunmakedga chunmanonimalo, tulemal aga ulubgin iskuedgin pukib-itogenabmal, tegin Pab we tulemalga iskued elinoniko.’ Tenal kepegin Jerusaléngin-inzhel choglenoniko. ⁴⁸Imi pemal pél an-takchamal an wiledi-kus, an nakrusgin-naidgin purkwis, tegin imi an kannan tullesbal.

⁴⁹“Tegin an pemalga Pab-Purpa-Nued-palmidago, an-Pab-kaka-ukchadyob. Tenal pemal melle we-akar nemalo. Tenal pe iti-Jerusalén-neg-kweburgin peimalo, pemal nikpa-neg-akar Pab Purpa Nuedbal pela-pela kannaled nikanonikoedzhe.”

Jesús Pab-negzhe aknakwijad

(*Marcos 16:19-20; Hechos 1:1-11*)

⁵⁰Tegin Jesús Betania-tikalbal aga e-chapingan-ches. Tegin Jesús Betania-tikalzhe omosgu, kusgu e-taedbal nallakwa aga chakwa imas. Tegin Jesús aga e-chapinganga chogal:

⁵¹—Imi Pab pemalga immal-nued imakelen, nabirinye.

Tegidgin Jesús ampa
chunmanaídgin ilgwen Pab-negzhe
aknakwid.

⁵²Tegin Jesús-e-chapingan
Pab Tummadyob Jesús-
otummosmalgu, pela-pela

weligwaledgin kannan
Jerusaléñzhe almalbal. ⁵³Tegin
Jesús-e-chapingan Pabzhe-
koled-neggin pane-pane
Pab-Tummad-otummodi-kusmal.
Pitomalgu.